


Udél dwata: gna  
kesfasad ne lomi  
kesfasad



New Testament in Tboli (RP:tbl:Tboli)

## **Udél dwata: gna kesfasad ne lomi kesfasad New Testament in Tboli (RP:tbl:Tboli)**

copyright © 2007 Wycliffe Bible Translators, Inc.

Language: Tboli

Translation by: Wycliffe Bible Translators, Inc.

Tboli

tbl

Philippines

### **Copyright Information**

© 2007, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789718960715

### **The New Testament**

in Tboli

### **© 2007, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022

07fe3f6f-241e-5f1e-a520-6090d606a884

## Contents

Matyu . . . . .	1
-----------------	---

## Kun Snulat Matiu

### Mò gna senfala

Bè yóm tehe knô Jisas te tonok, yóm tau hol geta bè Rom fen homong kmamal yóm kul benwu yó kem Ju. Yó gónón alì wen sendalù lemwo bë Rom nô bë clamangen benwu le. Sotu gónón alì mgel bë yó kem Ju yóm alì kdê bwis hbayaden kul yóm tau hol geta bè Rom. Wen kem Ju néléken mò fen gel mtuk bwis bë yó kem kul dumu Ju. Yó se alì kenlit yó kem Ju, mom kul dumu yóm fen mtuk kul, lelen glukas yóm gel ntuk le.

Matyu se yóm sotu Ju tehe gel mtuk bwis bë kem kun dumu Ju. Okóm bë yóm ktaba Jisas du, tódô kendel mimón, tódô tebelén yóm sana tehe kun nmò, ne du hlós baling sotu bë yó kem sfolò lewu gel lemolo ke Jisas.

Wen tehe eles hsulat Dwata yó kem gna tugoden ekni gbak ebè yóm tau deng tehe eles néléken mò hkamalen yóm clamangen, duhen yóm Misaya. Dê tulón Matyu bë nim sulaten ni lemwo bë yóm gna Sulat Dwata mò gónó le dmilô du deng duhen Jisas se yóm hol Ngà Dwata, yóm Misaya tendo gel nangat le. Bud tulónen kul snéen là olon kem Ju du yóm tnóbóng Dwata, bede gomong tnóbóngen yó kem dumu tau bë clamangen benwu.

### Mò gónóm hménég lebangen

1:1-2:23 Yó kem tau tehe gónó Jisas gu semfu, ne yóm kbalingen tau te tonok

3:1-12 Kun ktolok yóm Jan gel mabtays

3:13-4:11 Kehbabtays Jisas ke Jan, ne yóm ktilów Seitan du

4:12-18:35 Ktolok Jisas bë clamangen prubinsya Galili

19:1-20:34 Kógów Jisas bë syudad Jirusalim

21:1-25:46 Yóm nmò Jisas bë Jirusalim bë yóm hol són knóen talak tonok

26:1-27:66 Khatay le ke Jisas

28:1-20 Klowil Jisas, ne yóm bud kehefanen bë yó kem gel lemolo du

*Yó kem tau tehe gónó Jisas gu semfu (Luk 3:23-38)*

<sup>1</sup> Ni se kmò kestugoden yóm gónó Jisas Krays gu semfu bë yóm tehe kehbalingen tau. Semfu gu bë yóm tehe Dabid. Ne ke Dabid, sfu yóm tehe Abraham.

<sup>2</sup> Yóm Abraham ni, du se yóm hol kun mà yóm tehe Isak. Ne mngà yóm Isak, duhen Jakub.

Tikóng mngà Jakub, duhen Juda ne yó kem dumun setwoli hono logi.

<sup>3</sup> Timbow mngà Juda kun, duhen Pérés ne Sira. (Yó boluy yê le, Tamar.) Mngà Pérés, duhen Hisron. Yóm Hisron ni, mà yóm tehe Ram.

<sup>4</sup> Tikóng mngà Ram, duhen Aminadab. Mngà Aminadab, duhen Nasun.

<sup>5</sup> Mngà Nasun, duhen Salmun. Mngà Salmun, duhen Buas. (Ne yó boluy yê Buas, Rahab.) Mngà yóm Buas, duhen Ubid. (Ne yó boluy yê Ubid, Rut.)

Timbow mngà nim Ubid ni, duhen Jisi.

<sup>6</sup> Mngà ke Jisi, duhen Dabid, yóm tehe sotu tau hol geta bë yó kem Ju.

Timbow mngà ke Dabid, duhen Selumun. (Yó yê Selumun, yóm tehe yehen Yuraya.)

<sup>7</sup> Mngà yóm Selumun, duhen Rihubum. Mngà nim Rihubum, duhen Abidya. Mngà Abidya, duhen Asa.

<sup>8</sup> Nim Asa ni, mà yóm tehe Jihusafat. Mngà Jihusafat, duhen Jihuram.

<sup>9</sup> Mngà Jihuram, duhen Usaya. Yó kun ngà Usaya, duhen Jutam. Ne mngà Jutam, duhen Ahas. Mngà Ahas, duhen Hisikaya.

<sup>10</sup> Nim Hisikaya ni, hol kun mà yóm tehe Manasi. Mngà Manasi, duhen Amon. Mngà Amon, duhen Jusiya.

- 11** Mngà Jusiya, duhen Jékunaya ne wen kem twolihen.  
 Umahu kóm bë yóm kul kdaw yó, yó se yóm gotu kegef le kul ebè Babilun yó kem tau Israél.
- 12** Yóm deng kkól le ditu bë Babilun yó kem tau yó koni, mngà Jékunaya, duhen Syaltil. Mngà Syaltil, duhen Sirubabél.
- 13** Mngà ke Sirubabél, duhen Abyud. Ne mngà Abyud, duhen yóm tehe Ilyakim. Mngà Ilyakim, duhen Asor.
- 14** Mngà Asor, duhen Sadok. Mngà ke Sadok, duhen Akim. Mngà Akim, duhen Ilyud. Mngà Ilyud, duhen Élyasar.
- 15** Mngà ke Élyasar, duhen Matan. Mngà Matan, duhen Jakub.
- 16** Mngà Jakub, duhen Jusif. Du se yóm tehe myehen ke Midi, Yê Jisas. Jisas se yóm bnoluy le Misaya, yóm deng nélék Dwata mò kmamal yóm klamangen.
- 17** Duhen yó, sfolò fat duléken mugod lemwót bë Abraham efet kól bë Dabid. Ne bud sfolò fat duléken se mugod lemwót bë Dabid efet kól bë yóm kegef le kul ebè Babilun yóm kdé kem tau Israél. Bud sfolò fat duléken se mugod lemwót bë yóm kegef le kul ebè Babilun efet kól bë yóm ksut Jisas Krays, yóm Misaya.

### *Ksut Jisas Krays (Luk 2:1-7)*

**18** Ni se mò kewóten yóm tehe ksut Jisas Krays. Yóm yéen Midi, deng leninti yóm sotu sawang logi boluyen Jusif. Okóm yóm gu laan le là deng sgefef, tódô mlutut Midi mlan bë Tulus Dwata.

**19** Nim Jusif deng leminti ke Midi ni, tau tedeng kloloen yó kem hlau Dwata, okóm bë nim kwen bnutut Midi ni, là móyóen ke wen gónó Midi myak bë gónón wen. Yó gónón tódô tó lemifut mit du skó bë yóm deng klintihen du.

**20** Yóm igoen tolo hemdem du yóm yó, tódô wen hógów Dwata gu bë lon git hegfan béléen bë knahen, monen

\* **1:23** Isaya 7:14, 8:8,10.

mò du, “Ó Jusif, semfu gu bë Dabid, béis hengayà myehen ke Midi abay se lemwót bë Tulus Dwata yóm bnu tuten.

**21** Angat logi yóm ngaen, ne yó boluyem du Jisas, yakà du yóm lemwà yó kem kun tau gu lem salà le.”

**22** Bë ni kem ni, deng tódô tahu edu yóm tehe tulón Dwata hlanen bë yóm sotu tehe gna tugoden, yóm monen,

**23** “Angat wen sawang libun tódô mlutut, ne mngà logi, ne boluy le du Imanyuwél\* (yó lanen yóm boluyen yó, tendo nô bélê tekuy Dwata).”

**24** Timbow mukat Jusif bë yóm ktungóen yó, tódô nimónen yóm deng monen mò du yóm hógów Dwata, ne tódô nan e nangay Midi, nwiten ebè gónóen.

**25** Okóm song sentungóen, deng sut yóm ngaen logi. Ne yó boluy Jusif du Jisas.

## 2

### *Kauy le ke Jisas yó kem tau lemwót fi gu dmata kdaw*

**1** Bë Bitlihim tehe gónó Jisas sut, yóm sotu benwu udì bë prubinsya Judiya. Bë yóm kdaw yó, Hirod yóm tau hol geta bë yó. Timbow deng malù legen udì yóm ksut Jisas, wen kem tau hulung hménég blotik gdek bë syudad Jirusalim, lemwót le fi gu dmata kdaw. Wen snólók le bë yó kem tau bë yó, mon le,

**2** “Gónóhen seblà sut de yóm ngà mò angat geta bë yó kem Ju? Deng ton me gu ditu bélê me yóm blotik mò ilô yóm ksuten. Nim nógów me ni, na me e hnódó.”

**3** Mung kungol Hirod du yóm mon le yó, ya tey ktafa nawan, ne senged se yó kem dumu tau bë Jirusalim, gbót tafa nawa le se kul.

**4** Omin Hirod gotu semtifun yó kem tau geta bë yó kem gel demsù ebè Dwata ne yó kem tau gel tmolok hlau, snólóken bélê le, monen, “Benwu du

de gónóhen seblà sut yóm Misaya, yóm deng kun nélék Dwata?"

<sup>5</sup> Mon le se mò du, "Bè Bitlihim gónóhen angat sut, yóm sotu benwu udì bù prubinsya Judiya. Yakà deng wen yóm tehe snulat yóm sotu tehe gna tugod Dwata ekni, yóm monen,

<sup>6</sup> 'Nim Bitlihim, sotu benwu udì glem bù yóm kun benwu Juda.

Balù yóm tey kudien, là kóen na a glaan bù yó kem syudad bù yó, yakà bù nim benwu udì ni gónón sut yóm tau mò malak yó kem dou tau Israél.' \*\*

<sup>7</sup> Bè yóm kungol Hirod du yóm tehe hsulat Dwata yó, ominen lemifut tminok yó kem tau hulung hménég blotik yó koni, snólóken bélè le yóm kdaw kegfanen bélè le yóm blotik ton le yó.

<sup>8</sup> Timbow deng tngónen, ominen hógów kul ebè Bitlihim, monen mò kul, "Hlós ye sen, mógów ye kut ebè Bitlihim na ye e hnebel yóm ngà lomi sut yó. Kesok ton ye, na ye e tulón dou dini anì naw e gbót hnódó se do."

<sup>9-10</sup> Tahu se, lemwót le. Bè yóm tolo knô le bù lan, tódô bud ton le yóm blotik tehe gfan bélè le bù benwu le. Ya tey kehligal le bù yóm bud kton le du. Tódô tendo holun tukô gna kul efet htengen ta yóm gónô gónón nô yóm ngà.

<sup>11</sup> Yóm kkól le bù yó, tódô le husek elemen, ne ton le se yóm ngà lewu le Midi, yóm yéen. Uni le mton du, tódô le henmung mtud bukol klohoken ne ya tey kdóyón le du. Omin le makat yó kem kimu alì mebtes nwit le mò basa le du. Wen se tahu blówónen, ne wen se yóm alì minggel boohen boluyen insinsu ne mira.

<sup>12</sup> Bè yóm kulék le, tolóng ne lan lolò le, abay se bud wen hekna Dwata kul anì là bud le mlan bù Hirod sok le mulék.

### Klóy le ebè Idyip le Jusif

<sup>13</sup> Yóm kogol le mulék yó kem tau hulung hménég blotik yó, wen bud hógów Dwata gu bù longit bud hegfan bù kna Jusif, monen mò du, "Ó Jusif,

btiki ne, géhél nwitem yóm ngà lewu le yéen etu bù Idyip. Tódô ye na nô ditu efet kól bù yóm bud khuléku kuy edini, yakà angat hfebel Hirod du yóm ngà anì hfatayen."

<sup>14</sup> Tahu se, btik Jusif, ne kendel nwiten yóm ngà lewu le yéen, ne tódô le kem mógów kifu etu bù Idyip.

<sup>15</sup> Ngang le nô bù yó efet matay Hirod. Ni se deng kdohoén yóm tehe mon Dwata bù Sulaten, hlanen bù yóm sotu tehe gna tugoden ekni, yóm monen, "Tnabahu yóm Ngau anì mulék gu bù Idyip."

### Kehfatay Hirod yó kem ngà

<sup>16</sup> Timbow dilô Hirod yóm deng kegsukaten bù yó kem tau hulung hménég kógów blotik, ya tey sidek kebuten. Yó nmoen, gotu hfatayen kdéen ngà logi tolo udì bù Bitlihim ne yó kem dumu benwu hmilol bù yó. Lemwót bù yóm ngà logi tolo hulô efet kól bù yóm ngà logi deng lewu halayen, gotu hfatayen lu. Deng eles nsóhen yóm deng kegenen sut yóm blotik lemwót bù yóm ktulón le du du yó kem tau hulung hménég kógów blotik.

<sup>17</sup> Bè yóm nmò Hirod yó, deng gónón dohò yóm tehe tulón yóm sotu tehe gna tugod Dwata ekni boluyen Jirimaya, yóm monen,

<sup>18</sup> "Wen tey dmumu mkik bù yóm benwu boluyen Rama.

Anì monem dnumu nkik Rakél kem ngaen ne là kô wen gembek mifa du, abay se, deng le gotu matay yó kem ngaen."\*

### Bud kesfulek le Jusif ebè Nasarit

<sup>19</sup> Timbow deng matay Hirod, wen bud hógów Dwata gu bù longit na a hegfan bù kna Jusif ditu bù Idyip, monen mò du,

<sup>20</sup> "Ó Jusif, btiki ne, nwitem mulék yóm ngà lewu le yéen ebè yóm kuy benwu bù Israél. Deng le gotu matay ne yó kem tau tehe tò hmatay du yóm ngà."

\* 2:6 Mika 5:2. 2 Samwél 5:2. \* 2:18 Jirimaya 31:15.

<sup>21</sup> Tahu se, btik Jusif, nwiten yóm ngà lewu le yéen, mulék le ebè Israél.

<sup>22</sup> Timbow gungol Jusif, yóm ngà Hirod boluyen Arkilus tles mogot bë prubinsya Judiya, yó góno Jusif likò bud nô bë yó. Bud hekna Dwata ke Jusif anì hlós ebè prubinsya Galili.

<sup>23</sup> Tahu se, ne bë yó góno le nô bë yóm sotu benwu udì boluyen Nasarit. Ni se deng gónon dohò yóm tehe mon yó kem tehe gna tugod Dwata ekni, yóm mon le, "Angat boluy le du tau lemwoùt bë Nasarit."

### 3

*Ktolok yóm Jan gel mabtays*  
(Mark 1:1-8; Luk 3:1-18; Jan 1:19-28)

<sup>1</sup> Bè yóm kdaw yó, sut yóm sotu tau boluyen Jan gel mabtays ditu bë yóm benwu laen hol tau menwu du bë prubinsya Judiya. Yó nmoen, gel hetngónen yóm Udél Dwata bë yó kem tau, yó monen mò kul,

<sup>2</sup> "Hegsel ye ne, knogol ye ne yó kem sidek gel nmò ye, yakà móyónen hto ne yóm buteng Dwata mogot tau."

<sup>3</sup> Nim Jan ni, du se gónon e gbak yóm mon yóm sotu tehe gna tugod Dwata ekni boluyen Isaya, yó monen, "Wen sotu tau tmaba gu bë tum benwu laen hol tau menwu du. Yó utóm tabahen, monen, 'Eles hen-gifat ye yóm lan angat lolò yóm góno tekuy mogot. Eles hentedeng ye yóm lan mò loloen.'"<sup>\*</sup>

<sup>4</sup> Nim Jan ni, yó nesen nmò le lemwoùt gu bë bul kamél ne yó hiletén kulit ógóf ne són tlangas ne tneb gel kenén.

<sup>5</sup> Tey dê tau tendo gel mógoù ebéléen na le e hnungol yóm gel toloken. Wen se lemwoùt bë syudad Jirusalim, ne wen se gu bë klaman-gen prubinsya Judiya, ne wen se lemwoùt bë kem benwu hmilol yóm él Jurdan.

<sup>6</sup> Ni kem tau ni, gotu benkas tulón le ke Jan yó kem salà le, ne bnabtays Jan lu bë yóm él Jurdan.

\* 3:3 Isaya 40:3.

<sup>7</sup> Timbow ton Jan yóm kógów le ebéléen yó kem Farisi dalang se yó kem Sadyusi na le e tò hbabtays béléen, tódô monen mò kul, "Ya nim yu, hol ye mkél bë ulal, gel henlóyen ofi. Iló ofo kuy ke tò ye gewà lemen yóm angat tafak Dwata tau ke olo ye hbabtays.

<sup>8</sup> Ke deng knogol ye yó kem sidek gel nmò ye, hol hdilô ye bë kmò ye dé.

<sup>9</sup> Ne bë ye abay tò ken-gel nawa yó dum kesfu ye gu bë yóm tehe Abraham ke yó tò lan ye gewà. Tódô tulónu kuy, balù ni he kem botu ni dé, botong gbek Dwata hembaling du tau mò semfu gu bë Abraham.

<sup>10</sup> Ke hlingónu du yóm móyón ktafak Dwata kuy, hol lómón ke beyung deng eles mléd lem but yó kem koyu mò angat sfeken kul. Ket koyu ke là gulit kbunguhen, angat senfeken, ne tódô tudà elem ofi."

<sup>11</sup> "Bélén do," mon Jan, "él gel babtaysu kuy mò ilô yóm deng kehegsel ye. Okóm yóm huli do, yó kun kmò kbabtays yó kem tau mimón béléen, suen bélén le yóm Tulus Dwata. Bong yó kem tau là mimón le, ofi moen kul. Yóm tau huli do yó, tey mfasang sentahu. Là kóe knoón baluen ke heseka béléen.

<sup>12</sup> Hol lómón ke eles mit teef mò teefen yóm angat knusuhen. Ne gotu otunen eta fol yó kem usoken. Lemwoùt yóm kafahen tódô ntemen bë yóm ofi laen kô dù tul katayen."

*Kehbabtays Jisas ke Jan*  
(Mark 1:9-11; Luk 3:21,22)

<sup>13</sup> Bè yóm tolo lel Jan mabtays bë él Jurdan, sut béléen Jisas lemwoùt gu bë prubinsya Galili. Yó nógówen, nan e hbabtays ke Jan.

<sup>14</sup> Okóm mom yó balà Jan du, monen, "Béi mom hbabtays bélén, ou dé bnabtaysem."

<sup>15</sup> Bnalà Jisas se, monen, "Kendolen ne. Hyu ke gotu nmò te yóm kójô Dwata bélén te." Tahu se, bnabtays Jan Jisas.

<sup>16</sup> Timbow hahun gu lem él Jisas, tódô henmungen hnas bë longit, ne

tódô tonen se yóm Tulus Dwata htuntun etahen gu bè longit, hol lómó kmoen obun, ne tódô mdef béléen.

<sup>17</sup> Ne ominen wen mudél gu bè longit, monen, “Ni se hol dou Ngà tendo gónón nô nawahu. Tey kligalu béléen.”

## 4

### *Ktilów Seitan ke Jisas (Mark 1:12,13; Luk 4:1-13)*

<sup>1</sup> Bè yóm deng kehbabtays Jisas, omin yóm Tulus Dwata mit du etu bè yóm benwu laen dù tau menwu du. Ditu gónó Seitan tendo tō tmilów du.

<sup>2</sup> Botong fat folò buteng Jisas là mken, ya tey sidek kbitilen.

<sup>3</sup> Tódô sut béléen Seitan, ne monen mó du, “Ke tahu uu Ngà Dwata, henbalingem ken kun ni kem botu nii.”

<sup>4</sup> Okóm yó balà Jisas du, monen, “Là kô yó du! Igoen deng mon du bè Sulat Dwata, ‘Là són du ken gónón mowil tau, okóm bè kdê yóm Udél Dwata se tahu hlowil du.’ ”\*

<sup>5</sup> Omin Seitan bud mit ke Jisas ebè Jirusalim. Nitén ebè yóm hol gónón geta te ketef bè Gónô Dwata.

<sup>6</sup> Ne ominen mon du, “Ke tahuhi Ngà Dwata, kmóhi lemwót bè ni kun, yakà sem deng monen du bè Sulat Dwata, monen, ‘Angat dók Dwata yó kem hógówen gu bè longit  
mò na a smegef kóm anì là tódóen bè botu tihem.’ ”\*

<sup>7</sup> Bnalà Jisas se, monen, “Tahu se yóm monem yó, okóm wen sotu bud monen bè Sulat Dwata, monen, ‘Béem tnilów Dwata, yóm gónóhem mogot.’ ”\*

<sup>8</sup> Omin Seitan bud mit ke Jisas eta tfusù yóm tey bulul geta, ne gotu toloken du kdê yó kem benwu talak tonok ne yóm tey kehyuh.

<sup>9</sup> Mon Seitan mò ke Jisas, “Gotu hogotu kóm yóm kdéen ni, syan ke mtudi bukol bè soluhu, ne ke béléu gónóm kmulu.”

<sup>10</sup> Bnalà Jisas se, monen, “Mdóhi bè ni, Seitan! Yakà deng monen du bè Sulat Dwata, ‘Béem tnilów Dwata yóm gónóm mogot ne són du hol nimónem.’ ”\*

<sup>11</sup> Tahu se, tódô tnagak Seitan Jisas, ne sen-gengen se wen hógów Dwata gu bè longit gdek bè yó mó tmóbóng du.

### *Kbut Jisas tmolok bè prubinsya Galili (Mark 1:14,15; Luk 4:14,15)*

<sup>12</sup> Sotu kdaw bè yó gefet bè Jisas yóm deng kehblanggù Hirod ke Jan. Bè yóm kungolen du, tódô mulék ebè prubinsya Galili.

<sup>13</sup> Hlós ebè kun benwu bè Nasarit, okóm là meneken bè yó. Bud hlós ebè Kapérnaum, ditu gónóhen hol nô. Nim Kapérnaum ni, sotu benwu bè kilil Lanaw Galili, glem lem yóm kul tehe tonok le Sibulun ne Naftali.

<sup>14</sup> Bè yóm knô Jisas bè yó, deng gónón dohò yóm tehe udél Isaya ekni, yóm sotu tehe gna tugod Dwata, yóm monen,

<sup>15</sup> “Yóm kun tonok tehe Sibulun, ne kun tonok tehe Naftali,  
kem benwu hnálañ lan ebè mo-hin, benwu nô fatu yóm él Jur-dan,  
hono benwu glem lem Galili, ne  
hono kem tau là Ju le nô du.

<sup>16</sup> Hol lómón ke tau le nô lem gónón kmifu, okóm angat wen tey layag ton le.  
Deng le golu elem hatay, okóm angat hlayagen ebélê le yóm layag yó.”\*

<sup>17</sup> Nbuten bè yó ne, tmolok Jisas. Yó gel monen, “Hegsel ye ne, knogol ye yó kem sidek gel nmò ye, yakà móyónen hto ne yóm buteng Dwata mogot tau.”

### *Kélék Jisas yóm tanay tau mó lemolò du (Mark 1:16-20; Luk 5:1-11)*

<sup>18</sup> Sotu kdaw bè yó yóm igò Jisas mentad ebè Lanaw Galili, tonen yó kem lewu tau setwoli hmuket le:

\* <sup>4:4</sup> Hlau 8:3. \* <sup>4:6</sup> Lingón 91:11,12. \* <sup>4:7</sup> Hlau 6:16. \* <sup>4:10</sup> Hlau 6:13. \* <sup>4:16</sup> Isaya 9:1,2.

Simun boluy yóm sotuhen, yóm gel bnoluy le Pitér ne Andru, yóm twoli-hen. Yó se kul sana gel nmò hmuket.

<sup>19</sup> Tódô mon Jisas mò kul, “Ó kem tau hmuket, mung ye do ne. Wen tles hmou kuy, hebelu yu tau mò lemolò do.”

<sup>20</sup> Tahu se, kendel tódô tebel le huket le, ne mung le ke Jisas.

<sup>21</sup> Ngang le bud móglow efet bud ton Jisas yó kem lewu tau setwoli, boluy le Jim ne Jan, hono ngà Sibidi. Tolo le nô lem ówóng le, mung kul mà le. Yó nmò le, bneteng le yó kem ksê huket le. Yóm kton Jisas kul, tódô tnabahen lu.

<sup>22</sup> Tahu se, tódô tagak le bè yó yóm ówóng le ne mà le, mung le ke Jisas.

### *Kkó Jisas yó kem des*

(Luk 6:17-19)

<sup>23</sup> Kewót Jisas bè yó, tódô lenngeben prubinsya Galili. Yó nmoen, gel tmolok bè yó kem kul gónó le gel stifun yó kem Ju. Hetngónen kul yóm Tulón Hyu gbak ebè kun kogot tau Dwata, lelen gel hkó des yó kem tau, balù kihu kay des le.

<sup>24</sup> Deng tódô tfengen ebè klaman-gen prubinsya Sirya gónó le mungol du yóm nmò Jisas. Yó gónóm mon, gotu nwit le ebè Jisas kdê yó kem tau gemnóm des, yó kem tau semlaw kkólen bè yó kem tau lengel mata, ne yó kem tau snidaf, ne yó kem tau matay sfu lówó le, gotu hkó Jisas des le.

<sup>25</sup> Ya tey tau wen lemolò du lemwo-gu bè klamangen Galili ne bè klamangen yóm benwu bnoluy le Sfolò Benwu, ne bè syudad Jirusalim, ne bè klamangen Judiya ne yó kem dumu benwu sentu él Jurdan.

## 5

### *Ktolok Jisas*

(Luk 6:20-23)

<sup>1</sup> Timbow ton Jisas yó kem tey tau wen, ominen mneged ete yóm sotu bulul udì ne bè yó gónón myón. Gotu le sbung e klohoken yó kem tau gel lemolò du,

<sup>2</sup> ominen mbut tmolok kul, monen,

<sup>3</sup> “Tey kehyuhen bélê le kul yó kem tau ke dilô le yóm kwen gónó le élél bè kehtahu le, abay se deng le sana gmung ne bè yó kem tau nogot Dwata.

<sup>4</sup> Tey kehyuhen bélê le kul yó kem tau ke wen lenangag le, abay se Dwata angat mifa kul.

<sup>5</sup> Tey kehyuhen bélê le kul yó kem tau ke là hegeta le knô le bè kem dumu le, abay se angat guta le yóm deng fasad Dwata kul.

<sup>6</sup> Tey kehyuhen bélê le kul yó kem tau ke hol nô bè nawa le mò du yóm kun kóyô Dwata, abay se Dwata angat hol hegseñ-gel nawa le.

<sup>7</sup> Tey kehyuhen bélê le kul yó kem tau ke hol knodu le kem dumu le, abay se angat bud knodu Dwata lu se kul.

<sup>8</sup> Tey kehyuhen bélê le kul yó kem tau ke laen dù belenen yóm keh-de-m le, abay se angat ton le Dwata.

<sup>9</sup> Tey kehyuhen bélê le kul yó kem tau ke hulung le semfyu kem dumu le, abay se angat bnoluy Dwata lu kem kun ngà.

<sup>10</sup> Tey kehyuhen bélê le kul yó kem tau ke hensidek le lu lemwo-t bè yóm kimón le ke Dwata, abay se deng le gmung ne bè yó kem tau nogot Dwata.

<sup>11</sup> Tey kehyuhen bélê ye,” mon Jisas, “ke henné le yu, ne ke hensidek le yu, ne ke dé sidek udél le eta ye lemwo-t bè yóm klolò ye do.

<sup>12</sup> Hol hnigal ye dé ke lómón yó kmò le kuy, abay se deng wen tey ofol deng eles fan Dwata kuy bè longit. Yóm kegrayam ye yó, hol lómón sem yó ne yóm tehe kul kegrayam yó kem tehe gna tugod Dwata ekni.”

### *Yóm hlingón bè kahì ne layag (Mark 9:50; Luk 14:34,35)*

<sup>13</sup> Bud mon Jisas, “Yu kem tau lemolò do, hol lómón ke yu yóm kahì bè yó kem tau. Bede yóm kahì kesok deng mkó yóm khééten, là kô wen

lanem bud hféét du ne. Laen kô bud muhen, tódô bot ne sensdà yó kem tau mógów.

<sup>14</sup> Ne sotuhen, hol lómón ke yu yóm layag bë klamangen benwu. Yóm syudad nô ta bulul, laen kô dù gónón gseng.

<sup>15</sup> Laen se kô tau hemtom solok ke telek mom bud hnokoben. Kaem yó dé kmoen du, suen bë gónón mfatu anì lemayag ebè kdéen tau lem gónô.

<sup>16</sup> Yake lómón yó se gel kmò ye bë yóm kuy layag. Hol nmò ye yóm hyu anì ton kem dumu tau, ne anì dóyón le yóm Mà tekuy bë longit.”

### *Bud henblat Jisas yó kem tehe hlau Musis*

<sup>17</sup> Bud mon Jisas, “Bê ye tô hendum ke yó hendufu edini naw e kó yó kem tehe hlau Musis ne yó kem tehe gel tolok yó kem gna tugod Dwata. Là kô yó du. Là kô kóhu kul. Nim nógówu edini ni, naw e dnohò yó kem deng tehe eles tolok le yó.

<sup>18</sup> Tódô tulónu kuy ktahuhen, bë yóm igoen tolo wen longit ne tonok, laen se kô mkó du yó kem tehe hlau Musis, balù sotu bë yó kem leneken, efet deng gotu dohò yó kem kdé tulónen.

<sup>19</sup> Duhen yó, ke wen tau mulé du yó kem hlau yó, balù yó kem olo leneken, ne ke deng mom bud niten kem dumuhen tau mulé du, du se yóm hol glaan bë yó kem tau nogot Dwata bë longit. Okóm yóm tau mimón du yó kem hlau yó, ne lelen tmolok du bë yó kem dumun anì nimón le se kul, angat geta boluyen lem blóng yó kem tau nogot Dwata bë longit yóm tau yó.

<sup>20</sup> Tódô tulónu kuy,” mon Jisas, “song ye gmung bë yó kem tau nogot Dwata bë longit ke hol ye hgulit lemólò du yóm kun kóyô Dwata senta yóm kul kgulit yó kem tau tmolok hlau ne yó kem Farisi.”

### *Bè keseflifót*

<sup>21</sup> “Deng hónô gungol ye se,” mon Jisas, “yóm sana hlau gnan, yóm monen, ‘Béí abay monok. Yóm tau monok, sal gel nwit le bë kukum.’

<sup>22</sup> Okóm ni dou tulón kuy, yóm tau ke lenbuten kem dumuhen, angat nwit le bë kukum. Yóm tau ke monen bë yóm dumuhen, ‘Laen dù muhem tau kóm,’ angat nwit le ebè yóm tau gel hemdeng knukum yóm tau yó. Ne yóm tau ke monen bë yóm dumun, ‘Nungeli. Laen dù muhem tau,’ deng golu elem lanaw ofi ne yóm tau mudél yó.

<sup>23</sup> Yó gónóm mon, ke wen dsuem ebè Dwata, anien ke dengi kól bë yóm gónóhem demsù, okóm ke gtulón bë nawahem wen gónóm seglius bë dumum tau,

<sup>24</sup> nam na hlun tebel bë yó yóm dsuem, kendeli lemwót, mnihi seflifót bë yóm dumuhem seglius yó. Sok deng, ominem yó mulék nam e henfu demsù ebè Dwata.

<sup>25</sup> Sotuhen,” mon Jisas, “ke wen tau kmamo kóm, ne tô nwiten u bë yóm gónô skukum, tnanahi mit sefyu béléen gu laanen là deng gefet bë yó. Abay se ke dengi kól bë yó, ngem kà nwiten kóm ebè yóm tau gel fen hemdeng kmukum kuy. Ne lemwót kun, blayen u bë fulis mò bmanggù kóm.

<sup>26</sup> Tódô tulónu kóm ktahuhen, là kói na a gewà ke là nam gotu gbayad du yóm salaem.”

### *Ketgamayóm sindil*

<sup>27</sup> “Deng hónô gungol ye,” mon Jisas, “yóm sana hlau gnan, yóm monen, ‘Béem ndà yehenem.’

<sup>28</sup> Okóm ni dou tulón kuy, balù bë olo ketngelem ebè yóm libun ke wen óyóem du gu lem, deng timbang snamukem ne, abay se deng deng bë yóm kehedemem du.

<sup>29</sup> Yó gónóm mon, ke mata kwananem mit kóm mò salà, tódô lensitem ne tudaem. Mom hyu béléem he ke lana sotu matahem olo ke nwiten u elem lanaw ofi.

<sup>30</sup> Sotun, ke sigel kwananem mit kóm mò salà, tódô kenlengem ne tudaem. Mom hyu béléem he ke lana

sotu sigelem olo ke nwiten u elem lanaw ofi."

*Bè keskó tau syehen  
(Matyu 19:9; Mark 10:11,12; Luk 16:18)*

<sup>31</sup> “Bud sotun,” mon Jisas, “monen bè yóm sana hlau gnan, ‘Ke móyô skó bè yehenen yóm logi, hyu ke wen gónón fema mò ilô yóm deng kkóhen du.’

<sup>32</sup> Okóm yóm dou tulón kuy, là hyuhen yóm logi ke tódô kóhen yóm yehenen igoen là mdà du. Ke bud myehen dumu logi yóm libun yó, deng mdà yehen se kun, okóm yóm logi gna yehenen, du buten yóm kegsalaen. Ne yóm logi bud myehen du yóm libun yó, bud salaen bè Dwata se kun.”

### *Bè ksafà*

<sup>33</sup> “Ne sotun,” mon Jisas, “deng hónô gungol ye yóm sotu hlau gnan tehe gel hlau yó kem fù tekuy, yóm monen, ‘Ke wen deng fasadem bè Dwata, ne wen safà mung du, hol dnohoem.’

<sup>34</sup> Okóm ni dou bud tulón kuy, ke wen fasad ye, bè ye smafà. Bè ye abay safà longit, abay se bè yó gónó Dwata nô,

<sup>35</sup> duhen ke tonok, abay se bè yó gónó Dwata hmótól tihen, duhen ke Jirusalim, abay se yó kun benwu yóm Dwata hol geta bè kdéen.

<sup>36</sup> Ne bè ye abay tó safà kulu ye, yakem gbek ye se hbukay du duhen hitem du balù sbalu bè yó kem wek ye.

<sup>37</sup> Tódô hen-el ye ke tahu, ne tódô mon ye ‘là’ ke là se tahuhen. Abay se ke mò ye safà, Seitan gónón gu lemwót yóm yó.”

### *Bè kbeles (Luk 6:29,30)*

<sup>38</sup> “Sotuhen,” mon Jisas, “deng hónô gungol ye yóm sotu hlau gnan, yóm monen, ‘Ke wen hemsidek yóm kóm mata, tódô bud hensidekem se yóm kun mata. Ne ke wen tau temfok yóm kóm ngihi, tódô bud tenfokem se yóm kun ngihi.’

<sup>39</sup> Okóm ni bud dou tulón kuy, bè te abay bneles ke wen hemsidek tekuy. Mom yó nmò tekuy, ke wen temfê kut bè hifi te, bud bayà te du dolihen.

<sup>40</sup> Ne ke wen mtuk tekuy, ne yó nójóen sotu kgal te, bud tennù tekuy sotu kgal sen.

<sup>41</sup> Ne ke wen sendalù gmaga kut mit yóm kun nwit bè sotu kilumitru, tódô nwit tekuy béléen bè lewu kilumitru sen.

<sup>42</sup> Ke wen tau mni bélê tekuy, benlay te. Ne ke wen tau tó mdóm bélê tekuy, hendóm te sen.”

*Kenbong tekuy nawa yó kem hmon tekuy  
(Luk 6:27,28, 32-36)*

<sup>43</sup> “Ne sotun,” mon Jisas, “deng hónô gungol ye yóm sotu hlau gnan, yóm monen, ‘Kenbong nawahem yó kem dumuhem ne fen knutó nawa-hem yó kem hmohon kóm.’

<sup>44</sup> Okóm ni dou tulón kuy, kenbong nawa te yó kem hmohon tekuy ne hni te lu bè Dwata yó kem hemsidek tekuy,

<sup>45</sup> anì mkél tekuy bè yóm kut Mâ bè longit. Ngem se kun, tódô gel homong hnóngen yóm kdaw ebè yó kem tau sidek nmò le. Senged se bè yóm kulón, là són du bè yó kem tau tedeng kmò le gónó Dwata hkulón du. Gomong snéen yó kem tau là tedeng kmò le.

<sup>46</sup> Bè ye abay tó hendón ke wen ofol blay Dwata kuy ke són yó olo kenbong nawa ye, són yó kem tau kembong nawa kuy. Balù yó he kem tau gel mtuk bwis, sana kul kesbong nawa se kul.

<sup>47</sup> Laen kô dù kayen yóm kuy kmò ke són yó hnódó ye, són yó kem hol kuy wè. Balù yó he kem tau là setngón ke Dwata, sana kul kesfódó se kul.

<sup>48</sup> Yó gónóm mon, hol ye hgulit, lómón kgulit yóm Mâ tekuy bè longit.”

## 6

### *Kmò któbóng tekuy kem tau élél*

<sup>1</sup> “Ten-gama ye,” mon Jisas, “anì là olo ye hegfan du bè gónón wen yóm gel keblay ye ebè Dwata. Ke yó olo tó

mu ye du yóm gel keblay ye mò góñó ye megdóyón bë góñón wen, angat laen kô dù ofol blayen kuy yóm Mà tekuy bë longit.

<sup>2</sup> Duhen yó, ke wen blay ye bë yóm tau élél, bê ye abay hegfan lómón yóm kul gel nmò yó kem tau hemtedeng knô. Tey gel kehegfan le du bë góñó le gel stiful ne gu bë lan bë góñón wen. Yó góñó le gel mò du anì dójón tau lu. Tódô tulónu kuy ktahuhen, deng gotu guta le ne kul ofol yó kem tau yó bë yóm kdóyón tau kul.

<sup>3</sup> Okóm ke tnóbóng ye yóm tau élél, bê ye abay hetngón, balù bë yóm hol dumuhem swè,

<sup>4</sup> anì laen dù dumu tau temngón du. Ne yóm Mà tekuy bë longit, gotu tonen yóm là kehetngón ye du yó, ne du he angat bemlay kuy ofol.

### *Ktolok Jisas kul mni bë Dwata (Luk 11:2-4)*

<sup>5</sup> Ke mni ye bë Dwata,” mon Jisas, “bê ye dnalang kul kmò yó kem tau hemtedeng knô. Tey le móyô mdà mni bë Dwata lem góñó le gel stiful ne gu bë kilil lan bë góñón wen anì ton tau lu. Tódô tulónu kuy ktahuhen, deng gotu guta le ne kul ofol yó kem tau yó bë yóm kdóyón tau kul.

<sup>6</sup> Okóm bélê ye kuy, ke mni ye bë Dwata, ditu lem dfél ye góñó ye mò du, ne hyu tniukeb ye beng ye, ne mni ye bë yóm Mà tekuy bë longit, yóm là ton mata du. Ne yóm Mà tekuy yó, tódô tonen yóm là kehetngón ye du bë dumu tau, ne du he angat bemlay kuy ofol.

<sup>7</sup> Bë yóm kni ye, omin he ke alì sensulit ye udél ye lómón yóm kul gel nmò yó kem tau hemtahu bë yóm dwata kéng. Ofo kul ke yó góñón hmungol kul yóm kul dwata ke bë yóm ktahà kni le.

<sup>8</sup> Bê ye dnalang yóm kul nmò yó. Kaem deng eles tngón yóm Mà tekuy bë longit yóm wen mu tekuy du gu laan tekuy là deng mni du béléen.

<sup>9</sup> Duhen yó, ke mni ye bë Dwata, ni dé kmò ye du, mon ye,

‘Mà me bë longit, kóyô me ke kdéen tau hol madat yóm kóm boluy.

<sup>10</sup> Kóyô me ke géhél nogotem yóm klamangen.

Kóyô me ke hol nmò me te tonok yóm kóm kóyô, lómón yóm gel kmò le du dyó bë longit.

<sup>11</sup> Benlayem mi sfeng ken me ket haya.

<sup>12</sup> Hol hnifótum kum kem salà me, lómón yóm gel kehlifót me yó kem tau gemsalà bélê me.

<sup>13</sup> Béem bayà mi ebè yóm tilów mgel, bede hol kenlungem mi bë Seitan.’

<sup>14</sup> Ke hnifót ye salà yó kem gemsalà bélê ye, hnifót yóm Mà tekuy bë longit snéen yóm kuy salà.

<sup>15</sup> Okóm ke là hnifót ye kul, là se hnifót Mà tekuy du bë longit yóm kuy salà.”

### *Kmò kfasting*

<sup>16</sup> “Bè yóm gel kfasting ye,” mon Jisas, “bê ye dnalang yóm kul kmò yó kem tau hemtedeng knô. Là kô le hgifat anì dilô tau bélê le yóm kfasting le. Tódô tulónu kuy ktahuhen, deng gotu guta le ne kul ofol yó kem tau yó bë yóm kdóyón tau kul.

<sup>17</sup> Okóm bélê ye kuy, ke gel ye fasting, hyu ke gel ye hgifat mouf ne semwat

<sup>18</sup> anì là dilô tau du bélê ye yóm kmò ye du. Tek són Dwata dé temngón du, yóm Mà tekuy bë longit, yóm là ton mata du. Tódô tonen yóm là kehetngón ye du bë kem dumu tau, ne du he angat bemlay kuy ofol.

### *Yóm kendengen bë longit (Luk 12:33,34)*

<sup>19</sup> Bê ye kat alì henyu te tonok yóm kendengen ye. Ke bë yó góñó ye hemyu du, gbek kaba hemsidek du, ne nkê fak snéen yó kem dumuhem, ne gbek tau mnagaw husek elemen.

<sup>20</sup> Ni dé nmò ye, henyu ye bë longit dé yóm kendengen ye. Abay se ke ditu góñó ye hemyu du, laen kô dù kaba gembek hemsidek du, ne là kóen nkê fak, ne laen dù hemnagaw du.

<sup>21</sup> Yó se gónón nô kendengen ye, yó se gónón nô nawa ye."

*Yóm henged solok lówó  
(Luk 11:34-36)*

<sup>22</sup> "Yóm mata ye," mon Jisas, "hol henged solok lówó ye. Ke hyu mata ye, hol lómón ke lemayag lem lówó ye.

<sup>23</sup> Okóm ke là hyu yóm mata ye, hol lómón ke kmifu lem lówó ye. Hol tengama ye, déke laen dù layagen yóm lem lówó ye. Ke yó se kmoen, ya tey kget kifuhen."

*Bê tekuy tnafa nawa kmò klowil tekuy*

*(Luk 16:13; 12:22-31)*

<sup>24</sup> "Laen dù tau," mon Jisas, "ke lewu tau gónón mamo segeng gónón mò nmò. Déke mtukul knutó nawahen, ne mtukul se kenbong nawahen. Déke mtukul fen nimónen, ne mtukul se fen sen-gilen. Dalang se kuy," mon Jisas, "ke són filak ktes ye, là kô gbek ye mimón ke Dwata.

<sup>25</sup> Yó gónóhu mon du mò kuy," mon Jisas, "bê ye abay tnafa nawa yóm kmò kken ye, ne yóm kmò kinum ye, duhen ke kmò knes ye. Sélét mom kken ye ne là gbek Dwata du, anì sem klowil ye du, Dwata tehe mò du. Ne sélét mom knes ye ne là gbek Dwata du, anì sem lówó ye yó du, Dwata tehe mò du.

<sup>26</sup> Tenngel ye dé yó kem onuk koyu. Laen kô hulu le, ne laen se kô dù bang nuta le, ne laen se kô dù fol le. Bede tódô wen gel htukóen kul yóm Mà tekuy bè longit. Milud he yó dum kuy, igoen bong kuy mu senta yó kem onuk koyu.

<sup>27</sup> Laen dù tau ke gbeken tódô htahà du udì ktauhen lemwót bè alì ktafa nawahen klowilen.

<sup>28</sup> Ne moen de ke lenóngón ye nawa yóm kmò knes ye? Tenngel ye dé yó kem bulók lem bnes. Là kô le mò nmò kul, ne là se kô le mewel mò nes le.

<sup>29</sup> Okóm tódô tulónu kuy, balù yó hem alì kun kegeta Selumun ekni, ne yóm alì kwen kendengenen, ne yóm alì keklóón yó kem nes gel leseken, là kô nan e gsenged du yóm kul keklóón yó kem bulók.

<sup>30</sup> Là kóen tahà se kul klowil yó kem bulók, olo le sut nim kdaw ni, ne bud le menes elem haya, ne tódô bot lu elem ofi. Ke minggel kmò Dwata kul yó kem bulók balù yóm tey kukol klowil le, mom milud he knesen kuy. Tey udì kehtahu ye nim yu.

<sup>31</sup> Duhen yó, bê ye abay tnafa nawa yóm kmò kken ye ne yóm kmò kinum ye ne yóm kmò knes ye.

<sup>32</sup> Ni se gel tnafa nawa yó kem tau là deng temngón ke Dwata. Okóm yóm Mà tekuy bè longit, deng eles tngónen yóm kwen mu ye du ni kem ni.

<sup>33</sup> Ni dé hol nmò ye. Hol hogot ye ke Dwata klowil ye, ne hol nmò ye yóm gel hmoen kuy. Ke yó se nmò ye, Dwata he angat bemlay du kuy yó kem kdê wen mu ye du.

<sup>34</sup> Duhen yó, bê ye tnafa nawa yóm elem haya. Yó he kehedem ye du yóm yó ke deng bangen sut bélè ye. Ke gel tnafa nawa ye yóm elem haya, olo ye mom bud temnù yó kem mgel deng gel sut bélè ye ket haya."

## 7

*Bê tódô gel hendeng kun kmò sotu tau*

*(Luk 6:37,38, 41,42)*

<sup>1</sup> "Bê ye tódô hendeng kul kmò kem dumu ye tau," mon Jisas, "anì là hendeng Dwata du se yóm kuy kmò.

<sup>2</sup> Bè yóm gel kmò kehedeng ye yóm kul kmò kem dumu ye, bud lómón yó se angat kmò kehedeng Dwata du yóm kuy kmò. Yó se nmò ye bè yó kem dumu ye, bud yó se angat nmò Dwata bélè ye.

<sup>3</sup> Moen se ke snolò tenngel ye huling kdumu ye igoen tolo wen bótóng geblekel lem yóm kuy mata?

<sup>4</sup> Tedu kmò kton ye mkó du yóm huling kem dumu ye ke tolo wen yóm bótóng geblekel lem yóm kuy mata?

<sup>5</sup> Yu kem tau hemtedeng knô. Na ye gna kó dé yóm tey geblekel lem yóm kuy mata anì hyu kton ye mkó du yóm huling kem dumu ye."

<sup>6</sup> Bud monen, "Bê ye duil tmulón yóm Udél Dwata bè yó kem tau gel hemnê du, lómón ke blay ye bè ohu

yóm kimu alì mebtes. Ngem kà mom nékéten kuy. Ne lómón ke blay ye bè sdô yóm ngom libun alì mebtes. Ngem kà gotu sninà ndaen du elem hitok."

*Bé là ktakas mni bè Dwata  
(Luk 11:9-13)*

<sup>7</sup> Bud mon Jisas, "Ke wen hni ye bè Dwata, angat guta ye. Ke wen hnebel ye, tódô ton ye. Ke mbal ye gu bak sut, tódô wen hotun kuy.

<sup>8</sup> Ket tau ke wen hnichen bè Dwata, gutahen. Ke wen hnebelén, tonen. Ke mbal gu bak sut, hotun Dwata.

<sup>9</sup> Kmoen se kuy du, yu kem tuha, ke mni mambang bélê ye yóm ngà ye, botu kô blay ye du?

<sup>10</sup> Duhen ke mni utón él, ulal kô blay ye du? Là kô yó du.

<sup>11</sup> Balù yóm kuy là kgulit," mon Jisas, "sana khulung ye bemlay kem ngà ye yóm hyu bélê le. Milud he yóm Mâ tekuy bè longit. Ke wen hni ye béléen, angat wen tey hyu blayen kuy.

<sup>12</sup> Yó se nójô ye nmò tau bélê ye, yó se kuy nmò bélê le. Ni se hol lemen yóm tehe hlau Musis dalang se yóm kul tolok yó kem gna tugod Dwata ekni."

*Yóm bak tikeb sikeb  
(Luk 13:24)*

<sup>13</sup> "Hol hnusek ye yóm bak tikeb sikeb, abay se yóm bak tikeb ebè yóm lanaw ofi, tey lamang, ne tey mahil yóm lan edu, ne tey tau wen lemolò du.

<sup>14</sup> Okóm tey sikeb yóm bak tikeb ebè yóm klowil laen dù sónen, ne tey mgel lemolò du yóm lan edu, ne là kóen hol wen tau mton du."

*Dilô bè kbunguhen yóm koyu  
(Luk 6:43,44)*

<sup>15</sup> "Hol ten-gama ye yó kem tau tódô lembù tmugod ke Dwata. Hol lómó ktonem kul, lómón ke ubiha. Okóm bè yóm kmò le, hol le mkél bè yó kem ohu dlag.

<sup>16</sup> Angat dilô ye lu bè kmò kekdol le. Hol lómón yóm hulu, sal gel dilô ye bè bungu le. Laen kô koyu semnual mungu soging. Ne laen se leteng mungu kmatì.

<sup>17</sup> Yóm koyu hyu, hyu se kbunguhen. Dalang se yóm koyu sidek, sidek se kbunguhen.

<sup>18</sup> Yóm koyu hyu, là kóen na a sidek kbunguhen. Dalang se yóm koyu sidek, là kóen na a hyu kbunguhen.

<sup>19</sup> Yóm koyu là hyu kbunguhen, tódônofok kmò du, ne tudà elem ofi.

<sup>20</sup> Yó gónóm mon, tódô dilô ye bè kmò kekdol le yó kem tau lembù tmugod ke Dwata."

*Yóm tau kenbê Jisas  
(Luk 13:25-27)*

<sup>21</sup> "Là kô kdéen du yó kem tau mon du ou yóm gónó le mogot, angat gmung bè yó kem tau nogot Dwata," mon Jisas. "Tek són olo gmung yó kem tau mimón yóm kun kóyô yóm Mâ bè longit.

<sup>22</sup> Kesok bangen hto yóm kdaw kkukum Dwata tau, angat tey dê tau mon du mò do, 'Ó Dwata, tehe gel hlan me bè kóm boluy yóm gel ktugod me ke Dwata. Bud hlan me bè kóm boluy se yóm tehe gel kehdó me kem tulus seitan, ne yóm tehe gel kmò me yó kem hentaw ton.'

<sup>23</sup> Okóm," mon Jisas, "angat monu mò kul, 'Là kô tngónu kuy. Hlayuk ye béléu, yu kem tau gel mò sidek.' "

*Yóm hlingón bè yó kem lewu tau hdà gónô  
(Luk 6:47-49)*

<sup>24</sup> "Duhen yó," mon Jisas, "yó se tau hmungol udélu, ne nimónen, hol lómón ke du yóm tau hulung hedem hemdà gónô te botu.

<sup>25</sup> Ne e demsù yóm tey kulón bong, ngangen ne dmunuk yóm él, ne mbel se yóm tey lenos bong. Tódô senloben yóm gónô yó, okóm là kô ghugónen du, abay se deng hdaen te botu.

<sup>26</sup> Okóm yóm tau hmungol udélu," mon Jisas, "ne là nimónen du, hol lómón ke du yóm tau là hulungen hedem, hemdà gónô talak helek.

<sup>27</sup> Ne e demsù tey kulón bong, ngangen ne dmunuk yóm él, ne mbel se yóm tey lenos bong, ne tódô senloben yóm gónô yó, ne tódô kendel hugón, ya tey sidek kegbaen."

<sup>28</sup> Yóm deng ktulón Jisas du kdê ni kem ni, tey kehtaw le du yó kem tau sbung,

<sup>29</sup> abay se là mkélen bè yóm kul ktolok yó kem tau gel tmolok hlau bélê le. Alì mfasang yóm kun ktolok Jisas.

## 8

### *Kkó Jisas yóm des mifù (Mark 1:40-45; Luk 5:12-16)*

<sup>1</sup> Timbow deng kól gu lem bulul Jisas bè yóm ktoloken ditu, tey tau bud muluk huli du.

<sup>2</sup> Wen tau gemnóm des mifù hloni ebéléen, ne tódô tuden bukolen bè soluhéen, ne hkodu béléen, monen mó du, “Ó Sér, ke yó dum móyói, kaem gbekem tódô hkó du nim desu ni.”

<sup>3</sup> Tahu se, na e nenok Jisas yóm tau yó, monen, “Móyóe tmóbóng kóm. Mkó ne desem.” Ne tahu se, tódô sen-gengen se mkó béléen yóm des mifù yóm tau yó.

<sup>4</sup> Mon Jisas mó du, “Hol béem abay tulón yóm deng nmou béléem ni. Tódói hekteng mógów ebè tum tau gel demsù ebè Dwata, nam e hetngel du lówóhem. Elesi se mit mó dsuem anì nmoem yóm sotu hlau Musis ekni mó góno le milô du kem dumu tau yóm deng kkó yóm desem.”

### *Kehtóbóngen bè Jisas yóm sotu tau kfitan lemwót bè Rom*

*(Luk 7:1-10)*

<sup>5</sup> Ngang Jisas mógów efet kól bè Kapérnaum. Wen sotu tau kfitan nô bè yó, tau lemwót gu bè Rom. Senlongen Jisas ne hkodu béléen,

<sup>6</sup> monen, “Ó Sér, wen sotu tau gel mó nmò béléu nô bè góno. Là buden dmemen doli lówóhen, ya tey sidek kegnómen du.”

<sup>7</sup> Mon Jisas se mó du, “Yó ne, mógówe edyó naw e hkó béléen yóm desen.”

<sup>8</sup> “Bê, Sér,” mon yóm kfitan yó koni. “Là knóónen ke tói motun bè dou góno, yakà tauhe lemwót bè Rom dou. Olom tódô hemwit udél ne, kaem tódô mkó he tum desen.

<sup>9</sup> Henknahu béléu se ke ou,” mon yóm kfitan. “Wen se kem tau geta sentahu gónohu kmulu, ne gel nimónu. Ne wen se kem sendalù dou nalak, ne sal gel nimón le o. Sok monu mó yóm sotu, ‘Tu ne,’ tahu se, tódô kendel lemwót. Dalang se ke monu, ‘Géhéli,’ tódô kendel sut. Sok monu bè yóm heseku, ‘Nmoem nii,’ yó se tódô nmoen.”

<sup>10</sup> Timbow gungol Jisas nim mon nim kfitan ni, tey kehtawen du, ne monen mó yó kem tau gel lemolò du, “Tódô tulónu kuy ktahuhen. Laen dù tau tonu bè klamangen Israél ke lómón ni hol kehtahuhen béléu.”

<sup>11</sup> Ni tódô tulónu kuy. Bè yóm mó ken bong angat nmò Dwata bè longit bè yó kem tau nogoten, angat tey dê tau là Ju le lemwót fi gu dmata kdaw ne fi gu desdef, angat le gotu na a seyón mken bè tu kem tehe fù me Abraham ne Isak ne Jakub.

<sup>12</sup> Okóm yó kem Ju, yóm hol bak mfun du yóm kogot Dwata tau, là kô le gmung kul. Angat gotu tudà le lu ditu ebè yóm góno ali kmifu, ne bè yó tendo góno le heslaf dmumu mkik, ne sembhé kakim.”

<sup>13</sup> Ne bud beklil Jisas ebè yóm kfitan yó koni, monen mó du, “Muléki ne. Tonem bunguhen he yóm deng kehtahuhem.” Ne tahu se, tódô sen-gengen se mkó des yóm tau mó nmò bè yóm kfitan yó.

### *Kkó Jisas des yó kem tey tau wen (Mark 1:29-34; Luk 4:38-41)*

<sup>14</sup> Kewót Jisas bè yó, hlós ebè góno Pitér. Kól bè yó, tódô glohen tuón Pitér libun gemnóm des kinì là lembó.

<sup>15</sup> Omin Jisas na a mogot bè sigelen, ne tódô sen-gengen se mkó yóm tey des kinien. Ominen hlingsas btik, ne tódô kendel mó ken bè le Jisas.

<sup>16</sup> Timbow deng sdef kdaw, tey dê tau lengel mata nwit le ebè Jisas. Hanà tek olo udél Jisas ebélê le deng le sana gotu mdó yó kem tulus seitan malak kul. Kkólen bè yó kem des yó kem dumu tau, gotu hkó Jisas.

<sup>17</sup> Nim nmoen ni, deng gónohen dohò yóm tehe udél Isaya, yóm sotu

tehe gna tugod Dwata ekni, yóm monen, "Balù kihu des tekuy, gotu kóhen."

*Yó kem tau tō lemolò ke Jisas  
(Luk 9:57-62)*

**18** Bud sotu kdaw bè yó, ton Jisas yóm alì kwen tau sbung ebéléen, monen mò yó kem gel lemolò du, "Hlós tekuy ne efatu lanaw."

**19** Okóm wen sotu bè yó kem tau gel tmolok hlau sut béléen, monen mò ke Jisas, "Ó Sér, lolou uu balù kihu gónom e mógów."

**20** Mom yó balà Jisas du, monen, "Wen lefunge kul gel nulék yó kem bolos, ne mdengen kul sala yó kem onuk koyu, okóm yóm Ngà Tau, laen dù mdengen gónóhen hegnô."

**21** Bud wen sotu tau gel lemolò du mon du mò du, "Ó Sér, naw na lebeng mà he, ominu yó lemolò kóm."\*

**22** Mon Jisas se mò du, "Tódô hebengem tu he kem kun dumu là hemtahu yóm maem. Okóm fen, loloem ou kóm."

*Keteflok Jisas yóm lenos  
(Mark 4:35-41; Luk 8:22-25)*

**23** Kogolen bè yó, omin Jisas motun elem yóm ówóng, mung le du yó kem gel lemolò du.

**24** Bè yóm igò le mówóng talak lanaw, tódô mbel yóm tey lenos bong, ne botong tō glimun lewók yóm ówóng le. Okóm ke Jisas kun, deng mom fen tungô.

**25** Tódô le mógów ebéléen yó kem gel lemolò du na le e bentik, mon le mò du, "Ó Sér, tnóbóngem mi. Hatay tekuy ni."

**26** Bnalà Jisas se lu, monen, "Mò ye kat alì likò ni du? Tey udì yóm kehtahu ye." Ominen yó tódô hboluk btik, ne mudél ebè yóm lenos ne yóm tey lewók, monen, "Botongen ne." Ne tahu se, tódô sen-gengen se menek gu talak lanaw.

**27** Tey ketnga yó kem tau gel lemolò du, mon le, "Tau du de ni? Balù yóm

lenos ne yóm lewók, botong nimón le."

*Kehdó Jisas yó kem tulus seitan malak yóm lewu kem tau  
(Mark 5:1-20; Luk 8:26-39)*

**28** Timbow le gefet fatu lanaw bè benwu yó kem tau Girasin, wen lewu tau lengel mata semlong ke Jisas, lemwót le gu lem yóm kilib gónó le gel lembeng. Tey sidek klóbô le lemwót bè yó kem tulus seitan malak kul. Laen kô dù tau mlos gel mlan ebè yó.

**29** Timbow ton le Jisas ni kem lewu tau ni, ya tey sidek klangat le, mon le mò du, "Uu se Ngà Dwata. Tedu tō nmoem bélê me ni du? Nam e kendel tō tnafak mi kô gu laanen là deng hto yóm hol bantangem mò du?"

**30** Bè yóm kdaw yó, kulel se kul keswól bè yó yó kem tey sdô wen, bede geblà klayuken bélê le.

**31** Ne yó hol henkodu le bè Jisas yó kem tulus seitan yó koni, mon le mò du, "Ke yó hendufem nam e hdó mi, tódô hfusekem mi ebè tu ne kem sdô tuu."

**32** Tahu se, hlus Jisas lu. Uni le tmagak yó kem lewu tau yó koni, tódô le husek ebè tu kem sdô. Kewót le se kul yó kem tey sdô wen, gotu le sedlu mlóy mosol ebè tubaw kbu yóm lanaw, ne tódô le gotu gekmó elem lanaw, ne gotu le lemneb yóm kdê le.

**33** Kewót le se kul yó kem tau gel semgyok sdô, gotu le mlóy ebè yóm benwu moni bélê yó. Gotu tulón le yóm kdê ton le, dalang se yóm deng nmò Jisas bè yó kem lewu tau tehe lengel mata.

**34** Mung kungol le du yó kem tau bè yóm benwu yó, tódô le gotu sguku ebè Jisas. Timbow le ston du, tey kehkodu le béléen anì tnagaken yóm benwu le.

## 9

*Kkó Jisas des yóm tau matay sfu lówóhen  
(Mark 2:1-12; Luk 5:17-26)*

**1** Bud kewót le Jisas bè yó, motun le elem yóm ówóng, mulék le efatu lanaw ebè yóm benwu gónó Jisas nô.

\* **8:21** Yó sotu lanen yóm udélen ebè Jisas yó, "Nan matay mà he, Sér, ominu lemolò kóm."

<sup>2</sup> Bè yóm kkól le ditu, tódô glo Jisas yóm tau deng matay sfu lówóhen, sentihang le ebééen. Timbow ton Jisas yóm ali kehtahu le béléen, yó gónón tódô mon du ebè yóm tau matay sfu lówóhen, "Hol hgelem nawam, Man. Deng hnifótú ne yó kem salaem."

<sup>3</sup> Timbow gungol yó kem tau gel tmolok hlau yóm udél Jisas yó, mom yó hendem le, "Moen tau ni ke hsgeden knóen bè Dwata?"

<sup>4</sup> Tódô tngón Jisas yóm nô lem hñdem le, yó gónón mon du mò kul, "Moen de ke sidek kmò kehedem ye ebééu?"

<sup>5</sup> Là kóen na a mahil mon du, 'Hnifótú ne yó kem salaem.' Ne là se kóen mahil mon du, 'Btiki, ne mógoí.'

<sup>6</sup> Ni naw hton kuy yóm kwen kwalisen hmifót salà yóm Ngà Tau yóm igoen tolo nô te tonok." Ne omin Jisas bud mudél ebè yóm tau deng matay sfu lówóhen yó, monen mò du, "Mdai ne, Man, ne nitem yóm gónó le mit kóm yóó, ne muléki ebè gónóem."

<sup>7</sup> Ne tahu se. Tódô btik yóm tau yó koni, ne tódô mulék ebè gónóen.

<sup>8</sup> Timbow ton yó kem tau sbung nim nmò Jisas ni, tô le likò, lel le dmoyón ke Dwata bè yóm tey kfasang blayen bè tau.

#### *Ktaba Jisas ke Matyu mò lemolò du (Mark 2:13-17; Luk 5:27-32)*

<sup>9</sup> Bud kewót Jisas bè yó, tódô tonen yóm sotu tau fen gel mtuk bwis boluyen Matyu, myón bè fsinaen. Bè yóm kton Jisas du, tódô monen mò du, "Ó Wè, loloem o." Ne tahu se, mung kdà Matyu bè yó, loloen Jisas.

<sup>10</sup> Bè yóm igò le Jisas ne yó kem gel lemolò du mken bè gónô Matyu, tey dê bè yó kem dumu tau gel mtuk bwis dalang se yó kem dumu tau gemsalà, gbót seyón kul mken bè yó.

<sup>11</sup> Timbow ton yó kem Farisi nim ni, tódô le mógoí ebè yó kem tau gel lemolò ke Jisas, ne mon le mò kul, "Moen de yóm tau gónó ye gel htolok ke deng mom segbót mken bè yó kem tau yóó?"

\* 9:13 Husiya 6:6.

<sup>12</sup> Mung kungol Jisas du yóm mon le yó, yó gónón mon du mò kul bede hñingónen, "Yóm tau ke laen dù desen, là kô snoloen du kun yóm tau mulung. Són yóm tau wen desen mebel yóm tau mulung.

<sup>13</sup> Hol hennagì ye dé lanen yóm sotu monen bè Sulat Dwata, 'Keskodu dé yóm hol nýóú bélê ye,' mon Dwata, 'là kô dsù du.\*' Duhen ni se yóm nýóú edini ni," mon Jisas, "là kô tnabahu kul yó du kem tau tedeng kmò le. Okóm yó tnabahu, yó kem tau gemsalà."

#### *Ktolok Jisas lan yóm fasting (Mark 2:18-22; Luk 5:33-39)*

<sup>14</sup> Kogolen bè yó, sut le bè Jisas yó kem tau gel lemolò ke Jan yóm gel mabtays, wen snólók le béléen, mon le, "Ó Sér, bélê me kum, dalang se bè yó kem Farisi, gel wen kdaw me fasting. Moen de ke là gel nmò le du yó kem gel lemolò kóm?"

<sup>15</sup> Ne bnalà Jisas lu, bede hñingónen, monen, "Ke wen mò ken, là gbek le du ke là gbót le mken yó kem tau hol bak mulu yóm igoen tolo nô bélê le yóm logi myehen. Okóm angat wen kdawen tódô kwa le du bélê le yóm logi myehen. Yó he kton ye kul fasting."

<sup>16</sup> Ne wen bud tulón Jisas kul bè yóm là kehyu sembool du yóm kun tolok bè yóm tolok gna, bede bud hñingónen, monen, "Laen kô dù tau se ke namà kenséen yóm nes lomi mò klefengen yóm kgal bolok. Ke yó tó nmoen, ngem ke kemsong yóm nes lomi, tódô ksê yóm kgal bolok.

<sup>17</sup> Ne sotuhen, laen kô dù tau ke ilihen elem yóm sning kulit ógóf deng legen yóm tifas hanà lomi. Kmoen yóm tifas yó ke kmodok, ne mom btù yóm gónóhen e mili du, abay se lemtò bè yóm deng kkodoken. Ne gotu gamà yóm tifas, ne baling sidek yóm gónóhen nô. Yó dé kun yóm tifas ke hanà tolo lomi, ilihem bè yóm sning kulit ógóf hanà tolo lomi snéen. Ke yó

se kmoem du, là kóen btù yóm sning kulit ne là se gamaen yóm tifas."

*Kehkó Jisas des yóm libun mdù nesen, ne kehlowilen yóm ngà libun deng mlef*

*(Mark 5:21-43; Luk 8:40-56)*

<sup>18</sup> Yóm igò Jisas tolo tmulón du kul ni kem ni, wen sotu Ju wen glalen móggow ebéléen, ne tódô na a mtud bukol bë soluhéen, ne monen mò du, "Ó Sér, wen yóm ngau libun deng lewaken nawan koni. Okóm holi mung do nam e nenok do anì bud mowl."

<sup>19</sup> Tahu se, tódô mung du Jisas ne yó kem gel lemolv du.

<sup>20</sup> Yóm igò le móggow mulit lan, wen sotu libun gemnóm des tenbalung móggow huli ke Jisas, ten-gafit nduen nesen. Abay se deng sfolò lewu halayen kegenen gemnóm du yóm desen.

<sup>21</sup> Yó hendemen, "Baluen ke olohu gemdù nesen, kaem tódô mkó nim desu."

<sup>22</sup> Unin mdù du, beklil se Jisas, ne tódô tonen yóm libun yó, monen mò du, "Hgelem nawam ne, Lenibun. Yóm kehtahuhem bélén, yó se gónón mkó yóm desem." Ne tahu se, tódô sennganan se mkó yóm desen.

<sup>23</sup> Ne omin Jisas hlós ebè gónó yóm tau wen glalen yó koni. Timbow le kól bë yó, husek elemen, ne tódô tonen yó kem tau stifun tó na a mung lembeng, lel tey kehebnes le. Mon Jisas mò kul, "Na ye hewà bë ni kdé ye.

<sup>24</sup> Là kóen deng matay he yóm ngà libun yó, tódô olon tungô." Okóm deng mom són mò le hemkéng du yóm mon Jisas yó.

<sup>25</sup> Timbow gotu hefewaen yó kem tau, omin Jisas móggow elem dfél yóm ngà libun yó koni, ne nogoten sigelen, ne tódô kendel btik se yóm ngà.

<sup>26</sup> Tódô lengeben klamangen benwu le gónón e mból yóm deng nmò Jisas yó.

*Kehton Jisas yó kem lewu tau butô*

<sup>27</sup> Timbow bud lemwót bë yó Jisas, wen lewu tau butô kemtes huli du ne

tmaba le ebéléen, mon le, "Ó Sér, sfu tehe Dabid, hol knoduhem mi."

<sup>28</sup> Timbow kól lem yóm gónó gónón e solu Jisas, kól le se béléen yó kem lewu tau butô yó koni, ne wen snólók Jisas bélén le, monen, "Hentahu ye kô yóm kegbeku hton kuy?"

Bnalà le se, mon le, "Hentahu me se, Sér."

<sup>29</sup> Omin Jisas mnok bë mata le, monen, "Yó ne, guta ye balaen ne yóm deng kehtahu ye yó."

<sup>30</sup> Ne tahu se, tódô sen-geng le se bud mton. Ne tey kehget kmon Jisas du mò kul, "Bê ye abay tulón bë kihu tau nim deng nmou bélén ye ni."

<sup>31</sup> Okóm bë yóm kulék le, deng mom sensból le bë clamangen yóm benwu yó yóm deng nmò Jisas bélén le.

### *Khudél Jisas yóm tau umew*

<sup>32</sup> Hol le se lemwót yó kem lewu tau tehe butô yó koni, wen dumu tau bud gdek ebè Jisas, wen nwit le tau là buden gudél lemwót bë yóm tulus seitan malak du.

<sup>33</sup> Timbow hdó Jisas yóm tulus seitan nô béléen, tódô bud gudél se yóm tau yó. Tey ketnga le du yó kem tau sbung bë yó, mon le, "Là kô deng wen ton tekuy bë clamangen Israél deng mò du yóm kun nmò nim tau ni."

<sup>34</sup> Okóm kul yó kem Farisi, mom yó kmon le du, "Kaem lemwót bë Seitan yóm kul ogot yó kem tulus sidek, yóm kfasangen hdó tulus seitan yóm tau yó."

### *Kkodu Jisas yó kem tau*

<sup>35</sup> Kogolen bë yó, lemwót Jisas nan e gotu nauy yó kem benwu lembang kkólen bë yó kem benwu lemnek. Yó nmoen, nan e gel tmolok bë yó kem gónó le gel stifun. Gel tulónen yóm Tulón Hyu lemwót bë kogot Dwata tau, luken hkó kentihen kay des yó kem tau.

<sup>36</sup> Bë yóm gel ktonen yó kem tey tau wen gel sbung ebéléen, tey kkoduhen kul, abay se tey dê gónó le glayam, ne laen kô dù tmóbóng kul. Lómó ktonen kul, lómón yó kem ubiha laen dù tau mdengen semgyok kul.

<sup>37</sup> Yó gónón mudél ebè yó kem gel lemolò du, bede hningónen, monen, “Tey nuta, okóm là holen wen tau muta.

<sup>38</sup> Hol ye mni bë Dwata dé yóm fun nuta anì wen tau hógówen mò na a muta.”

## 10

### *Kélék Jisas yó kem sfolò lewu mò gel hógówen*

(Mark 3:13-19; Luk 6:12-16)

<sup>1</sup> Sotu kdaw bë yó, gotu htaba Jisas yó kem sfolò lewu gel lemolò du, ne gotu benlayen lu kwalis anì gbek le hdó yó kem tulus seitan ne hkó des, balù kihu klasihen.

<sup>2</sup> Yó boluyen kul aposol. Ni se boluy le: Simun yóm boluyen du Pitér ne yóm twolihen Andru. Tmodol du Jim ne yóm twolihen Jan kem ngà Sibidi.

<sup>3</sup> Omin le Filip ne Bartulumyu, ne Tumas, ne Matyu yóm tau gel mtuk bwis. Ne yóm sotu Jim ngà Elfiyus, ne Tediyyus,

<sup>4</sup> ne yóm sotu Simun yóm tau tehe mung mofin yóm kul benwu, ne Judas Iskariyut yóm tau fen bemlay sumóng ke Jisas.

### *Khógów Jisas yó kem tau néléken*

(Mark 6:7-13; Luk 9:1-6)

<sup>5</sup> Kewóten bë yó ne, gotu hógów Jisas yó kem sfolò lewu tau néléken, ne wen hlauhen kul, monen, “Bê ye mógr ebè kul benwu yó kem tau là Ju le, dalang se ebè kul benwu yó kem tau Samarya.

<sup>6</sup> Yó gónó ye e mógr ebè tu kem kwen tekuy tau Israél, abay se hol lómón tò le ubiha tabag.

<sup>7</sup> Ne ye e tulón kul yóm móyón kehto yóm buteng Dwata mogot tau.

<sup>8</sup> Hkó ye des yó kem tau semlaw, ne hlowil ye ke wen tau matay. Hkó ye yó kem gemnóm des mifù, ne hdó ye bë yó kem tau lengel mata yó kem tulus seitan malak kul. Deng wen blay Dwata kuy yóm là benli ye du. Duhen yó, ke wen tau angat tnóbóng ye, bë ye abay hbayad lu.

<sup>9</sup> Bë nim kógów ye ni, bë ye abay mit filak.

<sup>10</sup> Bë ye se abay mit bag, ne olon sotu kgal lesék ye, bë ye abay mit mò gewuhén. Bë ye mit tlumfà, duhen ke tugged. Abay se knóón bë yó kem tau mò nmò ke tódô benlay yó kem tau gónó le mò nmò ke wen gónó le élél.

<sup>11</sup> Ke sut ye bë yóm benwu bong duhen ke bë yóm benwu udì,” mon Jisas, “hol hnebel ye yóm tau móyô hmódó kuy. Béléen gónó ye mefet efet kól bë kulék ye.

<sup>12</sup> Ke motun ye bë yóm gónô, yó mon ye mò yó kem tau nô lemen, ‘Dwata he henek nawa ye.’

<sup>13</sup> Ke hnódó le yu yó kem tau bë yóm gónô yó, angat wen kenek nawa le. Okóm ke là hnódó le kuy, laen se kô kenek nawa le.

<sup>14</sup> Ne ke wen benwu là hmódó kuy, ne ke là dog hnungol le kuy, tódô tna-gak ye yóm benwu yó, olo ye tmótók kfung bë ti ye.

<sup>15</sup> Tódô tulónu kuy ktahuhen, ke deng kól yóm kdaw kkukum Dwata tau, angat tey bong ktafaken kul yó kem tau bë yóm benwu yó senta yóm ktafaken yó kem tau tehe alì mò sidek bë Sodom ne Gomora.”

### *Keglayam lemwót bë kehtahu*

(Mark 13:9-13; Luk 21:12-17)

<sup>16</sup> “Ngem,” mon Jisas, “bë nim khógów kuy ni, lómón ke ubiha mógr elem blóng tu kem lóbô lem bnes boluyen wolf. Hol ye hfulung temgama, lómón yóm kul khulung temgama yó kem ulal. Ne hol hninggel ye knawa ye, lómón yóm kul klinggel knawa yó kem obun.

<sup>17</sup> Eles ye temgama, abay se angat wen kem tau kemfô kuy, nit le yu ebè yóm gónó skukum, ne nabid nfes le yu bë yó kem kul gónô gel stifun yó kem Ju.

<sup>18</sup> Lemwót bë yóm klolò ye do gónó le angat mit kuy bë solu yó kem gubérnor, ne bë yó kem tau hol geta. Yó se kdaw ye tnana hetngón du bélê le yóm Tulón Hyu, dalang se ebè yó kem tau là Ju le.

<sup>19</sup> Ke angat kenfô le yu, bë ye abay tò tnafa nawa yóm mò kbalà ye kul,

ne yóm kmò kudél ye ebélé le. Dwata he tmolok du kuy yóm kmò kbalà ye kul sok kól yóm kdaw yó.

<sup>20</sup> Abay se là kô kuy udél du yóm angat mon ye, okóm udél hmonen kuy yóm kun Tulus yóm Mà tekuy bë longit.

<sup>21</sup> Bè yóm kdaw yó, angat wen se tau setwoli, glef hekfô le yó kem kul dumu setwoli ne hfatay le. Ne wen se kem mà, glef hekfô le yó kem kul ngà ne hfatay le. Dalang se yó kem ngà, glef hekfô le kem kul tuha ne hfatay le.

<sup>22</sup> Angat tey dê tau kmutó nawa kuy lemwojt bë yóm klolò ye do. Okóm yóm tau ke gbeken hembala du yó kem gónóhen glayam efet kól bë hol sónen, du se gmuta du yóm klowil laen dù tul sónen.

<sup>23</sup> Ke hnayam le yu bë sotu benwu, tódô ye mlóy ebè dumu benwu. Tódô tulónu kuy ktahuhen, là kô na ye e deng gdeng du he yó kem hmou kuy bë kdé yó kem benwu bë clamangen Israél, deng sana bud kól yóm Ngà Tau.

<sup>24</sup> Yóm tau ke hanà tolo dmalang, là kóen geta senta yóm tau tmolok du. Dalang se yóm tau mò nmò, là kóen geta senta yóm gónón mogot.

<sup>25</sup> Hyu nawahen yóm tau dmalang ke deng guliten yóm tau tmolok du. Ne yóm tau mò nmò, hyu nawahen ke deng guliten yóm amohen. Ke Seitan boluy le du yóm gónó ye mogot, milud he ksidek udél le ebélé ye, yu kem mogot béléu."

### *Olon Dwata dé knikò tekuy (Luk 12:2-7)*

<sup>26</sup> "Bê ye hlikò bë tau," mon Jisas. "Kdéen gebnos deng nmò tau, angat gotu gfan. Duhen ke wen bunihen bë kem dumuhen, tódô gotu bud tngón.

<sup>27</sup> Bè yó kem gel tulónu kuy ke kifu, hol bud tulón ye ke kemdaw. Bè yó kem deng gel tulónu kuy sónen yu, hol bud tulón ye bë kdéen tau.

<sup>28</sup> Bè ye abay likò bë tau. Gbek le hmatay lówó ye, okóm yóm lóyof ye,

là kô gbek le hmatay du. Dwata dé hol tahu knikò ye, abay se gbeken hmatay lówó ye, ne gbeken se tmudà lóyof ye elem lanaw ofi.

<sup>29</sup> Ngem yó kem ngà onuk bnes gel hbalù le, tek slad bli yóm lewu botù. Balù yóm kul là kebtes, là kóen na e tódô mosok ebè tonok yóm sotu ke là deng eles tngónen du yóm Mà tekuy bë longit.

<sup>30</sup> Milud he yó dum kuy. Balù yó he kem balu wek ye, deng gotu nsó Dwata.

<sup>31</sup> Yó gónóm mon, bê ye abay hlikò. Bong ye mebtes se kuy senta yó kem tey dê ngà onuk bnes."

### *Yóm tau là hmalà ke Jisas (Luk 12:8,9)*

<sup>32</sup> Bud mon Jisas, "Yóm tau ke gel tulónen yóm kloloen do lem blóng kem dumun tau, angat bud tulónu se kun bë solu Mà bë longit.

<sup>33</sup> Okóm yóm tau ke hnalaen yóm kloloen do lem blóng kem dumuhen, angat bud hnalaau se do bë solu Mà bë longit."

### *Klolò ke Jisas gónón sekla nawa tau (Luk 12:51-53; 14:26,27)*

<sup>34</sup> "Ilóem ofo kuy ke yó hendufu edini ke naw e sensotu nawa tau te tonok. Là, yó hendufu naw e semkla nawa.

<sup>35</sup> Lemwojt bë yóm kogowu edini, gotu sekla nawa le yó kem tau smà ne tau syé ne tau stuón.

<sup>36</sup> Deng mom yó hol hmohon du yóm sotu tau, duhen yóm kun fes lówó.

<sup>37</sup> Yóm tau ke loloen o," mon Jisas, "okóm ke alì henlom nawahen kem tuhahen, kengen yóm kloloen do yó. Dalang se ke alì henlom nawahen kem ngaen, kengen yóm kloloen do.

<sup>38</sup> Yóm tau ke loloen o, okóm là eles tnihangen du yóm kun kros, kengen yóm kloloen do.\*

<sup>39</sup> Yóm tau knamaen klowilen, angat lana béléen yóm klowilen yó. Okóm yóm tau là knamaen du yóm

\* <sup>10:38</sup> Yóm kros mon Jisas yó, hningónen yóm là klikò le matay bë yóm klolò le ke Jisas.

klowilen, angat gutahen yóm klowil laen dù sónen.”

*Yóm ofol angat blay Dwata  
(Mark 9:41)*

<sup>40</sup> “Bè nim khógówu kuy ni,” mon Jisas, “yó se tau hmódó kuy, lómón ke ou hnódóhen. Ne yó se tau hmódó do, lómón ke hnódóhen yóm deng hógów do.

<sup>41</sup> Yóm tau ke hnódóhen yóm tau hógów Dwata, abay se dilóen yóm khógów Dwata du, angat tódô senged se yóm ofol blay Dwata kul yóm lewu le. Ne yó se tau hnódóhen yóm tau hyu kmoen, abay se dilóen yóm kehyuhén, tódô senged se yóm ofol blay Dwata kul yóm lewu le.

<sup>42</sup> Tódô tulónu kuy ktahuhen, baluen he ke tek olon él tnaw hinum ye yóm sotu tau gel lemolò do, yóm tau ali glaan bè kdéen, abay se dilô ye yóm kloloen do, angat dohò wen ofol blay Dwata kuy.”

## 11

*Kehsólók Jan ke Jisas  
(Luk 7:18-35)*

<sup>1</sup> Timbow deng kehlau Jisas yó kem sfolò lewu gel lemolò du yó koni, ominen lemwót na a tmolok bè yó kem dumu benwu hmilol bè yó.

<sup>2</sup> Ngangen mból yóm gel nmò Krays efet gefet bè Jan lem blanggù, yóm Jan gel mabtays. Timbow gungolen, ominen wen bè yó kem gel lemolò du hógówen ebè Jisas

<sup>3</sup> anì snólók le bélén ke deng duhen du ne yóm tau hógów Dwata tehe gel tulónen, duhen ke na le na nangat he?

<sup>4</sup> Bè yóm ksólók le du bè Jisas, bnalaen se lu, monen, “Mulék ye ne, ne ye e tulón ke Jan yó kem deng gungol ye ne yóm deng ton ye.

<sup>5</sup> Yóm tau butô tódô bud mton, yóm tau hikot bud gógów, yóm tau wen des mifù gnómen gotu mkó, yóm tau bokong bud mungol, yóm tau matay bud mowil. Ne sotuhen, yóm Tulón Hyu lemwót gu bè Dwata deng gefet bè yó kem tau élél.

\* **11:10** Malakay 3:1.

<sup>6</sup> Hligal kun yóm tau ke là megewu nawahen do.”

<sup>7</sup> Kogol yóm kulék le gu bè Jisas yó kem tau hógów Jan yó, omin Jisas tmulón ke Jan lem blóng yó kem tey tau sbung, monen, “Bè yóm tehe gel kógów ye ebè Jan bè yóm benwu laen hol tau menwu du, tedu se yóm tō nójó hnebel mata ye bélén du? Yóm bnes tendo mung mgafil bè lenos kó? Là kó yó du.

<sup>8</sup> Tedu se tō hnebel mata ye du? Yóm tau knóón knesen kó? Là kó yó du. Tek són yó gónó ye mton du yóm tau knóón knesen, tek són lem gónô bong yóm tau hol geta.

<sup>9</sup> Tedu se hol hnebel mata ye du bè yóm tehe gel kógów ye ebéléen yó? Tau tugod Dwata kó? Tahu se, tau tugod Dwata yóm Jan. Okóm yóm nmoen, mkay senta yóm kun nmò yóm tugod Dwata,

<sup>10</sup> yakà du du gónón e dohò yóm tehe hsulat Dwata ekni, yóm monen, ‘Wen hógówu tukô gna kóm mò eles hemgifat du yóm angat lanem.’\*

<sup>11</sup> Tódô tulónu kuy ktahuhen,” mon Jisas, “laen dù tau talak tonok ke geta senta Jan. Okóm ke deng kól yóm kdaw kogot Dwata tau, balù yó he kem tau ali glaan bè kdéen tau nogot Dwata, angat geta senta Jan.

<sup>12</sup> Lemwót bè yóm kbut Jan tmolok efet kól nim kmoen ni, tey sidek tō kseng le du yóm kogot Dwata tau. Yó kem tau ali lóbô tō mò du.

<sup>13</sup> Yóm kogot Dwata tau ni, deng eles gegna ne ktulón le du yó kem tehe gna tugod Dwata ekni, dalang se ke Musis bè yóm kun hlau efet kól bè yóm kun kdaw Jan.

<sup>14</sup> Ke yó dum móyô ye hemtahu du yóm tehe tulón le yó, kaem Jan yóm Ilaydyá, yóm tehe gel mon le bud sem-fulék.

<sup>15</sup> Yóm tau wen klinguhén, hol hmungol.”

<sup>16</sup> Bud mon Jisas, “Tedu de kmò kehlingónu kuy yu kem tau kmoen ni? Yó gónóhu e hkél kuy, hol ye mkél

bè yó kem ngà là mdengen bè fedyan, tnaba le yó kem dumu le, mon le,

<sup>17</sup> ‘Deng me hningón mulu, ne lel me tembol, là kô ye dog madal. Ne deng me hningón modung, lel me le-manu, là kô ye dog langag.’

<sup>18</sup> Ngem yó dém kkól Jan lem blóng ye,’ mon Jisas, “gel fasting se kun, ne là kô ninumen du kun yóm ninum lóbô. Okóm deng mom slón ye du, ‘Tau wen malak du.’

<sup>19</sup> Bè yóm deng kkól yóm Ngà Tau, gel mken se kun ne gel minum lómón se yóm kuy. Okóm mom senlón ye, gel mon ye, ‘Ngem dé yóm tau yóó, bong kkenen, ne bong kinumen. Deng mom niten swè yó kem tau gel mtuk bwis ne yó kem dumu tau gemsalà.’ Ewenem,’ mon Jisas, “sana kegfanen bè klowil yóm tau mimón yóm khu-lung Dwata mit tau.”

*Kudél Jisas yó kem tau là dog hegsel  
(Luk 10:13-15)*

<sup>20</sup> Omin Jisas mudél kul yó kem tau bè yó kem benwu tehe gónóhen gel mò du yó kem dê hentaw ton gel nmoen, abay se là kô le hegsel, ne là kô knogol le du yó kem sidek gel nmò le.

<sup>21</sup> Yó monen mò kul, “Angat tey tafak ye, yu kem tau bè Kurasin. Ne tey tafak ye se kuy, yu kem tau bè Bitsayda. Ke deng tehe ton yó kem tau là Ju le bè Tayal ne bè Sidon ni kem hentaw ton deng nmou lem blóng ye ni, ngem kà tódô le lemsek nes sakù, ne bnulus le kohù lówó le mò ilô yóm deng kehegsel le, ne yóm deng kkogol le yó kem sidek tehe gel nmò le.

<sup>22</sup> Tódô tulónu kuy ktahuhen, sok kól yóm kdaw angat kkukum Dwata tau, botong kéng he yóm ktafaken yó kem tau là Ju le bè Tayal ne bè Sidon yóm angat ktafaken kuy.

<sup>23</sup> Dalang se kuy yu kem tau bè Kapérnaum. Ilóem kmon ye ke gefet bè longit yóm alì kehegeta ye knô ye. Ngem kà angat tódô tudà Dwata kuy elem lanaw ofi he. Ke deng tehe ton yó kem tau là Ju le bè yóm tehe benwu Sodom ekni yó kem hentaw

ton nmou lem blóng ye ni, hol mou kun ne ke là hegsel le se kul, ne là kô genlà Dwata kul.

<sup>24</sup> Tódô tulónu kuy ktahuhen, sok kól yóm kdaw angat kkukum Dwata tau, botong kéng he yóm ktafaken yó kem tau bè Sodom yóm angat ktafaken kuy.”

*Yóm fasad Jisas ebè yó kem tau  
deng hemtahu béléen  
(Luk 10:21,22)*

<sup>25</sup> Bè yóm keseyón le Jisas yó, tódô mni bè Dwata, monen, “Ó Mà, uu se mogot longit ne tonok. Tey kdóyónu kóm, abay se deng wen hegilebem bè yó kem tau laen dù tngónen, okóm bè yó kem tau wen tngón le, là kô hegilebem du bélé le.

<sup>26</sup> Duhen yó se, Mà, yóm kóm kóyô kehlan du.”

<sup>27</sup> Omin Jisas bud mudél ebè yó kem gel lemolvò du, monen, “Deng gotu hkem Mà do yóm kdéen. Laen kô tau temngón du yóm Ngà Dwata, tek són yóm Maen. Ne là kô wen tau temngón du yóm Maen, tek són yóm Ngaen, ne tek són yó kem tau deng néléken mò gónóhen hetngón du.

<sup>28</sup> Mógów ye ebéléu dé, yu kem tau miteg lemwót bè yóm keblat yóm gel nbô ye. Fen henwósu bélé ye yóm blat yó.

<sup>29</sup> Tles nbô ye dé yóm dou nbô, ne hol ye dmalang béléu, abay se ganag nawahu, ne là kóe hegeta knô. Ke yó se kuy nmò, là kô ye na e bud miteg.

<sup>30</sup> Abay se tey mahil mit du yóm dou hwit kuy, ne là kóen blat yóm tles dou hbô kuy.”

## 12

*Ktolok Jisas lan yóm Kdaw Ke-hegnô*

*(Mark 2:23-28; Luk 6:1-5)*

<sup>1</sup> Sotu kdaw bè yó, lemwót le Jisas ne yó kem gel lemolvò du, mlan le hlalak yóm tniba, bede geblà bè yóm Kdaw Kehegnô. Ne tey kbitil yó kem gel lemolvò du, yó gónó le ma bungu halay mò nteb le.

<sup>2</sup> Timbow ton yó kem Farisi, mon le mò ke Jisas, “Tenngelem dé yó kem gel lemolv kóm, deng mom nulé le yóm hlau tekuy bë yóm Kdaw Kehegnô yóm nmò le yó.”

<sup>3</sup> Bnalà Jisas lu, monen, “Deng hónô senfala ye yóm tehe nmò Dabid ne yó kem kun tau bë yóm tehe kbitil le.

<sup>4</sup> Tódô husek bë Gónô Dwata Dabid, ne nwahlen yóm mambang deng blay le ebè Dwata, ne ominen mken du dalang se yó kem kun tau. Blaem bë yóm hlau tekuy, là kóen hyu kken tau hkawang du yóm mambang yó, tek són yó kem gel demsù ebè Dwata gel mken du. Ewenem, là kô duón Dwata du kul yóm kken le du.

<sup>5</sup> Ne sotun,” mon Jisas, “deng hónô senfala ye snéen bë yóm tehe snulat Musis gbak ebè yó kem tau gel demsù ebè Dwata. Bè yóm Kdaw Kehegnô, tódô henlel le mò nmò bë Gónô Dwata se kul, okóm là se kô duón Dwata du kul.

<sup>6</sup> Tódô tulónu kuy, deng wen kóllem blóng ye yóm mfasang senta yó kem dê hlòl le kuy bë Gónô Dwata.

<sup>7</sup> Wen yóm monen bë Sulat Dwata, ‘Keskodu dé yóm hol nójou bélê ye, là kô dsù du.’\* Ke deng tngón ye lanen yóm udél Dwata ni, là kô ne ye e tódô hensalà yóm tau laen dù bang salaen.

<sup>8</sup> Yóm Ngà Tau, du se wen kwalisen fen tmolok du kuy yóm hyu mò du bë yóm Kdaw Kehegnô.”

### *Kkó Jisas des bë Kdaw Kehegnô (Mark 3:1-6; Luk 6:6-11)*

<sup>9</sup> Omin Jisas bud lemwót bë yó, ne hlós ebè yóm gónó le gel stifun yó kem Ju.

<sup>10</sup> Wen sotu tau nô bë yó kimoy doligelen. Ne wen se kem dumu tau nô bë yó mebel le lan le dmuón ke Jisas, mon le mò du, “Gsalà bë yóm hlau tekuy kô yóm hkó des bë yóm Kdaw Kehegnô?”

<sup>11</sup> Bnalà Jisas se lu, monen, “Tedu kmò ye du se kuy ke kulel kebtangen lem sol ngelem yóm ubiha ye bë

Kdaw Kehegnô, là henmung nalu ye du kô?

<sup>12</sup> Milud he yó dum tau, abay se bong muhen senta yóm ubiha. Yó gónom mon, là gsalà tekuy du yóm kut hlau ke wen tau tnóbóng tekuy bë yóm Kdaw Kehegnô.”

<sup>13</sup> Omin Jisas mudél ebè yóm tau kimoy sigelen yó koni, monen mò du, “Bentolem sigelem.” Ne tahu se, bentolen, hol lómón ke laen dù tehe desen, lómón yóm dolihen.

<sup>14</sup> Okóm yó kem Farisi, tódô le gotu lemwót, ne sensatul le yóm kmò khatay le ke Jisas.

### *Yóm tau kun nélék Dwata*

<sup>15</sup> Tódô tngón Jisas yóm tō khatay le du, yó gónón tmagak yóm benwu yó. Tey dê tau bud lemolv du, ne gotu hkóhen des yó kem tau semlaw.

<sup>16</sup> Ne tey kget kehlauhen kul anì là tulón le du bë dumu tau yóm deng nmoen bélê le.

<sup>17</sup> Bè nim nmò Jisas ni, deng gónón dohò yóm tehe udél Dwata deng tulón yóm sotu tugod Dwata ekni boluyen Isaya, yóm monen,

<sup>18</sup> “Ni se yóm tau tóbóng lówóhu, yóm deng néléku.

Tey bong nawahu du, ne tey kligalau bélén.

Angat tódô suu bélén yóm dou Tulus, ne angat heglalagen bë yóm kdéen tau yóm ktedeng kogotu kukum.

<sup>19</sup> Là kô yó du gungol ye bélén ke mit sgés bë kem dumu tau, duhen ke gel hetê.

Ne là kô gungol ye du htétél bë gónón wen.

<sup>20</sup> Bè yóm któbóngen tau, là kô tennù tenfoken du yóm hulu deng metngù, ne là tennù hnatayen du yóm solok sónmoen mudof. Okóm henlelen yóm któbóngen kul efet hol gfan yóm kukum tedeng nogoten.

<sup>21</sup> Bélén gónón mgel nawa yóm kdéen tau.”\*

\* <sup>12:7</sup> Husiya 6:6. \* <sup>12:21</sup> Isaya 42:1-4.

*Kengis Jisas senta Seitan  
(Mark 3:20-30; Luk 11:14-23)*

**22** Ne ominen wen sotu tau nit le ebè Jisas, tau butô lelen umew lemwót bè yóm tulus seitan malak du. Tódô hdó Jisas yóm malak du, ne tódô gudél se yóm tau, ne bud mton.

**23** Ya tey ketnga le du yó kem tau sbung bè yó, mon le, “Déke ni yóm mon le semfu gu bè yóm tehe Dabid.”

**24** Timbow gungol yó kem Farisi nim mon le ni, mom mon le, “Là kô yó du. Kaem Seitan yóm htulus du yó, yakà són du Seitan kul ogot yó kem tulus sidek.”

**25** Tódô tngón Jisas yóm nô lem henedem le, ne yó gónón mon du mò kul, “Yóm benwu tendo mesgólól nawa tauhen, ne ke sónmò le sfatay, angat meglà. Balù yóm sotu gmónô, ke là ssotu nawa le, ne ke sónmò le sfatay, angat le tódô seglef.”

**26** Duhen yó, ke sónmò le sfatay yó kem tau nogot Seitan, deng mesgólól ne nawa yó kem tau nogoten, ne yó se angat gónó le meglà.

**27** Ke mon ye lemwót bè Seitan yóm kehdóhu tulus sidek, wen snólóku bélê ye. Tedu se gónón lemwót yóm kehdó le tulus seitan yó kem gel lemolv kuy? Tau du de gel htulus kul? Ke là lemwooten bè Seitan yóm kul kegbek hdó tulus sidek, yó se gónón gdilô yóm ksalà kehedem ye.

**28** Là kóen na a lemwót bè Seitan yóm kehdóhu tulus sidek, okóm tódô lemwót bè yóm kehtulus Dwata do yóm kegbeku mò du. Ne ni gónó ye temngón du yóm deng kkólen lem blóng ye yóm kogot Dwata tau.

**29** Yóm kul ogot yó kem tulus seitan,” mon Jisas, “hol lómón yóm tau kemgis. Laen kô dù tau gusek elem gónóen na a ma yó kem kimuhé ke là nan gna nfét du yóm tau kemgis yó. Ke deng gféten, yó he kegwahen yó kem nójóen lem gónóen. Hollómón yó se yóm deng nmou bè Seitan.

**30** Yóm tau là mungen do, hnohon ou. Yóm tau là tnóbógen do semtiful yó kem tau, deng du se fen semkla kul.

**31** Yó gónóhu mon du mò kuy, hnifót Dwata yóm tau balù kihu salà nmoen, ne balù kihu udélen sidek gbak ebéléen. Okóm là kô hnifóten du ke sidek kbaken ebè yóm Tulus Dwata.

**32** Ne hnifót Dwata yóm tau ke sidek kbaken ebè yóm Ngà Tau. Okóm là kô hnifóten du ke sidek kbaken ebè yóm Tulus Dwata. Ke yó nmò yóm tau, laen kô tul kkóhen tahan yóm salaen yó.”

*Dilô bè kbunguhen yóm koyu  
(Luk 6:43-45)*

**33** Bud mon Jisas mò kul, “Yóm koyu hyu, hyu se kbunguhen. Ne yóm koyu sidek, sidek se kbunguhen. Tódô ket koyu mungu, sal dilóem bè kmò kbunguhen ke hyu duhen ke sidek.

**34** Ya nim yu kem tau, knawa ye ulal. Yó gónón sidek kebkó ye, abay se hono sidek yóm nô lem henedem ye. Yó se nô lem henedem yóm tau, yó se sut bè sumóngen.

**35** Yóm tau hyu, hyu kebkóhen lemwoot bè yóm hyu gel suen lem henedem. Yóm tau sidek, sidek kebkóhen lemwoot bè yóm sidek gel suen lem henedem.

**36** Tódô tulónu kuy,” mon Jisas, “bè yóm kdaw kkukum Dwata tau, angat gotu snólóken bélê le yóm kdéen deng tehe gel benkó le laen dù muhen.

**37** Yakà lemwooten bè yóm tehe gel benkó ye gónó Dwata lemwoot kmukum kuy, ke angat tñafaken yu duhen ke là.”

*Tô hmò le ke Jisas yóm hentaw ton  
(Mark 8:11,12; Luk 11:29-32)*

**38** Ne wen bè yó kem tmolok hlau ne bè yó kem Farisi mudél ebè Jisas, mon le, “Ó Sér, kójó me ke moi kum yóm hentaw ton.”

**39** Bnalà Jisas se lu, monen, “Tey sidek yó kem tau kmoen ni. Balù udì ke wen nawa ye ebè Dwata. Móyô ye kô ke wen hentaw ton nmou lem blóng ye? Laen kô dù bud nmou ne. Tek són nmou lem blóng ye, són yóm hentaw ton tehe ton le bè Juna ekni, yóm sotu tehe gna tugod Dwata.

<sup>40</sup> Bè yóm tlu buteng Juna nô lem bluntut yóm tey utón bong lem mohin, yó hnigaden yóm tlu butengen angat nô lem lebeng yóm Ngà Tau.

<sup>41</sup> Bè yóm kdaw angat kkukum Dwata tau, tódô le sbung mdà bê yó se kul yó kem tau là Ju le lemwót bê Ninibi, ne angat nsel le yu. Anam yó ne, tek olo Juna he yóm tehe hetngón du kul yóm udél lemwót bê Dwata, ewenem yó, sana kehegsel le, ne tódô tnagak le yóm sidek gel nmò le. Ne deng wen yóm mkay senta Juna deng kól lem blóng ye bê ni, okóm deng mom henda ye.

<sup>42</sup> Bè yóm kdaw angat kkukum Dwata tau, angat mdà bê yó se kun yóm tehe libun boi là Juhen lemwót bê benwu Siba, ne nselen yu. Tehe gloken milo lemwót gu bê kun benwu là sekna lanen na a hemklingu ke Selumun, yóm tehe sotu tau hol geta bélê tekuy ekni, yóm alì hulung hmau. Ne deng wen ne yóm mkay senta Selumun deng kól lem blóng ye bê ni, okóm deng mom henda ye.”

*Bud kesfulék yóm tulus seitan ebè yóm tau tehe nalaken*  
(Luk 11:24-26)

<sup>43</sup> “Ke deng mdó bê yóm tau yóm tulus seitan gel malak du, yó lanen semibet gu lem bnes mebel gónón e hegñô. Okóm ke laen dù bang tonen,

<sup>44</sup> yó mon yóm tulus seitan yó, ‘Na bud mulék dé ebè yóm tehe gónóhu lemwót.’ Tahu se. Bè yóm kkólen bê yó, tódô tonen laen kô dù nô du, deng mólós, ne minggel kestifesen yóm tehe gónóhen nô yó.

<sup>45</sup> Ominen na tódô bud lemwót, nan e nangay hitu dumuhen bud nô bê yó, bede yóm alì sidek egem le sentahen. Tikóng le deng kól, tódô le husek bê yóm tau gónó le nô. Yó gónóm mon, mom mkay senta yóm gna tehe alì ksidek kegnómen du. Lómón yó se yóm angat gfà le yó kem tau gel mò sidek nim kmoen ni.”

*Kebel le ke Jisas le yéen ne kem twolihen*  
(Mark 3:31-35; Luk 8:19-21)

<sup>46</sup> Bè yóm tolo lel Jisas mudél ebè yó kem tey tau sbung ebéléen, sut le se bê yó le yéen ne yó kem twolihen, tô le móyô stulón du, okóm olo le tódô mdà bê lewaen.

<sup>47</sup> Ne wen tmulón du ke Jisas, monen, “Tu dé le yéem ne kem twolihem, mdà le bê lewà, móyô le stulón kóm kun.”

<sup>48</sup> Mom yó balà Jisas kul, monen, “Wen se dumu yéu, ne wen se dumu twolihu.”

<sup>49</sup> Ominen yó temdok ebè yó kem tau gel lemolo du, monen, “Ngem ni kem tau nii, hol lómón ke yéu ne hol lómón ke twolihu.”

<sup>50</sup> Abay se yóm tau mimón yóm kun kóyô Mà bê longit, hol lómón ke twolihu ne libunu ne yéu.”

## 13

*Yóm hlingón bê yóm tau smohul*  
(Mark 4:1-9; Luk 8:4-8)

<sup>1</sup> Bè yóm kdaw yó, lemwót bê gónô Jisas, mógró etu bê kilil yóm lanaw, ne myón ne tmolok bê yó.

<sup>2</sup> Ya tey tau genged bud stifun ebéléen. Botong lemwót Jisas motun eta yóm ówóng, ne bê yó gónón myón. Fen le nô bê kilil lanaw kul yó kem tey tau wen.

<sup>3</sup> Tey dê tulónen kul, bede sal hlanen bê hlingón, monen, “Wen sotu tau nan e sohul bnéken bê dnaduhen.

<sup>4</sup> Bè yóm ksohulen du, wen se temsik ebè lan, ne sut yó kem onuk koyu, ne tódô gotu tnukô le.

<sup>5</sup> Wen se sohulen gdek elem lusok botu ebè yóm gónón laen hol tonoken. Là kóen legen deng sana tmowok, abay se là mfól tonoken.

<sup>6</sup> Okóm timbow sut kdaw bê yóm deng ktowoken, tódô kendel menes, abay se monem là holen ngelem do-lilen.

<sup>7</sup> Ne bud wen se sohulen gdek e talak yóm gónón angat mfól kluon. Ne tmowok se, tódô mung senok bê yó kem kluon, okóm deng mom limes kun yóm ngà towok halay lem blóng le.

<sup>8</sup> Okóm wen se sohulen gdek ebè gónón hyu tonok. Timbow gefet, ya

tey kfól bunguhen. Wen se kanguyen mungu lematu, wen se mungu nem folò, wen se mungu tlu folò.”

<sup>9</sup> Omin Jisas bud mon du mò kul, “Yóm tau wen klinguen, hol hmungol.”

*Yóm gónó Jisas gel hmingón du yó kem gel toloken kul  
(Mark 4:10-12; Luk 8:9,10)*

<sup>10</sup> Kogolen bè yó, mógów le ebè Jisas yó kem gel lemólò du, wen snólók le béléen, mon le, “Moen de ke gel hningónem yóm gel ktolokem yó kem tau?”

<sup>11</sup> Bnalà Jisas se, monen, “Wen yóm là heglileb Dwata du bè kem dumu tau bè yóm kmò kogoten tau, okóm deng heglileben bélê ye.

<sup>12</sup> Yóm tau ke wen deng gwahen, angat tendo bud gel tennù Dwata béléen anì hol mdengen yóm gwahen. Okóm yóm tau là suen du lem hendenmen yóm deng gungolen, balù yóm udì tehe tngónen, angat bud kó Dwata béléen.

<sup>13</sup> Yó gónóhu na gel hmingón du yóm gel tulónu kul, abay se bè yóm kton le du, là kô dog dilô le du. Ne bè yóm kungol le du, là kô dog glileb le du.

<sup>14</sup> Yó deng gónón dohò yóm tehe mon yóm sotu gna tugod Dwata ekni boluyen Isaya,

‘Anien he ke gungol le, là kô glileb le du.

Anien he ke ton le, là kô dilô le du.

<sup>15</sup> Abay se là móyô le dmang ni kem tau ni, deng mom nseng le klingu le, deng le mom hidong.

Ke bê le nmò yó dum yó, dilô le yóm gel ton le ne glileb le lanen yóm gel gungol le.

Ngangen ne efet le mimón béléu, mon Dwata, ‘ne gotu hnifótú yó kem salà le.’\*

<sup>16</sup> Okóm kuy tey hyu,” mon Jisas, “abay se dilô ye yóm gel ton ye, ne tngón ye lanen yóm gel gungol ye.

<sup>17</sup> Tódô tulónu kuy ktahuhen, tey dê kem tehe tugod Dwata ekni dalang se yó kem dumu tau Dwata, gel tó hendeen le mton du yóm kuy deng

ton nim kmoen ni, okóm là kô ton le du. Tô hendeen hnungol le se kul yóm kuy deng gungol ni, okóm là kô gungol le du.”

*Hnigadyóm tau smohul  
(Mark 4:13-20; Luk 8:11-15)*

<sup>18</sup> “Ni hnungol ye,” mon Jisas, “yóm lan yóm hningónu yó koni bë yóm tau smohul.

<sup>19</sup> Ke wen tau mungol du yóm tulón bë kmò kogot Dwata tau, ne là dog hendeem le du lanen, hol lómón ke yóm bnék temsik ebè lan. Tódô sut Seitan, nwahlen bélê le yóm udél deng gungol le.

<sup>20</sup> Bong yóm bnék gdek elem lusok botu, hol lómón ke yó kem tau hmungol yóm Udél Dwata, ne tódô kendel hentahu le, ne tey ktimu óyô le du.

<sup>21</sup> Okóm là kóen dmolil, tek likót le tó hemtahu. Timbow wen gfà le duhen ke wen hlayam sut bélê le lemwojt bë yóm tó kehtahu le, tódô kendel gkogol le yóm tó kehtahu le yó.

<sup>22</sup> Bong yóm bnék gdek elem yóm angat gónón mfól kluon, hol lómón ke yó kem tau hmungol du yóm Udél Dwata, okóm dê bnukù nawa le bë klowil le, ne gfét nawa le bë kebel le kendengen le. Yó gónón limes yóm kehtahu le, ne laen kô dù bunguhem.

<sup>23</sup> Okóm yóm bnék gdek ebè gónón hyu tonok, hol lómón ke yó kem tau hmungol du yóm Udél Dwata, ne glileb le. Tey kbungu le kul, wen se mungu lematu, ne wen se mungu nem folò, ne wen se tlu folò.”

*Yóm hlingón bë yóm kluon gbol lem halay*

<sup>24</sup> Bud wen hningón Jisas bélê le, monen, “Yóm kogot Dwata tau, lómón yóm tau na a smohul yóm bnék hyu bë dnaduhen.

<sup>25</sup> Sotu kifu bë yó, igò le lemnga tungô yóm kdê le, tódô sut yóm hohon yóm tau fun dnadu nan e bud nulit sohul bë dnadu yóm lem kluon, ominen bud mulék.

<sup>26</sup> Ne ominen tmowok yóm halay, ne tmowok se kun yóm lem kluon.

\* <sup>13:15</sup> Isaya 6:9,10.

Timbow deng nbuten mosò yóm halay, yó he kdilô le du yóm kluon deng gbol lemen.

<sup>27</sup> Timbow ton yó kem tau gel mò nmò bélén, ‘Tedu kmò me du du? Gotu kendut me kô yóm deng gbol bë yó?’

<sup>28</sup> Bnalà yóm tau fun dnatud, monen, ‘Yóm tau hmohon do mò du yóm yó.’

Ne mon yó kem tau mò nmò bélén, ‘Tedu kmò me du du? Gotu kendut me kô yóm deng gbol bë yó?’

<sup>29</sup> ‘Tagad he,’ mon yóm tau fun dnatud, ‘déke mom gomong gekdut ye yó dum halay.

<sup>30</sup> Na ye tódô hbungu lemen he yó kem halay. Sok kól bë angat kutahu du, gna hekdutu yó kem tau muta yó kem kluon yó, gotu benkes lu ne ntém le. Omin yó he muta yó kem halay, ne omin ye mogut kul ebè fol.’

### *Yóm hlingón bë yóm lem hulu alì lemnek*

(Mark 4:30-32; Luk 13:18,19)

<sup>31</sup> Ne bud wen sotu hningón Jisas bélê le, monen, ‘Yóm kogot Dwata tau, hol lómón yóm lem hulu deng hulu yóm sotu tau bë tnibahen,

<sup>32</sup> yóm lem hulu alì lemnek bë kdéen. Okóm ke deng tmowok yóm huluhen yó, tey bong, ne baling koyu, ne gotu le smala gu te hangahen yó kem onuk koyu.’

### *Yóm hlingón bë yóm bulung henok mambang*

(Luk 13:20,21)

<sup>33</sup> Ne bud sotu hningón Jisas bélê le, monen, ‘Sotu góno tekuy e hmingón du yóm kogot Dwata tau, hol lómón ke yóm libun mò mambang. Balù tek udí bulung henok boolen bë yóm tey arina deng hnféen, botong gbeken henok du yóm kbongan.’

### *Gel hlan Jisas bë hlingón yó kem tulónen*

(Mark 4:33,34)

\* <sup>13:35</sup> Lingón 78:2.

<sup>34</sup> Kdê yó kem tulón Jisas yó kem tey tau sbung, sal gel hlanen bë hlingón. Laen dù tulónen kul ke là hningónen du.

<sup>35</sup> Ni se deng góón dohò yóm udél yóm sotu tau tugod Dwata ekni, yóm monen,

“Angat gel hningónu yó kem gel tulónu kul.

Angat tulónu kul yó kem tehe là deng tngón le du lemwót bë hol kbut benwu.”\*

### *Tennefyóm kluon gbol lem halay*

<sup>36</sup> Kewót Jisas bë yó, tnagaken yó kem tey tau wen, ominen husek elem góón. Mógów le ebéléen yó kem gel lemholò du, ne mon le mò du, ‘Tulónem kum kun lanen yóm hningónem bë yóm halay wen kluon gbol lemen.’

<sup>37</sup> Tahu se, tulón Jisas kul, monen, ‘Yóm tau sohulen yóm bnék hyu bë dnatuhun, duhen yóm Ngà Tau.

<sup>38</sup> Ne yóm dnatud, hningónen yóm klamangen benwu. Ne yóm bnék hyu yó, duhen yó kem tau deng nogot Dwata. Yó hningón yóm kluon gbol lemen, duhen yó kem tau deng nogot Seitan.

<sup>39</sup> Ne yóm hohon smohul du yó, duhen Seitan. Yóm deng kgefeet yóm halay, hningónen yóm hol són kdaw. Ne yó kem tau muta, duhen yó kem hóngó Dwata gu bë longit.

<sup>40</sup> Bë yóm kekdut le yó kem kluon gbol lemen, ne yóm ktem le kul, hol lómón yó se yóm angat kmoen bë yóm hol són kdaw.

<sup>41</sup> Angat dók yóm Ngà Tau yó kem hóngówen gu bë longit anì gotu kó le yó kem kdéen tau gel mit kem dumu le mò sidek, dalang se yó kem dumu tau gel mò sidek, gotu kó le lu.

<sup>42</sup> Gotu tudà le lu elem lanaw ofi. Ditu góno le heslaf dmumu mkik, ne sembhé kakim.

<sup>43</sup> Okóm kul yó du kem kun tau Dwata, hol lómó angat keslinang le mata kdaw ke sok le deng kól ditu

bè yóm benwu nogot Mà le bè longit. Yóm tau wen klinguhen, hol hmungol."

### *Yóm hlingón bè yóm kimu labi*

<sup>44</sup> "Sotu gónó tekuy e hmingón du yóm kogot Dwata tau," mon Jisas, "hol lómón ke yóm kimu labi deng tódô ton yóm sotu tau talak yóm dnadu, yóm kimu tehe lebeng yó kem tau gnan ekni. Bè yóm ktonen du, bud lebengen se kun. Ya tey kligalen mulék. Tódô gotu himot hbaluen yó kem kdê nô béléen anì geblihen yóm tonok gónón mton yóm kimu labi."

### *Yóm hlingón bè yóm kimu libun boluyen pérlas*

<sup>45</sup> "Sotuhen," mon Jisas, "sotu gónó tekuy e hmingón du yóm kogot Dwata tau, hol lómón ke yóm sotu tau mebel yóm kimu libun alì mebtes boluyen pérlas.

<sup>46</sup> Timbow wen tonen sotu alì tilob, ominen mulék, ne gotu himot hbaluen yóm kdê kendengenen anì geblihen yóm pérlas tonen yó."

### *Yóm hlingón bè yóm huket*

<sup>47</sup> "Sotu bud gónó tekuy e hmingón du yóm kogot Dwata tau," mon Jisas, "hol lómón ke yóm huket tudà le e talak lanaw, ne tey dê kay utón él tawanen.

<sup>48</sup> Timbow deng hnok yóm huket, omin le demyol du ete kembu. Yó nmò le, sentólóng le yó kem utón tawan huket le. Lemwót yó kem utón hyu, sù le lu lem timbà. Ne fen gotu bot le yó kem utón sidek.

<sup>49</sup> Hol lómón yó se mò kmoen sok kól bè yóm hol són kdaw. Lemwót yó kem hógów Dwata gu bè longit, gotu sentólóng le yó kem tau gel mò du yóm hyu bè yó kem tau gel mò du yóm sidek.

<sup>50</sup> Yó kmò le yó kem tau sidek nmò le, gotu tudà le lu elem lanaw ofi. Ditu gónó le alì heslaf dmumu mkik, ne sembéhé kakim."

### *Yóm hlingón bè yóm kimu labi ne kimu lomi*

<sup>51</sup> Snólók Jisas bè yó kem gel lemolò du, monen, "Gotu glileb ye kô lanen ni kem hningónu ni?"

Mon le se, "El, Sér, glileb me."

<sup>52</sup> Bud mon Jisas, "Yóm tau gel tmolok hlau gnan, ke deng gfi bè kogot Dwata tau, hol lómón ke du yóm tau wen kimu labihen, ne wen kimu lomihen deng denfelen bè gónóen mò gónóhen gel ma yóm wen muhen du."

*Kekbê le ke Jisas bè Nasarit, yóm hol kun benwu  
(Mark 6:1-6; Luk 4:16-30)*

<sup>53</sup> Timbow deng gotu deng ktulón Jisas du kul ni kem gel hningónen ni, ominen lemwót bè yóm benwu yó, bud mulék ebè hol kun benwu.

<sup>54</sup> Yóm kkólen bè yó, tódô na a tmolok bè yóm gónó le gel stifun yó kem Ju. Ya tey ketnga le du yó kem tau hmungol du, mon le, "Gónón ma du ketngónen tmolok nim tau ni? Ne gónón lemwót yóm ktulusen mò du yó kem hentaw ton gel nmoen?

<sup>55</sup> Igoen se du ngà yóm tau gel mò gónô. Ne igò sem Midi du yóm yéen. Ne du se twogu le Jim ne Jusif ne Simun ne Judas.

<sup>56</sup> Ne yó kem libunen, nô le gu bè ni. Gónón lemwót de yóm tey khulungen nim tau ni?"

<sup>57</sup> Ne yó se gónó le kembê du.

Mon Jisas mò kul, "Yóm tugod Dwata, laen kô dù madat du bè yóm hol kun benwu. Dalang se yó kem hol kun fes lówó, là kô nadat le du. Tek són yó kem dumu tau bè tólóng benwu madat du."

<sup>58</sup> Lemwót bè yóm là kehtahu le du, là holen wen hentaw ton nmò Jisas bè yó.

## 14

*Kegbelen bè nawá Hirod yóm tehe kehfatayen ke Jan gel mabtays  
(Mark 6:14-29; Luk 9:7-9)*

<sup>1</sup> Bè yóm kdaw yó, gefet bè Hirod yóm gubérnor bè Galili, yóm gel nmò Jisas.

<sup>2</sup> Bè yóm kungolen du, monen mò yó kem tau smugung béléen, "Deng

duhen yó se yóm Jan tehe gel mabtays, deng bud mowil. Yó gónón wen ktulusen gembek mò du yó kem bentaw ton gel nmoen.”

**3-4** Yó gónó Hirod mon du yóm yó, abay se du yóm tehe hekfô ke Jan, lelen hfét du, ne heblangguen. Yó gónón mò du béléen yóm yó, lanen tehe mólów du bè yóm tehe kalawen ke Hirudiyas, yehen yóm twolihen boluyen Filip. Tehe gel monen mò ke Hirod, “Deng nuléhem yóm hlau tekuy yóm kalawem yehen twolihem yó.”

**5** Bè yóm kungol Hirod du yóm udél Jan yó, hol kóyóen ke tō kendel hfatayen Jan, okóm likò bè yó kem Ju, abay se dilô le hol tugod Dwata yóm Jan.

**6** Ni se tehe kmoen yóm katay Jan. Bè yóm tehe kkól yóm kdaw gel kehligal le du yóm tehe ksut Hirod, hadal le yóm ngà Hirudiyas libun lem blóng yó kem tey tau deng sbung bè yó. Ya tey kehyu nawa Hirod.

**7** Wen fasaden yóm ngà madal yó, monen, “Balù kihu nýóem, blayu kóm.” Gloken smafà béléen he.

**8** Lemwót se yóm ngà, snólóken bè yéen ke tedu yóm hninen bè Hirod. Ne yó mon yéen mò du monem mò ke Hirod, “Kulu Jan dé blayem do, hyónem do te huyów.”

**9** Timbow gungol Hirod yóm yó, ya tey sidek kegbeng lemen. Okóm lemwót bè yóm deng safaan bè yóm ngà yó, lel le mungol du yó kem tey tau wen bè yó, yó gónón tódô hemlus du béléen yóm hninen.

**10** Tahu se, tódô heklengen lihol Jan lem blanggù.

**11** Omin le mit kuluhen ne hyón le te huyów, blay le bè yóm ngà libun. Ne lemwót se kun, blayen ke yéen.

**12** Lemwót lówó Jan, fen nwa yó kem gel lemolò du, ne lebeng le. Timbow deng kebeng le du, omin le mógró ebè Jisas, tulón le du kdéen.

*Kehken Jisas yóm limu libu kem logi  
(Mark 6:30-44; Luk 9:10-17; Jan 6:1-14)*

**13** Bè yóm kungol Jisas du yóm deng glumfak Jan, kewót le bè yó són lu smakay ówóng etu fatu lanaw bè yóm gónón tinof. Ne e gungol yó kem tau yóm kewót le Jisas yó, tódô le lemwót se kul gu bè kul benwu, gotu le tmonok mentad hilol lanaw na le e lenebet Jisas.

**14** Timbow dmuung le Jisas, tódô tonen yó kem tey tau wen deng gna ebè yó. Ya tey kkoduhen kul, gotu hkóhen yó kem des le.

**15** Timbow deng kimel, mógró le ebè Jisas yó kem gel lemolò du, mon le, “Deng kimel ne ni, lelen là moni bè tau nim benwu ni. Dókem lu dé ni kem tey tau ni ebè tu kem benwu hmilol aní na le e bemli ken le.”

**16** “Omin he,” mon Jisas. “Tódô yu ne hemken kul.”

**17** Mon le se, “È, són nô bélê me bè ni, tek són limu botù mambang ne lewu tedek utón él.”

**18** “Nit ye edini kun,” mon Jisas.

**19** Tahu se. Omin Jisas gotu hyón yó kem tau bè yóm gónón ukol bnes. Ne nwahen yóm limu botù mambang ne lewu tedek utón él, ne temngel ebè longit, mni bè Dwata. Ominen kembéng yóm mambang, ne oguhen yó kem gel lemolò du aní sagid le ebè yó kem tau.

**20** Tódô kdé le se gotu mken ne gotu le bsow. Timbow deng kken le, gotu sentifun yó kem gel lemolò ke Jisas yóm lukas ken le, botong sfolò lewu abi.

**21** Yó kwen kem logi mken, botong limu libu. Là homong nsó le du kem libun ne kem ngà.

### *Kógów Jisas te él (Mark 6:45-52; Jan 6:15-21)*

**22** Kogolen bè yó, gotu hotun Jisas elem ówóng yó kem gel lemolò du, hegnahe lu efatu lanaw, ominen yó hulék yó kem tau.

**23** Timbow le deng gotu lemwót, lemwót se ke Jisas kun elem bulul tek sotuhem lanen na a mni bè Dwata. Ngangen nô bè yó lem bulul efet kifu tek sotuhem.

<sup>24</sup> Blaem yóm ówóng snakay yó kem gel lemolò du, deng kól talak lanaw. Ya tey keglayam le nan e senlong lu yóm tey lenos bong.

<sup>25</sup> Song sut bélê le Jisas deng móyón mwas, tódô mógo ta él ebélê le.

<sup>26</sup> Bè yóm kton le du yóm kógówen ta él, ya tey sidek klikò le, ofo kul mon du ke busaw. Botong le gotu lemangat.

<sup>27</sup> Omin Jisas kendel mudél ebélê le, monen, “Hgel ye nawa ye dé. Ou ni. Bê ye abay hlikò.”

<sup>28</sup> Hebko se ke Pitér, monen, “Ó Sér, ke tahu uu se yó, hógówem o edyó kun ta él.”

<sup>29</sup> “Géhéli sen,” mon Jisas.

Mung tódô kekmó Pitér ta yóm ówóng le, tódô mógo ta yóm él etu bë Jisas.

<sup>30</sup> Okóm timbow gnómen yóm tey kgel yóm lenos, tey sidek klikoen, ne tódô sen-gengen se tō lemneb elem él. Ne botong gdawaten Jisas, monen, “Tnóbóngem o, Sér.”

<sup>31</sup> Omin Jisas kendel kemfô du bë sigelen, monen, “Tey udì kehtahuhem nim uu. Moen du ke megewu nawam do?”

<sup>32</sup> Ne omin le motun elem yóm ówóng, ne tódô teflok se yóm lenos.

<sup>33</sup> Yó kem dumu gel lemolò ke Jisas nô lem yóm ówóng yó, botong tud le bukolle bë soluhem, mon le, “Tahu uu se yóm Ngà Dwata.”

### *Kkó Jisas des yó kem tau bë Ginésarit (Mark 6:53-56)*

<sup>34</sup> Ngang le mówóng efet le dmuung fi fatu yóm lanaw bë yóm benwu boluyen Ginésarit.

<sup>35</sup> Bè yóm kkól le bë yó, tódô kendel dilô le se Jisas yó kem tau bë yó, ne omin le gotu hetngón du bë yó kem benwu hmilol yóm deng kegdek Jisas bélê le. Tahu se, gotu nwit le ebè Jisas yó kem tau gemnóm des bélê le.

<sup>36</sup> Henkodu le bélén baluen ke olo le gemdù kilil nesen yó kem tau

gemnóm des. Tahu se, tódô kdéen tau gotu mdù nesen, tódô le gotu bud hyu.

## 15

### *Yóm tolok kem tau gnan (Mark 7:1-13)*

<sup>1</sup> Ne wen kem Farisi ne yó kem gel tmolok hlau mógo ebè Jisas, lemwo le bë syudad Jirusalim. Wen snolók le bélén, mon le,

<sup>2</sup> “Moen de kul yó kem gel lemolò kóm ke là lolò le du yó kem hlau yó kem tehe fù tekuy ekni? Là dog le na molob tdok gu laan le là deng mken.”

<sup>3</sup> Bnalà Jisas se lu, monen, “Wen se do snolók bélê ye. Moen se kuy du ke là lolò ye du yóm hlau Dwata, mom yó lolò ye yóm hlau lenbù nmò ye?

<sup>4</sup> Igò Dwata se mon du bë Sulaten, ‘Nadatem maem ne yéem.’ Ne sotuhem, ‘Yóm tau ke sidek kbaken ebè maen ne yéen, tódô hnatay kmò du.’\*

<sup>5</sup> Okóm yóm kuy gel tolak,” mon Jisas, “là kóen sidek kun ke mon te bë kem tuha tekuy, ‘Yóm tō blayu kuy, deng mom blayu ke Dwata.’

<sup>6</sup> Bè yóm ktolok ye yó, là kóen sidek ke là bud nadat te kem tuha tekuy. Ni se góón gfán yóm klaen dù mu ye du yóm hlau Dwata. Són lolò ye yóm kuy hlau lenbù nmò.

<sup>7</sup> Tey tau hemtedeng knô nim yu. Deng yu se góón e gbak yóm tehe udél Isaya, yóm monen,

<sup>8</sup> ‘Són bë sumóng góón le madat do ni kem tau ni, mon Dwata, okóm yóm nawa le tey mayuk bélén.

<sup>9</sup> Laen kô dù muhen yóm gel ktaba le ebélén, abay se són hlau lenbù nmò tau yóm gel tolak le, okóm bë ktolok le du, hol lómón ke hlau lemwo bélén.’ ”\*

### *Yóm góón là mólós bë Dwata yóm tau (Mark 7:14-23)*

<sup>10</sup> Ne bud senbung Jisas ebélén yó kem tey tau wen, monen mò kul, “Ni hol hnungol ye anì tngón ye.

<sup>11</sup> Là kóen lemwo bë yó kem kihu sungit yóm tau mit du là mólós bë

\* <sup>15:4</sup> Kehewà 20:12, 21:17, Hlolò 20:9, Hlau 5:16.

\* <sup>15:9</sup> Isaya 29:13.

Dwata. Okóm yó mit du là mólós, duhen yóm sidek kebkó gel btang bë sumóngon."

<sup>12</sup> Kogol yóm kudél Jisas yó, móggow le ebéléen yó kem gel lemolo du, ne mon le mó du, "Tey sidek kebut le kóm yó kem Farisi tu koni lemwojt bë yóm monem ebélé le."

<sup>13</sup> Ne bnalà Jisas lu, bede hningónen, monen, "Yóm hulu là kun hulu du yóm Ma bë longit, angat tódô kenduten.

<sup>14</sup> Tódô bayà ye lu yó kem Farisi yó. Hol lómón ke tau le butô tó nalak le kem dumu le butô. Ke salak honon butô, kaem angat le gotu geblos elem sol."

<sup>15</sup> Omin Pitér mudél ebè Jisas, monen, "Tulónem kum dé lanen yóm deng monem là mólós yó koni."

<sup>16</sup> Mon Jisas se, "Ilóem laen deng tngón ye kô kuy senta yó kem dumu tau?"

<sup>17</sup> Là tngón ye du kô balù kihu sungit yóm tau, tódô hlós elem blututen, ominen yó bud gel lemwa gu lem lówóhen.

<sup>18</sup> Okóm yóm sidek kebkó gel btang bë sumóng yóm tau, hono lemwojt lem hendemen, ne yó se mit du là mólós bë Dwata.

<sup>19</sup> Kdê yó kem nmò sidek, hono lemwojt bë kehedem tau, lómón yóm monok, ne mdà yehen, ne mó samuk, ne mnagaw, ne mó kéng, ne yóm tódô gel semtulón dumu tau.

<sup>20</sup> Yó se yó kem nmò góno tau là mólós bë Dwata. Tek élél yóm là na kolob tdok gu laan là deng mken."

### *Kehthau yóm sotu libun là Juhen (Mark 7:24-30)*

<sup>21</sup> Bud kewót Jisas bë yó, hlós ebè yóm benwu moni bë Tayal ne Sidon.

<sup>22</sup> Timbow le kól bë yó, wen sotu libun là Juhen lemwojt bë yó móggow ebéléen, libun semfu gu bë tau Kanan. Tódô hgelen udélen tmaba ke Jisas, monen, "Ó Sér, sfu tehe Dabid, hol knoduhem ou. Wen yóm ngau libun lengel matahen, ne tey sidek kehlayamen du yóm gel malak du."

<sup>23</sup> Okóm bà sekteb ke bnalà Jisas. Omin le móggow ebéléen yó kem gel lemolo du, mon le mó du, "Yake tódô hulékom yóm libun yó, sónmoeñ tendo hebnes huli tekuy."

<sup>24</sup> Omin Jisas mudél ebè yóm libun, monen, "Tek sóñ ebè yó kem tau Israél góno Dwata e hoggow dou, yakà mkél le bë yó kem ubiha tabag."

<sup>25</sup> Okóm tódô hegluduk bë ti Jisas yóm libun yó, monen, "Hol tnóbóngem o sen, Sér."

<sup>26</sup> Bud bnalà Jisas, bede hningónen, monen, "Là hyu mbot du bë kem ohu yóm kul ken kem ngà."

<sup>27</sup> Bud mon yóm libun, "Tahu se yóm monem yó, Sér. Okóm balù yó he kem ohu, sal gel ken le yó kem ubang ken gel btang gu te lemisa yóm tau funen."

<sup>28</sup> Omin Jisas mon du mó du, "Tey bong kehtahuhem, Lenibun. Yó ne, deng gutahem ne yóm hnihem béléu." Tahu se, tódô sen-gengen se mkó des yóm ngà yóm libun yó.

### *Kehkó Jisas des yó kem tau*

<sup>29</sup> Bud kewót Jisas bë yó mentad hilol Lanaw Galili, ominen hlós elem bulul, ne myón bë yó.

<sup>30</sup> Bë yóm knóen bë yó yó, tey dê tau bud móggow ebéléen. Gotu nit le ebéléen yó kem tau tugô, ne yó kem tau butô, ne yó kem tau tiked, ne yó kem tau umew, ne tey dê kem dumu tau gemnóm des snéen. Gotu sù le lu klokok ti Jisas, ne gotu kóhen se yó kem des le.

<sup>31</sup> Tey ketnga le du yó kem tau yóm kton le yó kem umew bud le gudél, yó kem tau tiked gotu bud hyu, ne yó kem tau tugô gotu bud mekteng kóggow le, yó kem tau butô gotu bud mton. Ya tey kdóyón le ke Dwata, yóm kul góno hemtahu yó kem tau Israél.

### *Kehken Jisas yóm fat libu kem logi (Mark 8:1-10)*

<sup>32</sup> Omin Jisas tmaba ebè yó kem gel lemolo du, ne monen mó kul, "Tey klayuk nawahu kul ni kem tau ni. Deng tlu kdaw le ni ne nô béléu bë ni, laen kô dù bud ken le. Ne là se móyóe

tódô hulék kul là mken, kô lenmek le gu bè lan.”

<sup>33</sup> Mon yó se kem gel lemolò du, “Bang tō góno tekuy ma du mò hken kul bè nim benwu laen hol tau menwu du ni yó kem tey tau wen ni?”

<sup>34</sup> Bud mon Jisas se, “Hilu botù de mambang nô bélê ye?”

Mon le se, “Tek hitu botù ne wen ngà utón élen.”

<sup>35</sup> Omin Jisas gotu hyón kul yó kem tey tau wen.

<sup>36</sup> Ne nwahen yóm hitu botù mambang ne yóm udì utón él, ne nan mni bè Dwata. Tikóng deng knihen, ominen kembéng du, ne hsagiden yó kem gel lemolò du.

<sup>37</sup> Gotu le mken kdê le, ne tódô le gotu gemtu. Timbow deng kken le, gotu sentifun yó kem gel lemolò du yóm lukasen, botong hitu abì.

<sup>38</sup> Yó kwen tau mken, botong fat libu logi, là homong nsó le du kem libun ne kem ngà.

<sup>39</sup> Omin Jisas gotu hulék yó kem tau. Lemwót kun bud motun elem yóm ówóng, mógów etu bè yóm benwu glem lem Magadan.

## 16

### Kójô le ke wen hentaw ton nmò Jisas

(Mark 8:11-13; Luk 12:54-56)

<sup>1</sup> Sotu kdaw bè yó, wen yó kem Farisi ne yó kem Sadyusi mógów ebè Jisas na le e tō tnílów, mon le mò du, “Moi kum kun yóm hentaw ton mò góno me hemtahu du yóm khógów Dwata kóm.”

<sup>2</sup> Okóm yó balà Jisas kul, monen, “Ke deng sdef kdaw, sal gel mon ye, ‘Angat mnóng kdaw ke haya, yakà hulô but longit.’ Ne tahu se.

<sup>3</sup> Ne ke hlafus, sal gel mon ye, ‘Angat kmulón ni kdeng, yakà hulô but longit.’ Ne tahu se. Tey ye hulung milô du yó kem gel ton ye bè longit, mon Jisas. Okóm là hulung ye temnef du yóm dê hton Dwata kuy nim kmoen ni.

<sup>4</sup> Hol monu sidek tau nim yu! Bà udì ke wen nawá ye ebè Dwata. Móyô

ye kô ke wen hentaw ton nmou lem blóng ye? Laen kô dù bud nmou ne, tek són nmou lem blóng ye, són yóm hentaw ton tehe ton le bè Juna ekni.” Ominen tódô tmagak kul.

*Ketgama yóm kul gel ktolokyó kem Farisi ne yó kem Sadyusi  
(Mark 8:14-21)*

<sup>5</sup> Timbow le deng kól fi fatu yóm lanaw le Jisas, tódô gbel bè nawa yó kem gel lemolò du yóm klaen dù mambang nit le mò bnotu le.

<sup>6</sup> Ne wen udél Jisas ebélé le, monen, “Hol ten-gama ye yóm kul bulung henok mambang yó kem Farisi ne yó kem Sadyusi.”

<sup>7</sup> Stulón le són lu yó kem gel lemolò du, mon le, “Yó dô gónon mon du yóm yó, yakà klifót tekuy du mit mambang.”

<sup>8</sup> Tódô tngón Jisas yóm sentulón le, yó gónon mon du mò kul, “Moen de ke sentulón ye yóm là kegwit ye bnotu? Tey udì kehtahu ye.”

<sup>9</sup> Efet ni he là deng glileb ye du dilóu yóm gel nmou. Hentulón ye nawa dé yóm kekbéngu limu botù mambang bè yóm limu libu kem logi, hilu abì de lukasen deng sentifun ye?

<sup>10</sup> Ne yóm le kekbéngu hitu botù mambang bè yóm fat libu kem logi, bud hilu abì lukasen?

<sup>11</sup> Là kô na e mambang du tendoken yóm tulónu yó koni. Mò ye là gmileb du du yóm monu? Hol ten-gama ye yóm kul bulung henok mambang yó kem Farisi ne yó kem Sadyusi.”

<sup>12</sup> Omin le yó he temngón du sundu bulung henok mambang du yóm tendoken, okóm yóm kul ktolok yó kem Farisi ne yó kem Sadyusi.

*Kdilô Pitér ke Jisas yóm Misaya, yóm deng kehkamal Dwata du yóm klamangen*

(Mark 8:27-30; Luk 9:18-21)

<sup>13</sup> Bud kewót Jisas bè yó, hlós le etu bè yóm benwu moni bè yóm syudad boluyen Seseriya Flipay. Bè yóm kkól le bè yó, snólók Jisas yó kem gel lemolò du, monen, “Tedu de kul kmò

kehedem du yó kem dumu tau yóm Ngà Tau?"

<sup>14</sup> Mon le se, "Wen se mon du, Jan kun yóm tehe mabtays. Mon kem dumu, Ilaydyá kun. Sotu tō kmon le du, Jirimaya kun, duhen ke wen bē yó kem dumu tugod Dwata ekni."

<sup>15</sup> Ne mon Jisas se mò kul, "Kmò kuy se du? Tedu se kuy kmò kehedem do du?"

<sup>16</sup> Fen bnalà Simun Pitér, monen, "Uu se yóm Misaya, yóm Ngà yóm Dwata laen kô dù tul katayen."

<sup>17</sup> Mon Jisas se mò ke Pitér, "Tey hyu kóm Simun ngà Jan, abay se là lemwoón bē tau yóm kdilóem do, okóm tódô lemwoón bē Mâ bē longit.

<sup>18</sup> Ni tódô tulónu kóm, lemwoón bē yóm udélem yó gónóhu moluy kóm Pitér, yó lanen botu. Ne bē nim botu ni gónóhu mbut hbegel yóm kehtahu le bélén yóm kdéen tau hemtahu bē klamangen benwu. Balù yóm hatay, là kô gatuen kul.

<sup>19</sup> Yó hmou kóm, blayu kóm yó kem kunsì bē yóm kwalisem bē yóm benwu nogot Dwata. Yó se nmò kenbéem talak tonok, yó se angat bud kenbê Dwata bē longit snéen. Ne yó se nmò là kenbéem du, là se kenbê Dwata du bē longit."

<sup>20</sup> Tey mget ktulón Jisas du yó kem gel lemolo du anì là tulón le du bē dumu tau ke du yóm Misaya.

### *Tanay ktulón Jisas yóm angat keglayamen ne katayen*

(Mark 8:31-9:1; Luk 9:22-27)

<sup>21</sup> Nbuten bē yó ne, tódô gel hnakan Jisas tmulón du bē yó kem gel lemolo du yóm angat keglayamen, monen, "Là gbeku du ke là mógo we ebè Jirusalim. Bè yóm kkólu bē yó, angat hnayam le o yó kem tuha góno tekuy gel galak, ne yó kem tau geta gel demsù ebè Dwata, ne yó kem tau gel tmolok hlau. Ngang le mò du efet hfatay le ou. Okóm bē getluhen kdaw, angat bud hlowil Dwata o."

<sup>22</sup> Omin Pitér mit ke Jisas hlayuk udì, ne bnólówen, monen mò du,

"Teya he yó, Sér. Yake béen dohò kut yóm monem yó."

<sup>23</sup> Beklil se Jisas ebè Pitér, monen, "Hlayuki béléu, Seitan. Béem tō henseng yóm nógówu. Là kóen lemwoón bē Dwata yóm kehedemem yó, kaem kehedem tau te tonok."

<sup>24</sup> Ne bud mon Jisas mò yó kem gel lemolo du, monen, "Ke wen tau móyô lemolo do, song hyu ke tódô tebelen yóm kun kóyô, ne eles tnihangen yóm kun kros, ne ominen yó lemolo do.\*

<sup>25</sup> Yóm tau ke knamaen klowilen, angat lana béléen yóm klowilen yó. Okóm yóm tau ke là knamaen du klowilen lanen lemolo do, angat gutahen yóm klowil laen dù sónen.

<sup>26</sup> Anien he yóm tau ke gotu gfunen klamangen benwu, laen kô dù ofolen du yóm deng gfunen yó ke lana béléen yóm klowil laen dù sónen. Ke lana béléen yóm klowil yó, laen kô dù bud góón ma du yóm mò tlesen.

<sup>27</sup> Yakà angaten bud semfulék edini yóm Ngà Tau," mon Jisas. "Bè yóm kesfuléken yó, gfan béléen yóm tey kegeta Maen, ne gotu le mung du yó kem gel hóngó Dwata gu bē longit. Bè yóm kdaw yó, tódô gotu blayen yó kem tau yóm balà yóm tehe deng gel nmò le.

<sup>28</sup> Tódô tulónu kuy ktahuhen, angat wen he bélê ye bē ni gmafit mton du yóm bud kesfuléken edini yóm Ngà Tau mò kmamal yóm klamangen."

## 17

### *Kesfili kton le ke Jisas*

(Mark 9:2-13; Luk 9:28-36)

<sup>1</sup> Timbow deng bud nem kdawen bē yó, lemwoón Jisas mneged ebè yóm sotu bulul geta, nwiten Pitér ne yó kem lewu tau setwoli Jim ne Jan, tek sónen lu.

<sup>2</sup> Bè yóm knô le bē yó, tódô sfilí kton le ke Jisas. Yóm lem uyóhen hol lómón nóng mata kdaw, ne yóm nesen tódô gotu sminang bukay.

<sup>3</sup> Ne tódô hetnga ton le se Musis ne Ilaydyá, stulón le ke Jisas.

\* <sup>16:24</sup> Yóm kros mon Jisas yó, hningónen yóm là klikò le matay bē yóm klolò le du.

<sup>4</sup> Mung tódô kudél Pitér ebè Jisas, monen, "Hyu ni, Sér, deng me nô bê ni. Ke móyói, hdae tlu lowig, sotu kóm, sotu ke Musis, sotu se ke Ilaydya."

<sup>5</sup> Yóm igò Pitér tolo mudél, tódô lememek eta le yóm tey lobun sminang bukay, tódô gungol le yóm mudél gu lemen, monen, "Ni se hol dou Ngà, gónón nô nawahu. Tey kligalu béléen. Hol gel hnungol ye."

<sup>6</sup> Bè yóm kungol le yóm udél yó, tódô le gotu hegluduk lemfen bê tonok yó kem tau mung ke Jisas, ya tey sidek klikò le.

<sup>7</sup> Okóm mógów ebélê le Jisas, ne nenoken lu, ne monen mò kul, "Mdà ye dé. Bê ye mom hlikò."

<sup>8</sup> Omin le tukóng eta, laen kô dù bud tau ton le, tek són Jisas.

<sup>9</sup> Bud kewót le bê yó, mulék le mosol. Tey kget kmon Jisas du mò kul, "Hol bê ye tagad tulón yóm deng ton ye yó koni ke là nan na mowil yóm Ngà Tau."

<sup>10</sup> Snólók le bê Jisas yó kem tau mung du yó koni, mon le, "Tahu kô yóm gel mon yó kem tmolok hlau, nan gna kól he yóm tehe Ilaydya, ominen kól yóm Misaya?"

<sup>11</sup> Bnalà Jisas se, monen, "Tahu se yó, nan gna kól yóm Ilaydya mò eles hemtifes yóm kdéen.

<sup>12</sup> Okóm tódô tulónu kuy," mon Jisas, "deng sut se Ilaydya, okóm laen kô dù tau dmilô du. Tódô nmò le béléen yóm kul knóyô. Senged se yóm angat nmò le bê yóm Ngà Tau, angat tey kehlayam le du."

<sup>13</sup> Ne tódô tngón yó kem tau mung du yó, ebè Jan yóm tehe gel mabtays gónón gbak yóm tulón Jisas ni.

### *Hdó Jisas yóm tulus seitan malak yóm ngà*

(Mark 9:14-29; Luk 9:37-43a)

<sup>14</sup> Tikóng le deng bud semfulék ebè yó kem tey tau sbung le Jisas, wen sotu tau sut béléen, tódô tuden bukolen bê soluhem, monen mò du,

<sup>15</sup> "Ó Sér, hol knoduhem yóm ngau, wen desen snidaf. Ya tey sidek

kehkengkelen ke sok gel sut béléen. Wen se gónón gel mugod elem ofi duhen elem él.

<sup>16</sup> Deng nitu ebè yó kem gel lemolò kóm, okóm là gbek le du."

<sup>17</sup> Omin Jisas mudél, monen, "Yu kem tau kmoen ni, alì ye hemda. Gel sekban yóm kehedem ye. Deng tey kegenu ne nô lem blóng ye, ne deng tey kehlawihu nawahu bélé ye. Nitem edini kun yóm ngaem." Tahu se, niten ebéléen.

<sup>18</sup> Tódô hdó Jisas yóm gel malak yóm ngà yó, ne sen-gengen se tódô hyu yóm ngà.

<sup>19</sup> Kogolen bê yó, mógów le ebè Jisas yó kem gel lemolò du, tek són lu, mon le mò du, "Moen de kum ke là gbek me hdó yóm tulus seitan malak tum ngà tu koni?"

<sup>20</sup> Mon Jisas se, "Abay se tolo udì kehtahu ye. Tódô tulónu kuy ktahuhen, ke bnotù tekuy yóm kehtahu ye, anien ke olon senged bê kutit yóm lem hulu boluyen mustard, botong gbek ye tódô mon du bê yóm bulul nii, 'Milihi etuu.' Nénégem kà tódóen mili. Laen kô dù là gbek ye du.

<sup>21</sup> Okóm yóm tulus seitan malak yóm ngà yó koni, tek sotu hdó du, tek són yóm kni ye bê Dwata, mung du yóm kfasting ye."

### *Yóm gewu dulék Jisas eles tmulón du yóm angat katayen* (Mark 9:30-32; Luk 9:43b-45)

<sup>22</sup> Sotu kdaw bê yó, gotu le stifun bê Galili yó kem gel lemolò ke Jisas, ne mon Jisas mò kul, "Angat blay le elem tdok yó kem tau yóm Ngà Tau

<sup>23</sup> mò hfatay le. Okóm bê getluhen kdaw, bud hlowil Dwata." Bè yóm ktulón Jisas du kul nim ni, ya tey sidek keblat nawa le du yó kem gel lemolò du.

### *Yóm kbayad Jisas bê Gónô Dwata*

<sup>24</sup> Timbow le gefet bê Kapérnaum le Jisas ne yó kem gel lemolò du, wen kem tau fen gel mtuk yóm bayad bê Gónô Dwata kól bê Pitér, snólóken, monen, "Gel mayad kô kun yóm tau gónó ye gel htolok yó?"

<sup>25</sup> Mon Pitér se, "Igò se." Kewót Pitér bë yó, husek elem gónô le.

Unihen husék, tódô kendel wen snólók Jisas béléen, monen, "Ó Simun, tedu kóm kehedem du nim ni? Bè ni te tonok, tau du se fen gel mayad bwi, bë yóm tau hol geta, kem ngaen kô, duhen ke yó kem tau knamalen?"

<sup>26</sup> Bnalà Pitér se, monen, "Yó kem tau knamalen."

Mon Jisas se, "Ke lómón yó, là dog le mayad ne yó, yó kem hol kun ngà."

<sup>27</sup> Okóm là hyuhen ke hebut tekuy lu ni kem tau mtuk ni. Yake lemwóti dé ebè lanaw na a dmulé. Nwahem yóm utón él tanay semkot ne yóm filak mgel tonem lem baken, yó se mò kut bayad lewu te."

## 18

### *Yóm hol geta bë yó kem tau nogot Dwata*

(Mark 9:33-37; Luk 9:46-48)

<sup>1</sup> Bè yóm kdaw yó, mógo le ebè Jisas yó kem gel lemolo du, snólók le béléen, mon le, "Tau du se hol geta bë yó kem tau nogot Dwata?"

<sup>2</sup> Bè yóm kbalà Jisas kul, wen ngà tnababen ebéléen, hdaen lem blóng le,

<sup>3</sup> monen, "Ngem nim ngà nii, là kô ktesen du yóm kegetahen. Tódô tulónu kuy ktahuhen," mon Jisas, "ke là tenles ye du yóm kuy kehedem lómón yóm kun kehedem nim ngà ni, là kô ye na a gmung bë kogot Dwata tau.

<sup>4</sup> Duhen yó, yóm tau là hegetahen knóen bë kem dumuhén lómón yóm kun nmò nim ngà nii, du se yóm hol geta bë yó kem tau nogot Dwata.

<sup>5</sup> Ne ke wen tau hmódó yóm sotu ngà lómón yóm ngà nii mlan bë dou boluy, lómón se ke o ne yóm hnódóhen."

### *Ketgama yóm sindil*

(Mark 9:42-48; Luk 17:1,2)

<sup>6</sup> Bud mudél Jisas, monen, "Ke yó nmò yóm sotu tau, ke lemwót béléen gónóhen là bud hemtahu bélén yóm sotu ngà, mom hyu bë yóm tau yó he ke tódô bot elem mohin gu laanen

là deng wen ngà hebtangen, tléwéng bë liholen yóm botu bong gónó le gel gmaling mò heblaten etlaan.

<sup>7</sup> Tey kodu le yó kem tau talak tonok, abay se tey dê mit kul là hemtahu. Sal gel sut bë tau se yóm yó, okóm angat tey tafaken yóm tau mò du.

<sup>8</sup> Yó gónóm mon, ke doli sigelem duhen ke doli tihem mit kóm là hemtahu, hyu ke tódô kenlengem, ne botem. Mom hyu béléem he ke lana béléem doli tihem duhen ke doli sigelem syan ke gutahem yóm klowil laen dù sónen. Laen kô ofolem du yóm klewu tihem ne klewu sigelem ke deng mom niten uu elem lanaw ofi, yóm ofi laen kô dù tul katayen.

<sup>9</sup> Ke sotu matahem mit kóm là hemtahu, tódô lensitem, ne tudaem. Mom hyu béléem he ke lana sotu matahem syan ke gutahem yóm klowil laen dù sónen. Laen kô dù ofolem du yóm klewu matahem ke deng mom tudà le uu elem lanaw ofi."

### *Yóm hlingón bë yóm ubiha tabag*

(Luk 15:3-7)

<sup>10</sup> "Huy ke béen abay wen hen-gnok ye bë ni kem ngà nii. Tódô tulónu kuy, eles wen yó kem hógów Dwata tendo gel nô bë Må bë longit fen gel semgyok kul.

<sup>11</sup> Yó hol nógówen elem benwu yóm Ngà Tau, nan e tnóbóng yó kem tau deng lana.

<sup>12</sup> Mò kehedem ye du se kuy? Ke wen tau mfun lematu ubiha, mò kmoen du de ke sotu lana bélén le? Ngem kà nan na tebel du yó kem syóm folò syóm bë yóm gónón hótób kul talak bilil nan e hnebel yóm sotu tabag bélén le.

<sup>13</sup> Bè yóm ktonen du, tey kligalen. Tódô tulónu kuy ktahuhen, tey bong he kligalen du yóm sotu lana deng tonen senta yó kem syóm folò syóm là lanahen.

<sup>14</sup> Senged se knawa yóm Må tekuy bë longit. Là kóen móyô ke sotu bë yó kem ngà lómón ni ke tó lana bë soluhén."

*Ktolok Jisas yóm kmò keseflifót*

**15** “Ke wen gónón gemsalà béléem yóm dumuhem hemtahu, tódói mógrów ebéléen, ne sentulón ye són yu lewu ye yóm salaen béléem. Ke hnungolen uu, bud mulék hyu yóm keswè ye.

**16** Okóm ke là hnungolen kóm, miti sotu duhen ke lewu tau mò dumuhem bë yóm bud kógowem ebéléen anì gloloem yóm deng monen bë Sulat Dwata, yóm monen, ‘Ke wen gónóm tmifù dumum tau, hyu ke wen lewu duhen ke tlu tau mò fen hmungol du yóm monem.’

**17** Okóm ke là dog hnungolen kul, tódô gotu tulón ye yóm kdéen bë góno le gel stiful yó kem Ju. Okóm ke là dogen hmungol balù yóm deng kwit ye du bë góno le gel stiful yó kem Ju, hol lómón kmò ye ebéléen, lómón yóm kmò ye ebè yó kem tau là hemtahuhen bë Dwata, ne bë yó kem dumu tau gemsalà.”

### *Yóm gel kenbêye, neyóm là kenbêye du*

**18** “Tódô tulónu kuy ktahuhén,” mon Jisas, “yó se nmò kenbê ye talak tonok, angat bud kenbê Dwata bë longit snéen. Yó se nmò là kenbê ye du, là se kenbê Dwata du bë longit snéen.

**19** Ni mò hol sù ye bë nawa ye. Anien ke tek lewu tau mni bë Dwata, ne deng ssotu nawa le mni du yóm hni le, tódô blay Mà bë longit kul yóm hni le béléen yó.

**20** Baluen he ke tek lewu duhen ke tlu tau stiful mlan bë dou boluy, senged knou bélê le.”

### *Yóm hlingón bë yóm tau là hnifóten ke dumuhén*

**21** Omin Pitér mógrów ebè Jisas, wen snólóken béléen, monen, “Ó Sér, ke sónmoeñ gemsalà bélén yóm dumuhén, hilu duléku de hmifót du? Hitu duléku kô?”

**22** Bnalà Jisas se, monen, “Là tek hitu duléken du, okóm hitu folò duléken hitu kehlifót du.

**23** Abay se yóm kogot Dwata tau, hol lómón yóm sotu hningónu ni. Tehe yu ekni, wen sotu tau hol geta kun

mtuk bayad bë yó kem tau gel mò nmò béléen.

**24** Yó tanay nit le ebéléen yóm sotu tau mutóng deng hilu kati filak.

**25** Okóm yóm tau ni koni, laen kô góno ma mò bud bayaden du yóm tey utóngen yó. Yó tódô tô nmò yóm tau hol geta béléen, tódô tô hbaluen mò klifen, mung du yehenen ne kem ngaen, kkólen bë yó kem kimuhén mò mayad du yóm nutóngen.

**26** Okóm tódô na a kendel mtud bukol bë solu yóm tau hol geta yóm tau yó, monen, ‘Nam hanay kut nawam, Sér, angat gotu bnayadu he yó yóm utóngu béléen.’

**27** Tahu se, tódô bud mulék kodusuhén du yóm tau hol geta yóm tau yó koni. Tódô hnifóten béléen yóm utóngen yó koni, ne tódô hewaen snéen.

**28** Timbow deng gewà yóm tau yó koni, bud glebeten se yóm sotu dumuhén mò nmò tehe mutóng béléen, bede olo hilu filak yóm kun utóng. Ominen tódô mogot du nan e nmò hemlong du, monen, ‘Géhél bnayadou ni.’

**29** Okóm yóm dumuhén yó, tódô na a hegluduk bë solu yóm góno mutóng, monen, ‘Nam hanay kut nawam, Wè, angat gotu bnayadu he yó yóm utóngu béléen.’

**30** Okóm là kóen dog móyô yóm tau mtuk yó, mom heblangguen efet gbayaden yóm utóngen béléen.

**31** Timbow ton yó kem dumu tau mò nmò bë yóm tau hol geta yó, ya tey sidek kegnóm le du. Omin le mógrów ebè yóm tau hol geta bélê le, ne gotu tulón le du kdéen.

**32** Kewót yóm tau hol geta, bud htahaben yóm tau yó koni. Mung ktonen du, monen, ‘Tey hesek laen dù mu yóm uu. Deng hnifót béléem yó kem tey utóng bongem lemwo bë yóm kehkoduhem bélén.

**33** Moen de ke là knoduhem du kedumuhem lómón yóm deng dou kkodu kóm?’

**34** Ya tey sidek kebut yóm tau hol geta yó koni. Tódô heblangguen mò

tafaken du efet gbayaden yóm hol són utóngen."

<sup>35</sup> Bud mon Jisas, "Lómón sem ni ne angat nmò Mà bè longit bélè ye ket kuy ne sotu ke là tahu hnifót ye yó kem dumu ye gemsalà bélè ye."

## 19

### *Ktolok Jisas bè keskó tau syehen (Mark 10:1-12)*

<sup>1</sup> Timbow deng ktulón Jisas ni kem ni, ominen bud lemwót, tnagaken prubinsya Galili, mógrów etu bè yó kem dumu benwu bè prubinsya Judiya fi fatu yóm él boluyen Jurdan.

<sup>2</sup> Tey tau wen bud huli du, ne gotu hkó Jisas yó kem gemnóm des bélè le.

<sup>3</sup> Yóm knóen bè yó, wen kem Farisi mógrów ebéléen, wen snólók le béléen mò dalil gónó le dmuón du, mon le, "Là sideken bè hlau tekuy kô ke skó bè yehenen yóm tau balù kihu buten?"

<sup>4</sup> Bnalà Jisas lu, monen, "Deng hónô senfala ye yóm monen bè Sulat Dwata. Bè yóm hol kbuten nmò Dwata yóm tau, logi ne libun.\*

<sup>5</sup> Yó mon Dwata,  
'Yó gónóm mon, gtagaken maen  
ne yéen yóm logi ne setnù le  
yóm tuha libunen,  
ne baling le ssotu yóm lewu le  
yó.\*'

<sup>6</sup> Yó gónóm mon, là kô le bud stólóng ne yó kem tau syehen, deng le baling ssotu ne. Duhen yó, yóm deng kun sensotu Dwata, béen abay wen tau bud semkó kul."

<sup>7</sup> Bud snólók le béléen yó kem Farisi, mon le, "Ke lómón yó, moen se ke tehe snulat Musis yóm sotu hlau, yóm monen, 'Ke móyô skó bè yehenen yóm logi, nan ne wen sulat gónón fema mò ilô yóm deng kkóhen du?'"\*

<sup>8</sup> Bnalà Jisas se, monen, "Yó gónó Musis smulat du yóm hlau yó, lemwót bè yóm ali kehlom nawa ye mò sidek se. Okóm bè hol kbuten, là kô na a kóyô Dwata du se yóm skó bè yehen.

<sup>9</sup> Tódô tulónu kuy," mon Jisas, "yóm logi ke kóhen yehenen igoen se là mdà du ne ke bud myehen dumu libun, yó nmoeñ yóm tau yó, deng ndaen ne yóm libun gna yehenen."

<sup>10</sup> Mudél le se kul yó kem gel lemolò ke Jisas, mon le, "Ke là se gbek me skó bè yehen me, dog myehen ne yó."

<sup>11</sup> Bnalà Jisas se lu, monen, "Là kdéen du tau gembek du yóm là myehen. Són gónón gembek du ke tódô Dwata mò du.

<sup>12</sup> Sal stólóng se yóm but gónó le là myehen kem tau. Wen se là myehenen, abay se wen igit le lemwót bè ksut le. Wen se là myehenen lan le kmafun kul. Wen se là myehenen lemwót bè kimón le yóm hmò Dwata kul. Yó se tau gembek lemolò du ni kem monu ni, hol loloen."

### *Kni Jisas kul bè Dwata yó kem ngà lemnek (Mark 10:13-16; Luk 18:15-17)*

<sup>13</sup> Wen se kem tau mit ngà ebè Jisas anì na le e hnok du, ne anì hninen lu bè Dwata. Okóm yó kem gel lemolò ke Jisas, mom bnólów le lu.

<sup>14</sup> Okóm mon Jisas, "Heflós ye lu edini yó kem ngà yó, bê ye abay henseng lu. Abay se yó kem tau nogot Dwata, hol le mkél bè knawa ni kem ngà lómón ni."

<sup>15</sup> Omin Jisas gotu mnok kul ne mni bélè le bè Dwata, ominen hlós ebè yóm gónón e solu.

### *Yóm lomi tau wen kendengenen (Mark 10:17-31; Luk 18:18-30)*

<sup>16</sup> Sotu kdaw bè yó, wen sotu tau mógrów ebè Jisas, monen, "Ó Sér, wen snólóku bélém. Tedu de yóm hyu mò nmou anì gutahu yóm klowil laen dù sónen?"

<sup>17</sup> Bnalà Jisas se, monen, "Moen de ke snólókem bélém yóm hyu? Tek són Dwata yóm hyu. Ke hendeenem yóm klowil laen dù sónen, hol nimónem yó kem kun hlau Dwata."

<sup>18</sup> Mon yóm tau yó, "Hlau du de, Sér?"

\* <sup>19:4</sup> Tekang Kbuten 1:27 ne 5:2. \* <sup>19:5</sup> Tekang Kbuten 2:24. \* <sup>19:7</sup> Hlau 24:1.

Bud mon Jisas se, "Béi monok. Béi mdà yehen. Béi mnagaw. Béi tmifù kóng.

<sup>19</sup> Nadatem maem ne yéem. Kenbong nawahem kem dumuhem lómón kbong nawahem yóm kóm knô."\*

<sup>20</sup> Bud mudél se yóm lomi tau yó, monen, "Deng gotu lolou yó kem yó, Sér. Tedu de duen?"

<sup>21</sup> Bud bnalà Jisas se, monen, "Ke móyói hol gulit, tu ne muléki nam e hbalù kdê nô béléem, ne blayem bè tu kem élél yóm blihen. Ke yó nmoem, angat wen tey kendengenem bè longit. Ne lemwót yó dum kóm, loloem ou."

<sup>22</sup> Timbow gungol nim lomi lemnok ni koni yóm udél Jisas ebéléen yó, tódô lemwót, ya tey sidek keblat nawahen, abay se nalihen yóm tey kendengenen.

<sup>23</sup> Omin Jisas mudél ebè yó kem gel lemolò du, monen, "Tódô tulónu kuy ktahuhen, tey mgel bè yóm tau wen kendengenen ke tó hogoten ke Dwata klowilen.

<sup>24</sup> Bud nulitu bélê ye. Tey mgel bè yóm tau wen kendengenen ke tó hogoten ke Dwata klowilen. Mom mahil he yóm kamél ke hfusek te bè yóm sol dalum."

<sup>25</sup> Bè yóm kungol le du yó kem gel lemolò ke Jisas yóm monen yó, tey ketnga le du, mon le, "Ke lómón yó, tau du de gembek gmuta du yóm klowil laen dù sónen."

<sup>26</sup> Temngel ebélê le Jisas, monen, "Ke bè tau, là gbeken du. Okóm bè Dwata, laen dù là gbeken du."

<sup>27</sup> Omin Pitér mudél se kun, monen, "Ngem ni dém mi, Sér, glok me tódô gemtagak yóm kdéen lan me lemolò kóm. Bang tó ofol me se kum du?"

<sup>28</sup> Mon Jisas se mò kul, "Tódô tulónu kuy ktahuhen, ke deng kól yóm lomi benwu, ne ke deng bangen myón bè yóm góñóhen myón kmamal yóm Ngà Tau, wen snéen góñó ye myón kmamal bè yó, yu kem sfolò lewu gel lemolò do ni. Angat ye fen mogot

kukum bè yó kem sfolò lewu bung tau semfu gu bè yóm tehe Israél.

<sup>29</sup> Ket tau, ke gloken gemtagak góñóen, ne yó kem dumuhem setwoli, ne yó kem tuhahen, kkólen bè yó kem ngaen, duhen ke tonoken lanen lemolò do, lematu dulék Dwata he bud hulék du ebéléen yóm deng gtebelén yó. Ne lelen yó he angat gmuta du yóm klowil laen dù sónen.

<sup>30</sup> Bede angat tey dê bè yó kem tau deng gegna nim kmoen ni, angat le bud ghuli bè yóm kdaw yó. Ne yó kem ghuli nim kmoen ni, angat le bud gegna bè yóm kdaw yó."

## 20

### *Yóm hlingón bè yó kem tau mò nmò*

<sup>1</sup> Bud mon Jisas mò kul, "Yóm kogot Dwata tau, hol lómón ke yóm sotu tau lamang grép huluhen. Sotu kdaw, tódô temkifu lemwót na a mebel tau mò nmò bè yóm huluhen yó.

<sup>2</sup> Tahu se, wen tau tonen, ne eles sentulón le gna yóm kmò ksukéyen kul sendaw. Ominen yó hewót kul mò nmò.

<sup>3</sup> Timbow deng sóól mneged kdaw, ominen bud lemwót ebè fedyan yóm tau fun hulu, wen tau tonen bliwel mdà gu bè yó laen dù nmò le.

<sup>4</sup> Ne monen mò kul, 'Ke móyô ye, ne ye e mò nmò bélén bè hulu. Henyuhu he ksukéyú kuy.'

<sup>5</sup> Tahu se, na le e mò nmò yó kem tau yó. Timbow deng gtungu kdaw, bud mebel tau yóm fun hulu. Ne bud sóól mosol kdaw, bud yó se nmoen.

<sup>6</sup> Timbow móyónen sdef kdaw, ominen bud lemwót, ne tolo wen he dumu tau mdà gu bè yó bè fedyan, snólóken bélê le, monen, 'Moen ke tódô ye mdà bè ni laen dù nmò?"

<sup>7</sup> Bnalà le se, mon le, 'Laen dù tau hmò kum nmò.'

Bud monen se mò kul, 'Mò ye nmò bélén dé bè hulu. Tahu se, na le e mò nmò.'

<sup>8</sup> Timbow deng seklewet bè yó, ominen mon du mò yóm tau snaligen, 'Tnabahem ne yó kem tau mò nmò,

\* <sup>19:19</sup> Kehewà 20:12-16, Hlolò 19:18, Hlau 5:16-20.

ne snukéyem lu. Gna snukéyem yó kem tau huli sut, ngangen efet kól bë yó kem tau tanay sut.'

<sup>9</sup> Tahu se, gna bnayaden yó kem tau hol són huli sut. Tódô blayen kul yóm sukéy geblà bë yóm sukéy le sendaw.

<sup>10</sup> Ngangen ne snukéyen yó kem tau gna sut bë yó. Ofo kul ke bong kul sukéy, okóm là. Tódô senged se.

<sup>11</sup> Bè yóm kton le du, tey kestulón le du yóm tau fun hulu yó,

<sup>12</sup> mon le mò du, 'Yó kem tau huli sut yó, là dengen legen he yóm kul kmò nmò, hanà tek sotu uras le. Blaem nim kum, deng sendaw me ni ne htanggas bë nóng kdaw, tódô kóem gotu hsengedem sukéy me.'

<sup>13</sup> Bnalà yóm tau fun hulu yóm sotu tau mudél ebéléen, monen, 'Ó Wè, là kô lenugihu kóm. Igò tekuy sem deng hyu semtulón du du eginu yóm sukéy ye sendaw.

<sup>14</sup> Nwa ye ne yóm sukéy ye, ne mulék ye. Tódô dou kójô hsenged du yóm kun sukéy yóm tau huli sut bë yóm kuy.

<sup>15</sup> Ilóem laen dù dou kwalis mò du yóm dou kójô bë yóm dou filak? Nofô ye kô yóm kkoduhu yó kem tau huli mò nmò?"

<sup>16</sup> Ne bud mon Jisas mò kul, "Yó kem ghuli ni kmoen ni, angat bud gegna. Ne yó kem gegna ni kmoen ni, angat bud ghuli."

### *Getlu dulék Jisas tmulón du yóm angat katayen*

(Mark 10:32-34; Luk 18:31-34)

<sup>17</sup> Bè yóm tolo ksubô le Jisas ebè Jirusalim, niten hlayuk udì yó kem sfolò lewu gel lemolvò du, wen tulónen kul sónen lu, yó monen mò kul,

<sup>18</sup> "Ngem nim kógów tekuy ebè Jirusalim ni, sok kuy kól ditu, angat eted le yóm Ngà Tau elem tdokyó kem geta bë yó kem gel demsù ebè Dwata, ne yó kem tau gel tmolok hlau. Yó angat kukum le du, hatay.

<sup>19</sup> Ne angat blay le elem tdok yó kem tau là Ju le. Tey kehlowon le du, ne lelle mfes du, ngangen efet tnutuk

le bë kros. Bede bë getluhen kdaw, tódô bud hlowil Dwata."

### *Yóm tō hni tuha libun Sibidi bë Jisas (Mark 10:35-45)*

<sup>20</sup> Timbow kogolen bë yó, móglow bë Jisas tuha libun Sibidi, mung du lewu ngaen logi. Tódô tuden bukolen bë solu Jisas, wen tō nójô hninen béléen.

<sup>21</sup> Ne mon Jisas se mò du, "Moem de?"

Monen se, "Wen tō hnihu béléem dé, Sér. Kesok deng kól du yóm kegetahem, kójou ke fasadem dou ke angat le myón klokokem ni kem lewu ngau ni, sotu fi bë kwananem ne sotu se fi bë iwóngem."

<sup>22</sup> Bnalà Jisas se, bede mudél ebè yó kem lewu ngaen, monen, "Là kô tngón ye du yóm hni ye yó. Gbek ye hembala du kô ke yu gemfà du yóm angat glumfaku?"

Mon le se, "Gbek me."

<sup>23</sup> Mon Jisas, "Tahu se, angat glumfak ye se yóm dou glumfak. Okóm laen dù kwalisu mélék du yóm tau myón fi bë kwananu ne fi bë iwóngu. Dwata se mò du yóm yó. Deng wen ne eles néléken mò angat hyónen bë yó."

<sup>24</sup> Timbow gungol yó kem sfolò gel dumu le lemolvò ke Jisas yóm hni yó kem lewu tau setwoli yó, ya tey sidek kebut le kul.

<sup>25</sup> Omin Jisas gotu bud semtiful kul, monen mò kul, "Deng hónô tngón ye ne kul kmò yó kem tau hol geta talak tonok, tey gel kdansók le yó kem tau nogot le. Ne yó kem tau mogot kukum, tey gulé kwit le yóm kukum nogot le.

<sup>26</sup> Okóm bélê ye kuy, là kô yó du yóm hyu bélê ye. Ke wen sotu bélê ye móyô ke du baling geta bë kem dumuhén, yake hol nô béléen yóm nawa yóm tau gel tóbóng lówo.

<sup>27</sup> Ne ke wen bélê ye móyô ke du hol gegna bë kem dumuhén, yó dé kmoen lem blóng ye, lómón ke du yóm klifen ye.

<sup>28</sup> Yakà lómón ni du se yóm kun nmò yóm Ngà Tau. Là kô yó du nógówen edini ke fen na a hdatù lem blóng

kem tau. Okóm yó nógówen mò na e tmóbóng kul. Angat hamaen yóm kun klowil mò msok yó kem tey dé tau gu lem hatay."

*Kehton Jisas yó kem lewu tau butô  
(Mark 10:46-52; Luk 18:35-43)*

<sup>29</sup> Timbow le bud lemwót gu bè Jiriku le Jisas ne yó kem gel lemolò du, ya tey tau wen bud mung du.

<sup>30</sup> Ne wen lewu tau butô myón bè kilil lan. Tikóng gungol le yóm klan Jisas bè yó, tódô kendel henmung le tmaba, mon le, "Ó Sér, sfu tehe Dabid, hol knoduhem mi."

<sup>31</sup> Okóm deng mom senbólów le lu yó kem tey tau bè yó, mon le, "Bé ye abay hebnes tmaba." Tnódónem mom hennoli le tmaba, "Ó Sér, sfu tehe Dabid, hol knoduhem mi."

<sup>32</sup> Timbow gungol Jisas yóm ktaba le, tódô hegsud mdà, ne ominen tmaba kul ebéléen, monen, "Tedu de yóm tō hmò ye do?"

<sup>33</sup> Mon le se, "Htonem mi, Sér."

<sup>34</sup> Ya tey kkodu Jisas kul yó kem tau yó, ominen mnok bè mata le. Tódô sen-gengen se yóm bud kton le, ne tódô henmung lolò le Jisas.

## 21

*Khódó le ke Jisas bè Jirusalim  
(Mark 11:1-11; Luk 19:28-40; Jan 12:12-19)*

<sup>1</sup> Ngang le Jisas mógo ne yó kem gel lemolò du efet le moni bè Jirusalim. Deng le gefet bè yóm sotu benwu udì boluyen Bitfid, nô lem henfek yóm Bulul Ulib. Bè yóm kkól le bè yó, wen lewu bè yó kem gel lemolò du hógów Jisas tukô gna kul,

<sup>2</sup> monen mò kul, "Mógo ye do etu bè tum benwu udì ditu tuu. Sok ye kól ditu, angat wen ton ye asnu fét hanà malak natí. Tódô ntó ye, nit ye do edini.

<sup>3</sup> Ke wen tau smólók kuy, mon ye, 'Wen muhen du yóm gónó tekuy mogot.' Kaem tódô kendel hlusen kuy."

\* 21:5 Sikaraya 9:9.

\* 21:9 Lingón 118:25,26 ne 148:1.

<sup>4</sup> Ni se deng gónóhen dohò yóm tehe snulat yóm sotu tehe tugod Dwata ekni, yóm monen,

<sup>5</sup> "Hol tulón ye yó kem tau menwu bè Sayun, mon ye, Ngem deng sut yóm tau hol geta bélê ye, tau là kóen hegeta knô, smakay asnu. Snakayen yóm nati asnu."\*

<sup>6</sup> Tahu se, lemwót yó kem lewu hógówen yó koni, tódô nmò le se yóm deng mon Jisas mò kul.

<sup>7</sup> Nalak le ebè Jisas yóm asnu, mung du ngà natihen, afid le du dumu nes le, ne hsakay le ke Jisas.

<sup>8</sup> Ne tey dé bè yó kem tey tau mung ke Jisas, gotu nból le mulit lan yó kem dumu nes le. Wen se bélê le ma doun koyu, gotu hlasà le mulit lan mò gónó le hegfan yóm kadat le du.

<sup>9</sup> Tódô le gotu mensag yó kem tau tukô gna du ne yó kem fen tukô huli du, mon le,

"Hol dójón tekuy yóm semfu bè yóm tehe Dabid. Dwata he hol tmóbóng du nim tau deng hógówen ni. Hol dójón tekuy dé Dwata."\*

<sup>10</sup> Timbow deng kól bè Jirusalim Jisas, ya tey ketnga le du yó kem kdéen tau menwu bè yó, snólók le, mon le, "Tmau du de ni?"

<sup>11</sup> Bnalà yó kem tey tau sbung, mon le, "Ni se yóm Jisas, yóm tugod Dwata lemwót bè Nasarit, yóm sotu benwu bè prubinsya Galili."

*Klo Jisas yó kem tau hembalù lem Gónô Dwata  
(Mark 11:15-19; Luk 19:45-48; Jan 2:13-22)*

<sup>12</sup> Tódô hlós elem Gónô Dwata Jisas, tódô glohen yó kem tey tau bemli ne yó kem tey tau hembalù lemen. Yó nmoen, nan e gotu lo lu. Gotu lugoden yó kem lemisa yó kem tau gel lemulk filak. Dalang se yó kem gónó le gel myón yó kem tau hembalù kfati, gotu lugoden.

<sup>13</sup> Mon Jisas mò kul, "Igò Dwata deng mon du bè Sulaten, 'Yó muhen yóm dou Gónô mò gónó le gel mni

ebéléu yó kem tau.' Okóm," mon Jisas, "deng mom henbaling ye góno le nô yó kem tau gel mnagaw."\*

<sup>14</sup> Bè yóm igò Jisas nô bë yó bë Gónô Dwata, tódô le gotu mógo ebéléen yó kem tau butô ne yó kem tau tugô, ne gotu hkó Jisas yó kem des le.

<sup>15</sup> Okóm yó kem geta bë yó kem gel demsù ebè Dwata ne yó kem gel tmolok hlau, gotu le mom lembut bë yóm kton le yó kem hentaw ton nmò Jisas ne bë yóm kungol le yó kem ngà tendo dmoyón du bë yó lem Gónô Dwata. Yó tendo mon le, "Hol dóyón tekuy dé yóm sfu yóm tehe Dabid."

<sup>16</sup> Mudél le ebè Jisas yó kem tau lembut du yó koni, mon le, "Gungolem kô udél tu kem ngà?"

Mon Jisas se, "Gungolu se." Ne bud monen, "Là deng gesfala ye du kô yóm sotu tulónen bë Sulat Dwata, yóm monen,

'Ó Dwata, balù yó kem ngà kólen bë yó kem ngà tolo hebón,  
deng tolokem lu anì hol tódô yóm kdoyón le kóm.'\*\*

<sup>17</sup> Timbow deng yóm kudél Jisas yó koni, ominen tmagak kul, hlós ebè Bitani, ne ditu gónon tungô.

### *Kudél Jisas yóm koyu fig (Mark 11:12-14, 20-24)*

<sup>18</sup> Timbow hayahen bë yó, tódô bud temkifu Jisas mulék ebè syudad Jirusalim. Yóm tolo knóen bë lan, gnómen ne kbitilen.

<sup>19</sup> Ne wen tonen sotu koyu mdà kilil lan boluyen fig. Omin Jisas mógo etu, nénegeñ ke wen bunguhé, okóm laen duen, tódô hono doun. Omin Jisas mudél ebè yóm koyu yó, monen, "Nbuten ni là kói na e bud mungu." Tódô sen-gengen se mékéng yóm koyu yó.

<sup>20</sup> Ya tey kehtaw le du yó kem tau gel lemólò ke Jisas yóm kton le du yó, mon le, "Kiholen kendel tódô gotu mékéng nim koyu ni?"

<sup>21</sup> Mon Jisas mò kul, "Tódô tulónu kuy ktahuhen, ke wen kehtahu ye, ne

ke là megewu nawa ye, gbek ye snéen mò du yóm nmou bë nim koyu ni. Là sónen du yó gbek ye, gbek ye snéen tódô mdók nim bulul nii anì mdó bë ni, ne mili elem mohin, botong tódô nimónen yu.

<sup>22</sup> Ke wen kehtahu ye, balù kihu hni ye bë Dwata, guta ye."

### *Ksólók le yóm kwalis Jisas (Mark 11:27-33; Luk 20:1-8)*

<sup>23</sup> Bud mulék ebè Gónô Dwata Jisas. Yóm igoen tolo tmolok bë yó, sut le béléen yó kem geta bë yó kem gel demsù ebè Dwata ne yó kem tuha góno le gel galak, mon le mò ke Jisas, "Wen kô kwalisem mò du ni kem deng nmoem bë ni? Tau du se bemlay kóm kwalis mò du?"

<sup>24</sup> Bnalà Jisas se lu, monen, "Wen se dou snólóku bélê ye. Ke tngón ye balaen, tulónu kuy se yóm gónon lemwót yóm dou kwalis mò du yóm deng nmou bë ni.

<sup>25</sup> Ni snólóku bélê ye. Bè yóm tehe gel kbabtays Jan yó kem tau, gónon lemwót de kwalisen mò du? Lemwót bë Dwata kô, duhen ke tódô lemwót bë kem tau?"

Omin le na stulón són lu yó kem tau smólók ke Jisas yó koni, mon le, "Tedu kmò kbalà tekuy du du? Ke mon tekuy se lemwót bë Dwata, dô monen, 'Moen de ke là hentahu ye du?'"

<sup>26</sup> Ke bud mon tekuy se lemwót bë tau, déke mom wen sidek nmò le bélê tekuy yó kem tau, abay se bë kul kehedem du, hol tau tugod Dwata yóm Jan."

<sup>27</sup> Omin le malà ke Jisas, mon le, "Là kô tngón me du balaen yóm snólókem yó." Ne bud mon Jisas se, "Ke là tngón ye du balaen yóm dou snólók, là se tulónu du kuy gónon lemwót yóm dou kwalis mò du yóm deng nmou bë ni."

### *Yóm hlingón bë yó kem lewu ngà logi setwoli*

<sup>28</sup> Omin Jisas bud mon du mò kul, "Tedu de kmò kehedem ye du nim nii? Wen sotu tau lewu ngaen logi. Lemwót yóm mà le, mógo ebè yóm

\* <sup>21:13</sup> Isaya 56:7, Jirimaya 7:11. \* <sup>21:16</sup> Lingón 8:2.

ngaen twogu, ne monen mò du, ‘Ó ngà, nam e mò kut nmò bè gónó mulu grép dé kemdaw ni.’

<sup>29</sup> Okóm mom mon yóm ngaen twogu yó, ‘Bée dou.’ Okóm legen udì bè yó, tenlesen hendemen ne tódô lemwót etu.

<sup>30</sup> Ominen bud móglow ebè yóm ngaen són twoli, ne senged se yóm kmonen du. Ne mon yó sem ngaen, ‘El, móglowe kdeng MÀ.’ Okóm là sem dogen dohò.”

<sup>31</sup> Bud mon Jisas, “Mahi du de bélê le mimón ke mà le?”

Ne mon le se, “Yóm ngaen twogu.”

Omin Jisas bud mon du mò kul, “Tódô tulónu kuy, mom gna mung bè yó kem tau nogot Dwata yó kem tau gel mtuk bwis, ne yó kem libun hdóyón. Là kuy, là kô ye na a gmung.

<sup>32</sup> Ngem yó dém le ksut Jan lem blóng ye yóm tau gel mabtays. Tey kehetngónen du kuy yóm lan hyu bélê ye, okóm là kô ye dog himón. Deng mom yó mimón du yó kem tau gel mtuk bwis ne yó kem libun hdóyón. Igò ye sem deng gotu mton du nim ni, ewenem là kô tenles ye du kehedem ye, là kô dog hentahu ye du yóm gel tulón Jan kuy.”

### *Yóm hlingón bè yó kem tau mogot nmò là gulit*

(Mark 12:1-12; Luk 20:9-19)

<sup>33</sup> “Ni hnungol ye,” mon Jisas, “wen bud sotu hningónu bélê ye. Wen sotu tau lamang huluhen yóm sotu kay mungu boluyen grép, ne lenabaten gu hilolen. Ne ominen mò yóm angat gónó le kemmes élen, ne nmoen snéen yóm gónó geta mò gónó le gel nô yó kem tau mentey du. Ne mdengen se kem tau hogoten du yóm huluhen, ominen lemwót milo ebè yóm sotu benwu.

<sup>34</sup> Tikóng deng kól bè kbunguhen yó kem huluhen yó, wen kem tau dóken ebè yó kem tau deng tehe hogoten du anì hwit le ebéléen yóm kun bad.

<sup>35</sup> Timbow le kól ditu yó kem tau dóken, deng mom yó nmò le bélê le,

\* <sup>21:42</sup> Lingón 118:22,23.

tódô sensogot le lu. Tey sidek kboug le yóm sotun, ne hnatay le yóm sotuhen, ne sentudà le botu yóm sotuhen.

<sup>36</sup> Ominen bud wen tau hógów yóm tau fun hulu yó koni, malù le wadag. Senged snéen kmò le kul yó kem tau mogot hulu.

<sup>37</sup> Bè yóm hol sónen, yó nmò yóm tau fun hulu, tódô hógówen yóm ngaen logi, monen, ‘Kaem ni se yóm nadat le, yakà ngau du.’

<sup>38</sup> Okóm timbow ton yó kem tau mogot hulu yóm ngaen yó, mom mon le, ‘Yó nii yóm ngà yóm tau fun hulu. Lemwót kuy ne, na tekuy e hnatay anì gfun tekuy yóm tonok angat nfunen.’

<sup>39</sup> Tahu se. Tódô sensogot le yóm ngaen, ne tudà le hulé labat ne ditu gónó le hmatay du.”

<sup>40</sup> Omin Jisas bud mon du mò kul, “Ke deng kól bè yó yóm tau fun hulu, tedu se angat nmoen bè yó kem tau deng tehe snaligen yó?”

<sup>41</sup> Bnalà le se, mon le, “Angat gotu hnatayen lu yó kem tau sidek nmò le yó, ne bud hogoten tu kem dumu tau hyu keblay le bad bè ket kgefeten.”

<sup>42</sup> Omin Jisas bud mon du mò kul, “Tahu se yóm mon ye. Deng gesfala ye kô kuy yóm tehe mon Dwata bë Sulaten, ‘Wen botu deng senkbê yó kem tau hdà gónô, ofo kul ke laen dù muhen.

Anì monem, yó se yóm hol tahu botu mò hembegel du yóm gónô hdà le.

Yó se yóm deng nmò Dwata, ne tey kehtaw tekuy du yóm nmoen yó.\*

<sup>43</sup> Tódô tulónu kuy,” mon Jisas, “lemwót bè yóm kekbê ye du yóm botu yó, là kô ye bud gmung ne bè yó kem tau nogot Dwata. Yó bud tles nogoten yó kem tau mò du yóm nýóén.

<sup>44</sup> Yóm botu monu yó koni, ke wen tau btang etahen, tódô gotu mfutul lówóhen. Ne ke wen tau gdilanen, tódô gotu lemuna.”

**45** Ne tódô tngón yó kem geta bè yó kem gel demsù ebè Dwata ne yó kem Farisi yóm kegbaken ebélê le yó kem hningón Jisas yó.

**46** Yó nmò le, tódô tó kendel kenfô le, okóm likò le yó kem tey tau wen sbung bè yó, yakà hentahu le du hol tugod Dwata yóm Jisas.

## 22

### *Yóm hlingón bè yóm mò ken bong bë gónô mulu*

(Luk 14:15-24)

**1** Bud wen tulón Jisas kul hlanen bë hlingón, monen,

**2** “Yóm kogot Dwata tau, hol lómón yóm tau hol geta, wen ken bong nmoen bë lówó yóm ngaen logi.

**3** Timbow deng hto yóm butengen mò du, ominen hógów yó kem tau mò nmò béléen anì na le e nangay tu kem tau deng tinoken. Okóm mom là dog le móyô móggów yó kem tau deng tinoken yó.

**4** Ominen wen dumu tau bud hógówen etu bélê le, monen mò kul, ‘Tulón ye kul deng deng ne yóm ken nmou. Deng wen kem safi tnétué, dalang se yó kem ngà safi mabù, deng gotu tnétué. Deng gotu deng ne kdéen. Géhél le do edini ne bë nim ken bong nmou bë lówó yóm ngau logi.’

**5** Okóm yó kem tau deng tinoken yó, là kô le dog hekmón, mom henlel le yóm kul nmò. Lemwót sotu, móggów ebè numahen, ne lemwót sotu, móggów ebè tindaen.

**6** Ne yó nmò yó kem dumu, mom sensogot le yó kem tau dók yóm tau hol geta, deng mom senboug le lu, ne hnataj le lu.

**7** Ya tey sidek kebut yóm tau hol geta. Tódô hógówen yó kem sendaluen nan e hfatay lu yó kem tau monok yó, gotu htemen yóm kul syudad.

**8** Ominen bud tmaba yó kem tau mò nmò béléen, monen, ‘Deng gotu deng ne kdéen. Yó kem tau deng gna

tô tinoku, là kóen knóón kken le du kul nim ken nmou ni.

**9** Moggów ye kut bè tu kem lan lamang, gotu tnaba ye kihu tau ton ye ebè nim ken bong nmou.’

**10** Tahu se, kewót yó kem tau dóken, gotule móggów ebè tu kem lan lamang, gotu sentifun le yó kem tau ton le. Wen se bélê le kem tau hyu kmò le. Wen se kem tau gel mò sidek. Gotu sentifun le lu efet tódô meskel lem yóm gónô gónô le mò ken bong yó.

**11** Ominen móggów elem blóng le yóm tau hol geta mò ken yó koni nan e kenlô lu. Okóm wen tau tonen lem blóng le bè yó là lemseken yóm nes gel lesek le bè gónô mò ken. Mung kudélen ebéléen yóm tau hol geta yó koni, monen,

**12** ‘Kmò khusekem elemen kóm du Wè, igoem là lemsek du yóm nes bè gónô mò ken?’ Ne là se kóen gudél yóm tau yó.

**13** Omin yóm tau hol geta yó, mdók yó kem tau gel mò nmò béléen, monen, ‘Ni nfét ye sigelen ne tihen, bot ye etu bè lewà bè gónón alì kmifu anì bè yó gónón tendo heslaf ne dmumu mkik, ne sembhé kakim.’ ”

**14** Bud mon Jisas, ‘Hol lómón yó se yóm nmò Dwata. Tey dê tau tinoken, okóm là holen wen néléken.’\*

### *Ksólók le yóm kmò kbayad bwiis bë yóm tau hol geta bë Rom*

(Mark 12:13-17; Luk 20:20-26)

**15** Bè yóm kungol kem Farisi du yó kem tulón Jisas yó koni, omin le lemwót mebel lan le gemkfô du bè kudélen.

**16** Yó nmò le, wen tau dók le ebéléen, hono kem tau gel lemòlò kul, ne wen se bélê le kem kun tau Hirod. Timbow le kól bè Jisas, mon le mò du, ‘Ó Sér, tódô tngón me sal gel tahu yóm gel tulónem bë yóm kun kóyô Dwata bè tau. Ne laen dù klikoem tmulón du, abay se laen dù tau mtukul henlom nawahem.

**17** Wen tó snólók me béléem,’ mon le. ‘Gsalà bè hlau tekuy kô yóm gel kbayad te bwiis ebè Sisar, yóm tau

\* **22:14** Yó sotu lanen yóm mon Jisas ni, ‘Tey dê tau tinok Dwata, okóm là holen wen yóm móyô mung.’

hol geta bè Rom mogot tekuy? Mò kehedemem du se kóm?"

<sup>18</sup> Okóm tódô tngón Jisas se yóm tô atul le, ne yó monen mò kul, "Tey tau hemtedeng knô nim yu. Moen de ke tō tnílów hnolot ye ou?

<sup>19</sup> Tolok ye do kun yóm filak mgel mò bayad bwis bè yóm tau hol geta yó." Tahu se, wen tolok le du.

<sup>20</sup> Ne yó monen, "Tulad du de nô du nim filak ni? Ne boluy tau du nô du?"

<sup>21</sup> Mon le se, "Sisar."

"Na," mon Jisas, "ke Sisar se funen, tódô blay ye ke Sisar yóm kun, ne blay ye ke Dwata se yóm kun."

<sup>22</sup> Ya tey ketnga le du yóm kbalà Jisas kul yó. Tódô le lemwót, tnagak le Jisas.

*Ksólók le yóm bud klowil tau gu lem hatay*

(Mark 12:18-27; Luk 20:27-40)

<sup>23</sup> Segeng bè yóm kdaw yó, wen se bè yó kem Sadyusi sut bè Jisas. Ni kem tau ni là kô hentahu le du ke angat bud hlowil Dwata yó kem tau deng matay.

<sup>24</sup> Wen se kul snólók bè Jisas, mon le, "Ó Sér, tehe gel mon Musis, ke matay yóm logi igò le là deng mngà yóm yehenen, yóm twolihen tmodol béléen bud lemoldò yóm kun yehenen anì wen ngaen béléen mò kun sfu yóm twoguhen.\*

<sup>25</sup> Na," mon le, "tehe yu ekni, wen hitu kem logi ssotu sut le menwu lem blóng me. Ne myehen yóm hol twogu bélê le, bede mom kendel matay igoen là deng wen ngà le. Ne yóm twolihen tmodol béléen bud lemoldò yóm yehenen.

<sup>26</sup> Okóm bud matay snéen kun gu laanen là deng wen ngà le. Ne senged se yóm getlu twolihen. Ngang le stufi slolò efet kól bè yóm ghitu le, ne senged gotu katay le.

<sup>27</sup> Ngangen efet matay se kun yóm libun.

<sup>28</sup> Ni snólók me béléem ni," mon le, "bè yóm angat kehlowil Dwata tau elem hulin kdaw, mahil du bélê

le bud gemyehen du yóm libun yó? Blaem deng tehe gotu sentufi le myehen du yóm hitu le."

<sup>29</sup> Bnalà Jisas se lu, monen, "Tey salà yóm kehedem ye. Yó duónen, là tngón ye du yóm nô lem yóm Sulat Dwata, ne là se tngón ye du yóm kfasang Dwata.

<sup>30</sup> Bè yóm angat kehlowil Dwata kem tau deng matay, laen kô dù bud angat syehen, abay se angat le mkél bè yó kem hógów Dwata gel nô bè longit.

<sup>31</sup> Ne bè yóm snólók ye bè angat bud klowil tau, là deng gesfala ye du kô yóm tehe tulón Dwata kuy bè Sulaten? Yóm monen,

<sup>32</sup> 'Ou se sana kul Dwata le Abraham ne Isak ne Jakub.' Bè yóm udél Dwata yó góno ye temngón du yóm deng bud kehlowil Dwata kul. Abay se yóm Dwata, du se Dwata yó kem mowil, là bè yó kem là mowilen."\*

<sup>33</sup> Yóm kungol le yóm ktolok Jisas, ya tey ketnga le du yó kem tey tau wen sbung bè yó.

*Yóm hlau Dwata ali bong muhen bè kdéen*

(Mark 12:28-34; Luk 10:25-28)

<sup>34</sup> Timbow gungol yó kem Farisi yóm klaen dog gmò le bè Jisas yó kem Sadyusi, omin le stifun se kul,

<sup>35</sup> ne wen sotu bélê le yóm gel tmolok hlau, tō tmilów smólók ke Jisas se kun, monen,

<sup>36</sup> "Ó Sér, mahi du bè yó kem hlau Dwata yóm hol bong muhen bè kdéen?"

<sup>37</sup> Bnalà Jisas se, monen, " 'Kenbong nawahem Dwata, yóm gónohem mogot. Hotuhem nawahem ebéléen, ne hol hendemem yóm kun kóyô.'\*

<sup>38</sup> Yó se," mon Jisas, "yóm hlau Dwata ali bong muhen bè kdéen, yóm hol tanayen.

<sup>39</sup> Ne gewuhen yóm ali bong muhen skél du, duhen yóm monen, 'Kenbong nawahem kem dumuhem lómón yóm kbong nawahem yóm kóm knô.'\*

\* 22:24 Hlau 25:5,6.

\* 22:32 Kehewà 3:6.

\* 22:37 Hlau 6:5. \* 22:39 Hlolò 19:18.

**40** Ni kem lewu hlau Dwata ni, hol kanguy yóm kdê tehe hlau Musis, ne yóm kdê tehe gel htugod Dwata yó kem gna tugoden ekni.”

*Yóm ksólók Jisas kul  
(Mark 12:35-37; Luk 20:41-44)*

**41** Ne wen snólók Jisas bë yó kem tey Farisi sbung bë yó, monen mò kul,

**42** “Tedu kuy kmò kehedem du yóm Misaya? Gónón gu semfu du?”

Mon le se, “Semfu gu bë Dabid.”

**43** Bud mon Jisas, “Okóm tedu kmò kesfuhem gu bë Dabid du? Igò Dabid se tehe moluy du gónóhen mogot, hmonen du yóm Tulus Dwata,

**44** ‘Ni se udél Dwata ebè yóm gónóhu mogot, yó monen mò du,  
Myóni bë ni dé fi bë kwananu.  
Angat gotu ndau lu elaan yó kem hmohon kóm.’\*

**45** Yóm Misaya myón bë kwanan Dwata yó, yó kboluy Dabid du ‘Gónóhu mogot.’ Tedu se tò kmò klanen du ke mom du yóm bud semfu gu bë Dabid?”

**46** Laen dù gembalà du nim snólók Jisas ni. Tódô nbuten bë yó ne laen kô dù bud mlos smólók ke Jisas.

## 23

*Kekbê Jisas yóm kul gel nmò yó kem  
Farisi ne yó kem tau gel tmolok hlau  
(Mark 12:38,39; Luk 11:43, 46;  
20:45,46)*

**1** Bud mudél Jisas ebè yó kem tey tau sbung ne ebè yó kem gel lemolò du, monen,

**2** “Yó kem gel tmolok hlau ne yó kem Farisi, wen se kul glal tmolok du yóm hlau Musis.

**3** Yó gónóm mon, hol nimón ye ne hol lolò ye yóm kdê tolol le kuy. Okóm hol bë ye abay lolò yóm kmò kekdol le, abay se olo le beyen tmolok du kuy yóm hlau, là kô lolò le du.

**4** Ya tey sidek keblaten yó kem hlau gel hbô le kem tau, okóm kul, balù gdù, là kô le tmóbóng mit du yóm blat gel hbô le kuy yó.

\* 22:44 Lingón 110:1.

**5** Tódô kdê yóm nmò le, són hnebel le yóm ksalù tau kul. Ngem dé kbon-gen yóm Udél Dwata snulat bkes bë uyó le ne bë sigel le, lel le tey htahà hlumfung bë kilil nes le.

**6** Ke bë gónô mò ken, kóyô le ke hol le myón desyung. Dalang se bë gónô gel stifun, kóyô le ke myón le bë gónó le myón yó kem tau hol nadat.

**7** Dalang se ke mógró le ebè fedyan, kóyô le ke hol nadat tau lu ne ke tnaba le lu ‘Tau tmolok.’

**8** Okóm kuy du,” mon Jisas, “hol bë ye abay móyô ke tnaba le yu ‘Tau tmolok.’ Kaem gotu ye setwoli yóm kdê ye, ne tek sotu yóm tmolok kuy.

**9** Ne hol béen abay wen tnaba ye ‘Mà’ bë yó kem tau genlal ye te tonok. Abay se tek sotu Mà ye, duhen yóm Mà tekuy bë longit.

**10** Bë ye abay móyô ke tnaba le yu ‘Gónô mogot,’ abay se tek sotu gónó ye mogot, sónen yóm Misaya.

**11** Yóm tau hol geta bélê ye, yake yó dé kmoen lem blóng ye, lómón ke du yóm tau gel mò nmò bélê ye.

**12** Yó se tau hegetahen knóen, angat heglaan Dwata. Okóm yóm tau heglaanen knóen, angat hegeta Dwata.”

*Kbólów Jisas yó kem tau gel hemtedeng knô*

*(Mark 12:40; Luk 11:39-42, 44, 52;  
20:47)*

**13** Bud mudél Jisas, monen, “Angat tey tafak ye yu kem tau tmolok hlau ne yu kem Farisi, yu kem tau gel hemtedeng knô. Lómón ke deng mom kendadu ye yóm bak dól bë yóm kogot Dwata tau. Là se kô ye dog gusek kuy, ne deng mom henseng ye yó kem tau móyô mung.

**14** Angat tey tafak ye yu kem tau tmolok hlau ne yu kem Farisi, yu kem tau gel hemtedeng knô. Yu se kem tau fen gel smukat yó kem libun bolu anì gfun ye gónô le, lel ye alì gel htahà kni ye bë Dwata. Yó se gónó Dwata alì hemsidek du yóm angat ktafaken kuy.

**15** Angat tey tafak ye yu kem tau tmolok hlau ne yu kem Farisi, yu kem tau gel hemtedeng knô. Glok ye mifal mohin móglów bè yó kem dumu benwu mayuk na a mebel bà tek sotu tau mò lemóló kuy. Bè yóm klooen kuy, deng mom mkay senta yóm ksidek yóm kuy nmò yóm kun ksidek nmò. Yó gónóm mon, knóón bélê ye nô lem lanaw ofi.

**16** Angat tey tafak ye yu kem tau butô tô malak kem dumuhén butô. Bè kuy ktolok, ke wen tau safaeñ yóm Gónô Dwata, anien ke nuléhen yóm safaeñ yó, mom mon ye là sideken. Okóm ke yó safaeñ yóm tahu blówón nô lem yóm Gónô Dwata, mom mon ye là hyuhen ke nuléhen safaeñ.

**17** Tey ye nungel, butô ye. Ilóem kmon ye ke bong muhen yóm tahu blówón senta yóm Gónô Dwata. Là kô yó du. Yó gónón baling mólós bè Dwata yóm tahu blówón yó, abay se deng nô lem Gónóen.

**18** Ne bud sotu gel tolak ye, ke safà yóm tau yóm gónô demsù ebè Dwata, bud mon ye là sideken ke nuléhen. Okóm ke safaeñ yóm dsuen ebè Dwata, gel mon ye là hyuhen ke nuléhen yóm safaeñ yó.

**19** Tey ye butô. Ilóem kmon ye ke bong muhen yóm dsù ye ebè Dwata senta yóm gónó ye gel demsù du. Là kô yó du. Yó gónón baling mólós yóm dsù, abay se deng nô bè yóm gónó le demsù du ebè Dwata.

**20** Yó gónóm mon, ke safà yóm tau yóm gónô demsù ebè Dwata, gomong safaeñ snéen yóm dsuen.

**21** Ke safaeñ Gónô Dwata, deng gomong safaeñ snéen Dwata, yóm nô lemen.

**22** Ke safaeñ longit, deng gomong safaeñ ne yóm bangkù gónó Dwata myón kmamal yóm klamangen, ne gomong snéen Dwata, yóm myón taken.

**23** Angat tey tafak ye yu kem tau tmolok hlau ne yu kem Farisi, yu kem tau gel hemtedeng knô. Balù yó kem som lemnaw ye, sana keblay ye ke Dwata yóm gesfoloen. Okóm deng

mom knogol ye yó kem hlau bong muhen, duhen yóm hlau bè ktedeng kmò, ne bè keskodu, ne bè kessalig. Laen dù gónón sidek yóm keblay ye ke Dwata yóm kun ólól, okóm bè ye klifót yó dum hol bong muhen.

**24** Yu kem tau butô tô malak kem dumuhén butô, tey klolò ye du yó kem hlau lemnek, okóm là nimón ye kul yó kem hlau alì bong muhen.

**25** Angat tey tafak ye yu kem tau tmolok hlau ne yu kem Farisi, yu kem tau gel hemtedeng knô. Ke hningónu yóm kmò ye, lómón yóm tgayan ne yóm huyów olo ye molob taken, là lemen. Igoen yóm nô lemen, tódô hono yóm deng gnaga ye lemwót bè yóm keseglom ye.

**26** Tey ye butô, yu kem Farisi. Na ye gna nolob lemen dé yóm tgayan anì baling mólós taken snéen.

**27** Angat tey tafak ye yu kem tau tmolok hlau ne yu kem Farisi, yu kem tau gel hemtedeng knô. Hol ye mkél bè yóm lungun tilob bentulà bukay taken, okóm lemen hono tiol tau matay, hono unged bolok.

**28** Hol lómón yó se yóm kuy kmò. Tey tilob yóm gel hton ye bè tau, okóm yóm lem hendem ye hono kóng ne hono sidek."

### *Angat ktifik Dwata kul (Luk 11:47-51)*

**29** "Angat tey tafak ye yu kem tau tmolok hlau ne yu kem Farisi, yu kem tau gel hemtedeng knô. Tey tilob yóm gel nmò ye bè yóm tehe gónó le lembeng yó kem tugod Dwata ekni, ne tey kehekloón ye yóm tehe gónó le lembeng yó kem tau tehe tedeng kmò le.

**30** Ne gel mon ye ke tehe ye deng tau se kuy ekni bè yóm kul kdaw le tehe fù tekuy, là kô ye na a gbót se kuy hmatay yó kem tehe gna tugod Dwata.

**31** Lemwót bè yóm udél ye yó gónón gdilô yóm hol kesfu ye bè yó kem tau tehe mò des yó kem tehe tugod Dwata ekni.

<sup>32</sup> Yó ne, henfu ye yóm nmò tehe nbut yó kem tehe fù ye, yóm là deng gdeng le du.

<sup>33</sup> Ya nim yu kem tau knawa ulal, hono ye semfu gu bè yó kem tau knawa ulal. Tedu kmò kegewà ye lemen du yóm deng kgolu ye elem lanaw ofi?

<sup>34</sup> Tódô tulónu kuy, angat wen kem tau bud hógówu elem blóng ye, yó kem tau tugod Dwata, ne yó kem tau hulung hedem, ne yó kem tau hulung tmolok. Tódô wen bélê le hnatay ye, wen se tnutuk ye bè kros, ne wen se nfes ye lem gónô ye gel stifun, ne mom ktes ye lu ebè yó kem dumu benwu gónô le e mlóy.

<sup>35</sup> Yó angat guta ye du yóm nmò ye yó, gotu duón Dwata kuy yóm tehe katay le bnonok yó kem tau tedeng kmò le, lemwót bè katay Abél bnonok, yóm tau alì tedeng kmoen, efet kól bè yóm kbonok le ke Sikaraya yóm tehe ngà Berakiya. Tódô kem hnatay le igoen tolo mógrów lem blóng yóm Gónô Dwata ne yóm gónô le gel demsù ebè Dwata.

<sup>36</sup> Tódô tulónu kuy ktahuhé, angat tñafak Dwata yu, yu kem tau kmoen ni, bè yóm kdê deng tehe matay bnonok.”

### *Kkodu Jisas yó kem tau bë Jirusalim* (Luk 13:34,35)

<sup>37</sup> “Yu kem tau menwu bè syudad Jirusalim, sal gel hnatay ye yó kem tau tugod Dwata, ne hnatay sentudà ye botu yó kem tau hógów Dwata ebélê ye. Deng hilu duléku ne tò móyô sembung kuy, lómó tò kmou kuy, lómón yóm mlon gel kenleken elaan hafaken yó kem ngaen, okóm là kô ye dog móyô.

<sup>38</sup> Yó se gónô Dwata tódô mayà du yóm Gónóén lem blóng ye.

<sup>39</sup> Tódô tulónu kuy, là kô tagad na ye bud ton dou he ke là nan kól yóm kdaw angat kmon ye du, ‘Dwata he hol tmóbóng du yóm tau deng hógówen.’ ”\*

\* 23:39 Lingón 118:26.

## 24

### *Angat kegbà yóm Gónô Dwata* (Mark 13:1,2; Luk 21:5,6)

<sup>1</sup> Kewót Jisas bë yó, tnagaken yóm Gónô Dwata. Yóm igoen tolo mógrów, ten-gafit yó kem gel lemolò du, tolok le du yó kem gónô mteg hmilol yóm Gónô Dwata.

<sup>2</sup> Omin Jisas mon du mó kul, “Hol tenngel ye dé yóm kdê ton tekuy ni. Tódô tulónu kuy ktahuhé, angat kól yóm kdawen laen kô dù tebel bè ni kem beng botu nii, tódô gotu lenusok le.”

### *Ilô yóm hol són kdaw* (Mark 13:3-13; Luk 21:7-19)

<sup>3</sup> Ngang Jisas mógrów efet kól bè Bulul Ulib, ne myón bè yó. Omin le mógrów ebéléen yó kem gel lemolò du, són lu, snólók le béléen, mon le, “Ó Sér, kilón kdohoen yóm deng tulónem kum yó koni? Tedu de ilô me du yóm bud ksutem ne yóm hol són kdaw?”

<sup>4</sup> Bnalà Jisas lu, monen, “Hol tengama ye anì laen dù tau gónô ye gsukat.

<sup>5</sup> Abay se angat dê tau sut tò hlingu béléu. Yó angat mon le, ‘Ou se yóm Misaya.’ Ne tey dê tau gsukat bélé le.

<sup>6</sup> Angat wen gungol ye tau sgida moni bélê ye, ne wen sentulón le gida bè dumu benwu mayuk snéen. Okóm bè ye abay hlikò. Ne gotu dohò ni kem ni, okóm là kô yó du he yóm hol són kdaw.

<sup>7</sup> Angat wen kem benwu mit sgida bè kem dumu benwu. Ne tey dê benwu gónón mbel bitil bong ne linol bong.

<sup>8</sup> Kdê ni kem ni, yó se ayawen yóm móyón kkól yóm hol són kdaw. Hol lómón yóm libun mlutut, sok kmuleng, ayawen sut yóm ngaen.

<sup>9</sup> Ne angat tey dê tau bè klamangen benwu kmutó nawa kuy lemwót bè yóm klolò ye do. Tódô kenfô le yu, ne tey kehsidék le kuy, ne hnatay le yu.

<sup>10</sup> Bè yóm kdaw yó, angat tey dê tau knogol le kehtahu le. Ne knutó nawa

le yó kem dumu le hemtahu, ne glef le ne hekfô kul.

<sup>11</sup> Angat tey dê tau sut lembù tmugod ke Dwata, ne tey dê tau gsukat bélê le.

<sup>12</sup> Lemwót bè yóm alì kmò le sidek yó kem tau bè klamangen benwu, angat monol yóm kesbong le nawa.

<sup>13</sup> Okóm hol ye hbala efet kól bë sónen anì angat guta ye yóm klowil laen dù sónen.

<sup>14</sup> Bede nan glalag bè kdéen tau bè klamangen benwu he yóm Tulón Hyu gbak ebè yóm kmò kogot Dwata tau anì hol tngón le, ominen yó he kól yóm hol són kdaw.”

*Yóm tò matù ke Dwata  
(Mark 13:14-23; Luk 21:20-24)*

<sup>15</sup> Bud mon Jisas, “Bè tehe kegenen du Danyél ekni, yóm sotu tau tehe gna tugod Dwata, eles tulónen yóm angat mdà bè Gónô Dwata yóm alì sidek knikò, yóm natuen Dwata. Yóm tau semfala du yóm ni, hol hennagien kmò klanen.

<sup>16</sup> Ke sok kól yóm kdaw yó, eles le tódô mlóy elem bulul ne yó kem tau menwu bè prubinsya Judiya.

<sup>17</sup> Ke wen tau tolo nô bè gónón henos bè gónóen, hol béen tlek bud husek elemen ke mebel mò niten.

<sup>18</sup> Ke wen tau tolo nô bè tnibahen, hol béen tlek bud mulék eta ne ke tó bud mebel kgal mfól mò niten.

<sup>19</sup> Kodu le yó kem libun mlutut bè yóm kdaw yó, ne yó kem libun tolo semlé ngà.

<sup>20</sup> Hol hni ye bè Dwata anì là geblaen bè yóm bulónen sidek kdaw yóm klóy ye yó, ne anì là geblaen bè yóm Kdaw Kehegnô snéen.

<sup>21</sup> Abay se angat tey hlayam bong sok sut bélê ye yóm hlayam monu ni. Ni he yóm hlayam alì sidek bè kdéen hlayam deng sut bè tau lemwót bè hol kbut benwu, ne là se kô bud sneefen du ne.

<sup>22</sup> Okóm lemwót bè yóm kkodu Dwata kul yó kem tau deng néléken, yó gónón là hol hegen du yóm alì

hlayam yó. Ke hegenen, bà sotu ke wen tau bud mowil te tonok.

<sup>23</sup> Hol bê ye abay hentahu ke wen tau mon du mò kuy, ‘Ngem, ni sii yóm Misaya.’ Duhen ke mon le, ‘Deng gdek dituu kun,’ hol bê ye abay hentahu.

<sup>24</sup> Abay se angat wen yó kem Misaya kéng sut, ne wen yó kem tau lembù tmugod ke Dwata. Angat tey dê hentaw ton hegfan le mò gónó le hol tó smukat yó kem tau deng kun nélék Dwata.

<sup>25</sup> Eles tulónu kuy nim ni,” mon Jisas, “anì hol ye getgama.

<sup>26</sup> Duhen yó, ke mon kem tau, ‘Deng kól bè yóm benwu là hyu menwu du yóm tau deng nélék Dwata,’ bê ye abay mógrów etu. Duhen ke mon le, ‘Ni deng hebnos bè ni,’ bê ye abay hentahu.

<sup>27</sup> Bè yóm angat bud kkól yóm Ngà Tau, hol lómón mkal silà, tódô lemaya klamang longit lemwót dmata kdaw kól desdef. Tódô kdéen tau gotu mton du.

<sup>28</sup> Angat dohò nim tulónu kuy ni. Lómón yóm gel mon le, ‘Yó se gónón mta lób, yó se gónón e sguku wak.’ ”

*Kmò yóm angat bud kesfulék yóm Ngà Tau*

*(Mark 13:24-27; Luk 21:25-28)*

<sup>29</sup> “Sok kogol yóm alì hlayam bè yó kem kdaw yó,” mon Jisas, “angat là buden mnóng kdaw dalang se bulón, ne angat le gotu btang gu bè longit yó kem blotik, ne là bud glolò le lesang le yó kem dumu mnóng gu bè longit.”

<sup>30</sup> Ominen yó he angat gfan gu bè longit yóm kun ilô yóm Ngà Tau. Bè yóm kton le du, tódô kentihen tau talak tonok, gotu le dmumu mkik lemwót bè khuli sel le. Tódô ton le se yóm Ngà Tau htuntun gu tta mung bè lobun. Ne ton le se yóm tey kfasangen ne yóm tey kegetahen.

<sup>31</sup> Ne angat tey uni féw bong gu bè longit mò ilô yóm kehwóten yó kem hógrów gu bè longit mò na a semtifun yóm kdéen tau deng nélék Dwata bè klamangen benwu.”

\* <sup>24:29</sup> Isaya 13:10 ne 34:4, Juwél 2:10.

*Yóm gdalang tekuy bè koyu fig  
(Mark 13:28-31; Luk 21:29-33)*

<sup>32</sup> “Tódô henkna ye bè yóm koyu fig,” mon Jisas. “Sok tmubed ne nbuten mból dounen, ayawen sut bulónen mnóng kdaw.

<sup>33</sup> Senged snéen sok deng gotu gfan yóm kdé deng tulónu kuy ni koni, yó se ayawen yóm deng klonihen yóm ksutu, hol lómón ke denge mdà snolu aut ye.

<sup>34</sup> Tódô tulónu kuy ktahuhen, kesok sut ni kem deng tulónu kuy ni, tolo wen he bè ni kem tau kmoen ni gmafit mton du.

<sup>35</sup> Angat tódô kmanas yóm longit dalang se yóm tonok. Okóm yóm dou udél,” mon Jisas, “là kóen na a lana.”

*Eles ketgama yóm kkól Jisas  
(Mark 13:32-37; Luk 17:26-30, 34-36)*

<sup>36</sup> “Laen kô dù tau temngón du yóm kdaw angat kesfuléku duhen ke tedu urasen,” mon Jisas. “Balù yó kem hógów Dwata gu bè longit, là kô tngón le du se kul. Dalang se do, là kô tngón du. Tek són Mà bè longit temngón du.

<sup>37</sup> Gu laanen là deng semfulék he yóm Ngà Tau, yó angat nmò yó kem tau te tonok, hol mkél bè yóm tehe kun kdaw Nuwa ekni.

<sup>38</sup> Yóm gu laanen là deng tehe sut dunuk ekni, yó nmò kem tau mken le, ne minum le, ne syehen le efet yóm khotun Nuwa elem yóm kafal nmoen.

<sup>39</sup> Là kô tngón le du yóm angat sut bélê le. Song imò le hetngón, deng sut bélê le yóm dunuk, ne tódô le gotu mung konul. Lómón yó se kmoen yóm kkól yóm Ngà Tau.

<sup>40</sup> Bè yóm kdaw yó, ke lewu tau tmiba, sotu nwiten, sotu se tebelen.

<sup>41</sup> Ke lewu libun mdek, sotu nwiten, sotu se tebelen.

<sup>42</sup> Yó gónóm mon, eles ye mingat abay se là kô tngón ye du yóm kdaw angat kkól yóm gónó ye mogot.

<sup>43</sup> Ke eles tngón yóm tau fun gónô yóm kifu nan e knagaw lem gónóen yóm tau mnagaw, eles mabung anì là guseken yóm tau mnagaw.

<sup>44</sup> Duhen yó, eles tendo ningat ye yóm bud kkólen elem blóng ye yóm Ngà Tau, abay se kulel angat kkólen bè yóm uras là gingat ye du.”

*Yóm hlingón bè yóm tau gulit ne yóm tau là guliten  
(Luk 12:41-48)*

<sup>45</sup> “Tau du de yóm gulit kmoen nmò bè yóm gónón mogot ne yóm hulung hedem? Yó se yóm tau tódô gotu hogoten du yóm tau gónón mogot yó kem dumu tau mò nmò bélén mò fen semgifá kul.

<sup>46</sup> Hligal kun yóm tau mò nmò yó ke tolo lelen hteneb mò nmò bè yóm kkól yóm gónón mogot.

<sup>47</sup> Tódô tulónu kuy ktahuhen, yóm tau gulit kmoen nmò yó, angat hke-men du yóm gónón mogot yóm kdé kimuhen.

<sup>48</sup> Là, ke yó mefet bè nawahen yóm tau mò nmò yó, ke mom monen, ‘A, legen he ni kkólen yóm gónóhu mogot.’

<sup>49</sup> Ne nbuten mfes yó kem dumuhen gel mò nmò, ne fen hebsow mken ne hlengel minum kun.

<sup>50</sup> Timbow kól yóm gónón mogot bè yóm kdaw là ketgamahen, yóm uras là eles tngónen du,

<sup>51</sup> ne tódô hnatayen yóm tau là gulit kmoen nmò yó, heg bunuen du yóm kul glumfak yó kem tau gel hemte-deng knô. Ne bè yó gónón tendo hes-laf ne dmumu mkik sembélé kakim.”

## 25

*Yóm hlingón bè yóm sfolò kem libun*

<sup>1</sup> “Bè yóm kdaw angat kkólu,” mon Jisas, “yóm kmò kogot Dwata tau, hol lómón yóm sfolò kem libun mit solok na a semlong yóm logi myehan.

<sup>2</sup> Limu bélê le yóm là hulungen hedem, ne limu se hulung hedem.

<sup>3</sup> Lemwót yó kem libun là hulung hedem, là dog le mit lenagas mò tgama le ke gotu yóm gnan.

<sup>4</sup> Okóm eles wen kul lenagas nwit yó kem libun hulung hedem.

<sup>5</sup> Lemwót yóm logi myehan, wen gónóhen ganggà, là géhélen kól. Yó

góñóm mon, deng mom moo ktuk yóm sfolò kem libun, gotu le gtungô.

<sup>6</sup> Timbow deng sóól buteng, tódô btang lem klingu le yóm tey tmaba, monen, ‘Ni deng kól yóm logi mye-hen. Géhél ye, ne ye e senlong.’

<sup>7</sup> Segeng le se btik yóm sfolò kem libun, gotu nwa le yó kem solok le, ne gotu sentódô le sembwan le.

<sup>8</sup> Yó udél yó kem libun là hulung hedem ebè yó kem libun hulung hedem, mon le, ‘Benlay ye se mi dé, Wè, ke wen dù kuy lenagas. Són moen mudof yóm kum solok.’

<sup>9</sup> Ne mudél se yó kem libun hulung hedem, mon le, ‘Là bud gsakufen kuy ne nim kum lenagas ni. Tódô ye na a bemli kuy ne bë tindà.’ Tahu se, na le e bemli yó kem libun là hulung hedem.

<sup>10</sup> Kogol yóm kewót le, kól se yóm logi mye-hen, ne tódô hlós ebè yóm góñó góñó le mò ken bë lówóhen, ne gmung yóm limu kem libun hulung hedem. Yóm kkól le bë yó, gotu le husek elemen, ne tniukeb le beng.

<sup>11</sup> Legen udì bë yó, gdfi se yó kem libun là hulung hedem. Mdà le bë lewaen, tmaba le, mon le, ‘Ó Sér, hfusekem mi elemen.’

<sup>12</sup> Okóm mom mon yóm logi mye-hen, ‘Bê. Là kô tngónu kuy.’

<sup>13</sup> Yó góñóm mon,” mon Jisas, “eles ye hol temgama se kuy. Là kô tngón ye du yóm kdaw angat kkólu, duhen ke tedu urasen.”

*Yóm hlingón bë yóm tlu kem tau mò nmò*

(Luk 19:11-27)

<sup>14</sup> “Bë yóm kdaw angat kkólu,” mon Jisas, “yóm kmò kogot Dwata tau, hol lómón ke yóm tau mógów ebè yóm sotu benwu mayuk. Gu laanen là deng lemwót yóm tau yó, nan tnaba yó kem tau mò nmò béléen, gotu hogoten kul yó kem kimuhen.

<sup>15</sup> Tódô hogoten kul yóm bang kul gbek. Yó hogoten yóm tanayen, limu libu filak tahu blówón. Ne yó hogoten yóm tmodol, lewu libu. Yó hogoten yóm getluhen, lemibu. Ominen yó lemwót.

<sup>16</sup> Tódô kendel bud lemwót se kun yóm tau mogot limu libu nan e hból yóm kun. Ngangen efet bud limu libu se uléken.

<sup>17</sup> Ne bud lemwót se kun yóm mogot lewu libu. Ngangen hból yóm kun efet bud lewu libu se uléken.

<sup>18</sup> Okóm yó nmò yóm tau mogot lemibu, deng mom lebengen lem tonok yóm kun.

<sup>19</sup> Deng tey kegenen mógów ne yóm góñó le mogot, ominen bud kól. Ne gotu htabahen yó kem tau tehe wen hogoten kul. Gotu snólóken bélê le yóm kmò khógów le du yóm filak tehe hogoten kul.

<sup>20</sup> Ominen sut yóm tau tehe hnogoten limu libu, ne monen, ‘Tehe limu libu yóm hogotem dou, Sér. Ni sii yóm uléken, bud limu libu.’

<sup>21</sup> Ne monen se mò du yóm góñóhen mogot, ‘Wóyón dé. Tey hyu nim uu, teyi gulit. Lemwót bë yóm kgulitem bë yóm udì hogotu kóm, bong ne sigangu tahem. Yó ne, holi mung dou dé anì gmungi lemen yóm dou kligal.’

<sup>22</sup> Ne bud sut yóm tau tehe lewu libu kun nogot, monen se kun, ‘Tehe lewu libu yóm hogotem dou, Sér. Ni sii yóm bud uléken, lewu libu.’

<sup>23</sup> Ne bud monen se mò du yóm góñón mogot, ‘Wóyón dé. Tey hyu nim uu, teyi gulit. Lemwót bë yóm kgulitem bë yóm udì hogotu kóm, bong ne sigangu tahem. Yó ne, holi mung dou dé anì gmungi lemen yóm dou kligal.’

<sup>24</sup> Ominen sut yóm tau tehe mogot lemibu, mom yó monen mò yóm amo-hen, ‘Tngónu uu, Sér, tódô ket du snoloem. Tódô gel nutahem yóm là kóm hulu du, ne yóm là kóm leniteg du.

<sup>25</sup> Likoe kóm, yó góñóm mon, deng tódô lebengu yóm filakem. Ni dé yóm filakem.’

<sup>26</sup> Mung kudél yóm góñóhen mogot, monen, ‘Teyi bakà yóm uu. Alii mduk. Igoem sem deng mon du gel nutahu yóm là dou hulu du ne yóm là dou leniteg du.

**27** Ke yó se yóm dou gel nmò, moem là hemsù du bè bangkù du yóm dou filak anì wen ngaen bè yóm kkólu?"

**28** Ne ominen mudél ebè yó kem tauhen, monen, 'Na ye béléen yóm lemibù hogotu du, blay ye tum tau deng sfolò libu nô béléen.'

**29** Yóm tau ke gulit kogoten du yóm nô béléen, angat bud wen tnù le du efet gengón. Okóm yóm tau ke là gulit kogoten du yóm deng nô béléen, angat bud nwa le béléen.

**30** Bong yóm tau laen dù mu yó, tódô tudà ye etu bè lewà bè gónón alì kmifu, ne bè yó tendo gónón heslaf ne dmumu mkik sembéhé kakim.' "

### *Kkukum Dwata tau*

**31** "Kesok bud kól yóm Ngà Tau mò mogot klamangen," mon Jisas, "tódô kdéen hógów Dwata gu bè longit gotu semguyun du, ne angat myón bè yóm gónón myón kmukum."

**32** Angat tódô kdéen tau bè klamangen benwu gotu stifun ebè soluhen, ne sentólóngen lu. Lómó kmò kestólóngen kul, lómón yóm tau semgyok ógóf, gel sentólóngen yó kem ubiha bè yó kem kambing.

**33** Yó kmoen kul, suen bè kwananen yó kem tau tedeng kmò le, ne suen bè iwóngen yó kem tau gel mò sidek.

**34** Angat monen mò yó kem nô bè kwananen yóm Hol Geta yó, 'Géhél ye ne, yu kem tau deng tendo gel tnóbóng MÀ. Hlós ye ebè yóm benwu deng tehe eles hentifesen bélê ye lemwót bè hol kbut benwu.

**35** Abay se bè yóm tehe kbitilu, tódô henken ye ou. Ne bè yóm tehe kleengu, tódô hinum ye ou. Ne bè yóm tehe kilohu, tey khódó ye do.

**36** Bè yóm tehe klaen dù nesu, wen blay ye do mò nesu. Ne bè yóm tehe kwen desu, tey gel kesgifà ye do. Ne bè yóm tehe knóu lem blanggù, tódô gel nauy ye ou.'

**37** Angat bnalà yó kem tau tedeng kmò le, mon le, 'Kilón de kton me kóm bitil, Sér, ne kehken me kóm ne khinum me kóm?'

**38** Kilón de yóm kton me kóm milo, ne yóm khódó me kóm bè gónô me? Kilón de yóm keblay me kóm nes mò nesem?

**39** Kilón de yóm monem kwen desem, ne yóm knóem lem blanggù, ne yóm kauy me kóm?

**40** Angat bnalaen se lu yóm Tau Hol Geta, monen, 'Tódô tulónu kuy ktahuhu, yó se deng nmò ye bè yó kem dumuhu setwoli alì gdanà, lómón ke béléu gónó ye mò du yóm yó.'

**41** Ominen yó mon du mò yó kem tau fi bè iwóngen, monen, 'Mdó ye béléu bè ni, yu kem tau deng eles golu elem tafak Dwata. Ditu gónó ye nô lem yóm ofi laen dù tul katayen deng hentifes Dwata bè Seitan ne yó kem hógówen.'

**42** Abay se yóm tehe kbitilu, là kô dog henken ye do. Ne yóm tehe kleengu, là kô dog hinum ye do.

**43** Yóm tehe kilohu, là kô hnódó ye do. Yóm tehe klaen dù nesu, là kô dog benlay ye do. Yóm tehe kwen desu ne yóm tehe knóu lem blanggù, là kô dog sen-gifà ye do.'

**44** Ne angat bnalà le se, mon le, 'Kilón de kton me kóm bitil, Sér, ne meeng ne milo? Ne kilón de yóm klaen dù nesem ne yóm kwen desem ne yóm knóem lem blanggù, ne là dog tnóbóng me kóm?'

**45** Ne yó monen mò kul yóm Tau Hol Geta yó, 'Tódô tulónu kuy ktahuhu, yóm là dog któbóng ye yó kem tau alì gdanà, lómón se yó ne yóm là dog któbóng ye dou.'

**46** Duhen yó," mon Jisas, "tódô le gotu hlós elem yóm tafak Dwata laen dù sónen. Okóm yó kem tau tedeng kmò le, guta le yóm klowil laen dù sónen."

## 26

*Kessatul le yóm kmò kekfô le ke Jisas*

(Mark 14:1,2; Luk 22:1,2; Jan 11:45-53)

**1** Timbow deng ni kem tulón Jisas kul ni, ominen mon du mò yó kem gel lemolò du,

**2** “Deng tngón ye lewu ni he kehtohen yóm mò ken bong bélê tekuy bë Kdaw Khius. Segeng du yóm angat keblay le yóm Ngà Tau elem tdok yó kem tau angat tmutuk du bë kros.”

**3** Bong yó kem geta bë yó kem gel demsù ebè Dwata kkolen bë yó kem tuha gónó le gel galak yó kem Ju, gotu le stifun bë gónô bong Kyafas, yóm tau geta bë yó kem gel demsù ebè Dwata.

**4** Yó natul le yóm kmò klifut kekfô le ke Jisas anì ghatay le.

**5** “Okóm,” mon le, “bê tekuy hesegeng bë yóm mò ken bong, kô wen sidek nmò le bélê tekuy yó kem tau.”

*Ketwélen hnolo te kulu Jisas yóm sotu libun bë Bitani*  
(Mark 14:3-9; Jan 12:1-8)

**6** Bè yóm knô Jisas bë Bitani, mken bë gónô yóm sotu tau tehe gemnóm des mifù boluyen Simun.

**7** Yóm igoen mken bë yó, sut béléen yóm sotu libun, wen sobuy alabastér nwiten hnok yóm hboo alì mebtes, ne tey minggel boohen. Tódô gotu msulék koken te kulu Jisas.

**8** Bè yóm kton le du yó kem gel lemolò du, mo le mom lembut, mon le, “Moen ke gotu namaen yóm yóo?”

**9** Mom hyu ke tehe tódô hbaluen, bong he gutahen du, ominen bemlay du bë yó kem élél yóm blihen.”

**10** Hyu gungol Jisas yóm udél le, yó gónón mon du mò kul, “Moen de ke bnólów ye kun nmò nim libun nii? Igoen tey minggel yóm nmoen béléu ni.”

**11** Hyu he kul yó kem tau élél, eles le tendo nô lem blóng ye. Là dou.

**12** Yóm koken béléu ni, mò eles hgifaten dou bë yóm angat kebeng le do.

**13** Tódô tulónu kuy ktahuhen,” mon Jisas, “balù kihu gónón angat e mból bë klamangen benwu yóm Tulón Hyu lemwót bë Dwata, tendo gel gboluy snéen kun nim libun ni lemwót bë yóm deng nmoen béléu.”

*Katul Judas ke Jisas*  
(Mark 14:10,11; Luk 22:3-6)

**14** Kogolen bë yó, lemwót Judas Iskariyut, sotu bë yó kem sfolò lewu gel lemolò ke Jisas, tódô mógrów etu bë tu kem geta bë yó kem gel demsù ebè Dwata.

**15** Yó snólóken bélê le, monen, “Hilu de blay ye do ke ou fen malak kuy ebè Jisas?” Deng mom yó nmò le, tódô nsó le béléen tlu folò botù yóm kul filak mgel.

**16** Tódô lenwóten bë yó ne, sónmò Judas mebel lanen malak kul ebè Jisas.

*Kken Jisas ne yó kem gel lemolò du yóm ken bë Kdaw Khius*

(Mark 14:12-21; Luk 22:7-14, 21-23; Jan 13:21-30)

**17** Timbow hto yóm tanay kdawen bë yóm mò ken bë yóm gel kken yóm mambang laen dù bulung henoken, mógrów le ebè Jisas yó kem gel lemolò du, snólók le béléen, mon le, “Gónóm tò hmò du kum de yóm ken tekuy bë nim mò ken bë Kdaw Khius ni?”

**18** Ne mon Jisas se mò kul, “Mógrów ye ebè yóm sotu tau bë syudad Jirusalim, mon ye mò du, ‘Ni se tinoken ebéléem yóm tau gónó tekuy gel htolok, monen, Deng hto ne yóm buteng tehe olu Dwata do. Nmou bë gónóem yóm mò ken bë Kdaw Khius, mung do yó kem gel lemolò do.’”

**19** Tahu se, tódô lolò le yóm deng mon Jisas mò kul, ne nmò le yóm ken mò ken le bë yóm kifu yó.

**20** Timbow deng móyón kifu, omin le gotu seyón mken le Jisas ne yó kem sfolò lewu gel lemolò du.

**21** Yóm igò le tolo mken, mudél ebélê le Jisas, monen mò kul, “Tódô tulónu kuy ktahuhen, sotu bélê ye angat mlay do sumóng.”

**22** Ya tey sidek klóngón nawa le, tódô sotu kun mon du mò ke Jisas, “Là ou du kô yó?”

**23** Mon Jisas se mò kul, “Yó se tau dumuhu segeng mdù elem sóbów yóm mambang, du se yóm angat mlay dou sumóng.”

**24** Yóm Ngà Tau nan na matay he,” mon Jisas, “lómón yóm deng tehe eles tulónen bë Sulat Dwata. Bede tey

angat kegtafaken yóm tau bemlay sumóng. Mom tumù ne ke béen dog tehe tau.”

<sup>25</sup> Mudél se Judas, yóm mlay du sumóng, monen, “Ou kô, Sér, gónón e gbak yóm monem yó?”

Bnalà Jisas se, monen, “Yó sem deng monem yó.”

*Yóm mò hemget yóm fasad Dwata  
(Mark 14:22-26; Luk 22:14-20; 1 Kurin 11:23-25)*

<sup>26</sup> Yóm igò le tolo mken, nwa Jisas yóm mambang, bede nan ne mni bë Dwata. Ominen kembéng du, ne blayen yó kem gel lemolò du, yó monen, “Ni se yóm dou lówó. Nwa ye, ne ken ye.”

<sup>27</sup> Ominen mkay yóm tgayan gónón nô yóm ninum le, nan na bud mni bë Dwata, ominen mon du mò kul, “Ni sensinum ye.”

<sup>28</sup> Ni se dou litô mò hemget du yóm deng fasad Dwata bë kem kun tau. Ne tey dé tau gónón gamà nim litou ni mò lan Dwata hmifót salà le.

<sup>29</sup> Tódô tulónu kuy, hatan bud ninumu he nim ninum ni ke deng kól bë yóm kdaw angat kinum tekuy yóm ninum lomi bë yóm kun benwu nogot Mâ.”

<sup>30</sup> Tikóng deng kinum le, omin le gotu semngal yóm sotu sngal dmoyón ke Dwata, omin le lemwót ebè Bulul Ulib.

*Eles ktulón Jisas yóm kehlalà Pitér du  
(Mark 14:27-31; Luk 22:31-34; Jan 13:36-38)*

<sup>31</sup> Bè yóm tolo lel le mógo, mon Jisas mò yó kem gel lemolò du, “Kifu ni kdeng tódô gotu sentagak ye ou, yakà deng monen du bë yóm Sulat Dwata, yó monen,

‘Angat hfatay Dwata yóm tau semgyok ubiha,  
ne tódô gotu sekla yó kem ubiha-hen.’\*

<sup>32</sup> Okóm,” mon Jisas, “sok deng bud hlowil Dwata ou, angate fen gna bélê ye etu bë Galili.”

\* <sup>26:31</sup> Sikaraya 13:7.

<sup>33</sup> Hebkó mudél se ke Pitér kun, monen, “Baluen se ke gotu sentagak le uu yó kem dumuhu, Sér, là kô naw e tnagak kóm dou.”

<sup>34</sup> Bnalà Jisas se, monen, “Tódô tulónu kóm ktahuhu, Pitér, gu laanen là deng kmóót onuk kifu ni kedeng, deng sana tlu dulékem hmalà yóm ketngónem dou.”

<sup>35</sup> Mon Pitér se, “Baluen he ke munge matay béléem, Sér, là kô naw e hnalà kóm dou.” Tódô senged se udél yó kem dumu gel lemolò ke Jisas.

*Kni Jisas bë Dwata bë Gitsimani  
(Mark 14:32-42; Luk 22:39-46)*

<sup>36</sup> Ngang le Jisas mógo efet le kól bë yóm sotu ngà hungul koyu boluyen Gitsimani, ne mon Jisas mò yó kem gel lemolò du, “Na ye myón bë ni bë yóm igou mni bë Dwata bë tuu.”

<sup>37</sup> Niten Pitér ne yó kem lewu ngà Sibidi. Ne tódô gleket béléen yóm tey ksídeks kegnómen du.

<sup>38</sup> Monen mò kul, “Tey sidek gnóm yóm gleket béléu ni, là hol tò gbeku hembala du. Nô ye bë ni ne kuy, ne eles ye mingat.”

<sup>39</sup> Ominen mógo hlayuk udì, ne tódô hegluduk lemfen bë tonok, ne mni bë Dwata, monen, “Ó Mâ, ke yó dum gmò, kóhem tahu dé yóm angat tey hlayamu ni. Okóm balù wen se yóm dou kóyô, tódô hendengem yóm kóm kóyô béléu.”

<sup>40</sup> Timbow deng knihen, ominen mulék ebè yó kem tlu tau nwiten, deng le mom gotu henga tungô. Gotu bentiken lu, ne monen mò ke Pitér, “Là gbek ye mingat kô, balù tek sotu uras?”

<sup>41</sup> Bê ye tagad tungô dé. Hol ye mni bë Dwata anì là wen gónó ye gsindil bë Seitan. Tngónu wen se óyô ye mò du yóm monu mò kuy ni, okóm là gbek lówó ye du.”

<sup>42</sup> Bud kewót Jisas bë yó bë gewuhu dulék, ne bud mni bë Dwata. Yó utóm yóm knihen, monen, “Ó Mâ, ke là se hyu mkó du béléu yóm

angat tey hlayamu ni, tódô henlósem sen yóm kóm kójô.”

<sup>43</sup> Ominen bud mulék ebè yó kem tlu tau niten, deng le mom bud henga tungô, là kô dog gukat le du mata le.

<sup>44</sup> Ne ominen bud tmagak kul na e mni bë getluhen dulék, tódô nuliten yóm gna kmò knihen.

<sup>45</sup> Ne bud mulék ebélê le, ne monen mò kul, “Tolo lel ye he kô tungô ne hegñô? Ngem deng kól du ne yóm uras le kemfô du yóm Ngà Tau, ne blay le elem tdok yó kem tau sidek nmò le.

<sup>46</sup> Ngem yó dé yóm tau mlay do sumóng. Btik ye ne, na tekuy e sen-long.”

*Kekfô le ke Jisas  
(Mark 14:43-50; Luk 22:47-53; Jan 18:3-12)*

<sup>47</sup> Igò Jisas tolo mudél, gdfô bë yó se Judas, yóm sotu bë yó kem sfolò lewu gel lemolò du. Tey tau wen huli du. Wen se lenumak sudeng bélê le, ne wen se kmulóng bogul. Lu se yó kem tau hógów yó kem geta gel demsù ebè Dwata ne yó kem tuha góno le gel galak yó kem Ju.

<sup>48</sup> Deng eles tulón Judas yó kem tau mung du, monen, “Yó se tau neleku kdeng, yó se yóm tau hnebel ye. Tódô kenfô ye.”

<sup>49</sup> Timbow gdek Judas, tódô hekteng ebè Jisas, monen, “Na Sér,” ne ominen melek du.

<sup>50</sup> Omin Jisas mudél ebè Judas, “Yó ne, Wè, géhél nmoem yóm nógówem.” Omin le gotu demlu kemfô ke Jisas, ya tey kget kogot le du.

<sup>51</sup> Sotu bë yó kem gel lemolò ke Jisas kendel kemtos dmilot sudeng, tódô tnibóhen yóm sotu tau, okóm olon sfak doli klinguhen yóm tau tnibóhen yó. Yóm tau hnali ni, du sotu tau gel dók yóm geta bë yó kem tau gel demsù ebè Dwata.

<sup>52</sup> Bë yóm kton Jisas yóm tau fen tmibó yó, bnólówen, monen, “Tensem lem lumaken sudengem. Ngem he yóm tau smalig bë sudeng, angat bud hatayen sudeng.

<sup>53</sup> Ilóem là tngónem du kô yóm kegbeku mni tóbóng bë Mâ, ne tódô kendel hógówen balù hilu libu yó kem gel hógówen gu bë longit mò tmóbóng do.

<sup>54</sup> Okóm ke yó nmou, tedu se tô kdo-hoen du yóm deng tehe hsulat Dwata golu etahu?”

<sup>55</sup> Omin Jisas mudél ebè yó kem tey tau wen kemfô du, monen, “Tey, glok ye mit suk ne bogul nim na ye e kekfô dou ni. Ilóem tô heskél ye ou bë yóm tau gel mò sidek. Igou se gel myón tmolok lem Gónô Dwata ket kdaw, là se kô géhél kenfô ye do.

<sup>56</sup> Okóm nim nmò ye béléu ni, deng góón dohò yóm tehe hsulat Dwata yó kem gna tugoden.” Bè yóm kekfô le ke Jisas yó, deng mom gotu sentagak yó kem gel lemolò du, mlóy le.

*Kkukum le ke Jisas yó kem Ju  
(Mark 14:53-65; Luk 22:54,55, 63-71; Jan 18:13,14, 19-24)*

<sup>57</sup> Kewót le bë yó ne, nit le Jisas ebè góón Kyafas yó kem tau kemfô du yó koni. Nim Kyafas ni, geta bë yó kem tau gel demsù ebè Dwata. Deng le eles gotu stifun bë yó ne yó kem tau gel tmolok hlau ne yó kem tau tuha góno le gel galak yó kem Ju.

<sup>58</sup> Bè yóm kwit le ke Jisas, fen holun huli Pitér efet kól bë góón yóm tau geta yó koni. Ne hlós e talak lósól, ne seyón bë yó kem tau gel mentey bë yó, hnilingen yóm mò kmò le ke Jisas.

<sup>59</sup> Ne lemwtó yó kem tau geta bë yó kem gel demsù ebè Dwata ne kdê yó kem tau geta mogot kukum, mebel le dalil mò lan le hfatay ke Jisas lemwtó bë yóm gel tifù yó kem dumu tau, baluen ke là tahuhen.

<sup>60</sup> Okóm laen kô dù ton le, balù yóm tey kdê tifù le du, hono là kóen tahu. Ominen yó wen lewu tau mdà,

<sup>61</sup> yó kul tifù, mon le, “Gel monen nim tau ni, ‘Gbeku gembà du yóm Gónô Dwata ni, ne gbeku se bud hdà du bë tlu kdaw.’”

<sup>62</sup> Ne hebkó mdà se yóm geta bë yó kem gel demsù ebè Dwata, monen mò ke Jisas, “Là bnalaem du kô yóm ktifù le kóm ni?”

**63** Okóm là dogen mudél Jisas. Ominen bud mudél ebéléen yóm tau geta yó koni, monen, "Wen snólóku béléem. Bè yóm kbalaem du, hol hlanem bè boluy yóm Dwata laen dù tul katayen. Tulónem kum kun ktahuhen ke uu yóm Misaya, yóm hol Ngà Dwata."

**64** Bnalà Jisas se, monen, "Yó sii deng monem. Okóm wen tulónu kuy, angat ton ye yóm Ngà Tau myón fi bè kwanan Dwata, yóm laen dù là gbeken du, ne angat ton ye se yóm kesfuléken edini mung bè lobun."\*

**65** Mung kungolen du nim udél Jisas ni yóm tau geta bè yó kem gel demsù ebè Dwata, botong tódô kenséen nesen, monen, "Tô hsengeden knóen bè Dwata. Omin he ke bud wen tifù du. Deng tódô gungol tekuy yóm kehsengeden knóen bè Dwata.

**66** Tedu kuy kmò kmon du yóm tau ni?"

Mon le se, "Hyu ke tódô hnatay."

**67** Nbut le bè yó ne tendo hemsidek ke Jisas. Gotu sendulak le lem uyóhen, ne sensuntuk le, lel le semtfê du,

**68** mon le, "Ke tahu uu se yóm Misaya, tulónem kum kun yóm tau temfê kóm."

### *Kehlalà Pitér yóm ketngónen ke Jisas*

(Mark 14:66-72; Luk 22:56-62; Jan 18:15-18, 25-27)

**69** Sana tolo kyón Pitér talak lósól he kun. Ne móglow ebéléen sotu bè yó kem ngà libun gel dók yóm tau geta bè yó kem gel demsù ebè Dwata, monen mò ke Pitér, "Kaem uu se sotu tau gel mung ke Jisas, yóm tau lemwót bè Galili."

**70** Okóm mom hlalà bélè le Pitér, monen, "Là kô naw e tngón du dou yóm monem yó."

**71** Ne bud móglow ebè bak tikeb yóm labat. Ne bud wen sotu ngà libun mton du, ne monen mò yó kem tau bè yó, "Ni se sotu tau gel mung ke Jisas, yóm tau lemwót bè Nasarit."

**72** Ya tey bud kehlalà Pitér, gloken smafà ke tngónen Jisas.

\* **26:64** Lingón 110:1, Danyél 7:13.

**73** Tikóng deng bud legen udì bè yó, móglow le ebè Pitér yó kem tau mdà gu bè yó, mon le mò du, "Kaem uu se hol sotu bélè le. Dilô me bè kudélem lemwótì bè Galili."

**74** Tódô smafà Pitér lem blóng le, monen, "Hol tnafak Dwata se o ne ke kéngu yóm tulónu kuy. Là kô tngónu du dou yóm tau yó." Ne tódô sen-gengen se kmóót onuk.

**75** Ominen yó gbel bè nawa Pitér yóm deng tehe eles mon Jisas mò du, yóm monen, "Gu laanen là deng kmóót onuk kifu ni kdeng, deng sana tlu dulékem hmalà yóm ketngónem dou." Unihen gbel bè nawahen yóm tehe mon Jisas mò du, tódô hewà, ya tey sidek kkiken.

*Kwit le ke Jisas ebè Paylét*  
(Mark 15:1; Luk 23:1,2; Jan 18:28-32)

## 27

**1** Timbow deng mwas bè yó, gotu le stifun yó kem geta bè yó kem gel demsù ebè Dwata ne yó kem tuha góno le gel galak yó kem Ju, sensatul le yóm kmò khatay le ke Jisas.

**2** Omin le hmengked mfét du kdina, ne nwit le ebè Paylét, yóm tau lemwót bè Rom gubérnor bélè le.

*Kówól Judas lihol*  
(Kul Nmò 1:18,19)

**3** Timbow ton Judas, yóm tau tehe mlay ke Jisas sumóng, yóm deng kegtuled Jisas, ya tey khuli selen. Ominen bud tó hulék yóm tlu folò botù filak mgel tehe blay le du yó kem geta bè yó kem gel demsù ebè Dwata, ne yó kem tuha góno le gel galak yó kem Ju.

**4** Mon Judas, "Tey kegsalau. Deng mom hekfóu yóm tau laen kô dù salaen anì hnatay le."

Bnalà le se, mon le, "Laen kô dù bud kum hentngón du ne yóm monem yó. Tódô kóm ne yó."

**5** Tódô gotu legas tudà Judas elem Gónô Dwata yóm filak tehe blay le

du, ominen tódô lemwót na a mówól lihol.

<sup>6</sup> Yóm filak tudà Judas, gotu bud nulut yó kem geta bè yó kem gel demsù ebè Dwata ne mon le, “Là hyuhen bè yóm hlau tekuy ke homong te bè yóm filak gel blay le ke Dwata yóm filak ni, yakà filak bli litô tau du.”

<sup>7</sup> Yó deng kessatul le du yóm filak yó, tódô bli le tonok mò gónó le lemeng ke wen tau là Juhen matay bélê le. Yó boluyen yóm tonok benli le, Tonok yóm Tau Gel Mifil Kuleng.

<sup>8</sup> Okóm yó tles boluy le du, Tonok Bli Litô, efet yóm kmoen ni.

<sup>9</sup> Yóm nmò le yó deng gónóhen dohò yóm tehe mon yóm sotu tehe gna tugod Dwata boluyen Jirimaya,

“Nwa le yóm tlu folò filak mgel yó, yó se kul btes du yó kem tau Israél.

<sup>10</sup> Ne bli le tonok yóm tau gel mifil kuleng.

Lómón se yóm deng kun kehlan du Dwata.”\*

*Ksólók Paylét ke Jisas  
(Mark 15:2-5; Luk 23:3-5; Jan 18:33-38)*

<sup>11</sup> Lemwót ke Jisas, nit le ebè solu Paylét, yóm tau lemwót bè Rom gubérnor bélê le. Snólók Paylét Jisas, monen, “Uu kô tau hol geta bè yó kem Ju?”

Mon Jisas se, “Yó sii deng monem.”

<sup>12</sup> Okóm là kô bnalaen kul yó du kem dê tifù le du yó kem geta bè yó kem gel demsù ebè Dwata ne yó kem tuha gónó le gel galak,

<sup>13</sup> Yó gónó Paylét bud mon du mò ke Jisas, “Gungolem kô yó kem tey dê tifù le kóm?”

<sup>14</sup> Okóm là dog bnalà Jisas kul, balù sekteb. Ya tey ketnga yóm gubérnor yóm là dog kbalà Jisas kul.

*Tódô hatay yóm kkukum le ke Jisas  
(Mark 15:6-15; Luk 23:13-25; Jan 18:39-19:16)*

<sup>15</sup> Yó kun adat yóm gubérnor ke sok gel kól yóm mò ken bong bè Kdaw

Khius, sal gel wen tau blanggù hefe-waen, bede yóm tau kul nélék yó kem tau.

<sup>16</sup> Bè yóm kdaw yó, wen sotu tau blanggù ali tótól, boluyen Jisas Barabas.

<sup>17</sup> Timbow le deng gotu stifun ebè yó yóm tey tau wen, snólók Paylét lu, monen, “Tau du de kuy nójò mò hewau bélê ye, Jisas Barabas duhen ke Jisas yóm Misaya?”

<sup>18</sup> Deng tódôtngón Paylét se yóm alì kéléś nawa le ke Jisas yó kem tau mit du ebéléen yó.

<sup>19</sup> Yóm igò Paylét tolo myón bè yóm gónón myón kmukum, wen sulat hwit yehenen ebéléen, monen, “Hol bái abay gbót hemsidek du kóm yóm tau laen dù salaen yó. Tey sidek kegnómu du ebuteng lemwót bè yóm keknahu du.”

<sup>20</sup> Okóm yó nmò yó kem geta bè yó kem gel demsù ebè Dwata ne yó kem tuha gónó le gel galak, nofong le yó kem tau sbung bè yó anì yó hni le Barabas, ne fen hfatay le Jisas.

<sup>21</sup> Bud snólók Paylét yó kem tau sbung bè yó, monen, “Mahi du bè ni kem lewu tau monu ni koni mò hewau ebélê ye?” Mon le se, “Barabas.”

<sup>22</sup> Ne mon Paylét, “Tedu se tō kmou ke Jisas du, yóm bnoluy le Misaya?”

Deng mom yó balà le du, mon le, “Htutukem bè kros kun yó du.”

<sup>23</sup> Bud snólók Paylét bélê le, monen, “Moen de? Tedu deng salaen bélê ye?”

Okóm deng mom lenwê le hetê, mon le, “Tódô htutukem bè kros ne.”

<sup>24</sup> Timbow ton Paylét yóm là kegbeken hewà ke Jisas, ne dilóen bè yó kem tey tau sbung bè yó wen tō sidek nmò le bélén ke là nmungen du yóm kul knójò, yó gónón tódô ma él, ne noloben tdoken lem mata le, monen mò kul, “Laen dù dou du bè yóm khatay ye du nim tau ni. Tódô kuy nbô yóm kgamà litóen.”

\* <sup>27:10</sup> Jirimaya 32:6-9, Sikaraya 11:12,13.

<sup>25</sup> Ne mon le se, “Tódô kum nbô ne litóen nim tau ni, dalang se kem kum ngà.”

<sup>26</sup> Omin Paylét hewà ke Barabas ebélè le, ne nan na habid hifes Jisas, ne ominen bemlay du ebè yó kem sendalù mò na e tmutuk du bè kros.

*Kehlowon le ke Jisas yó kem sendalù*  
(Mark 15:16-20; Jan 19:2,3)

<sup>27</sup> Lemwót yó kem sendalù Paylét, nwit le Jisas elem yóm gónô bong yóm gubérnor, ne gotu le sbung ebè yó se kul yó kem dumu sendalù bè yóm kul bung.

<sup>28</sup> Ne kó le nes Jisas, hesek le du yóm nes tógó hulô, hningón nmò le tau hol geta.

<sup>29</sup> Ne lenikin le yóm sotu kay tinu semnual mò kuruna suub le bè kuluhen, ne wen fes hogot le du bè sigel kwananen. Gotu le mtud bukol bè soluhéen, hningón tó nmò le béléen yóm gel kadat le yóm tau hol geta. Ya tey kehlowon le du, mon le, “Ni sii yóm tau hol geta bè kem Ju. Yake hol tahà klowilen.”

<sup>30</sup> Lelle semdulak du, bud na le yóm fes hogot le du, bud sensulit fes le te kuluhen.

<sup>31</sup> Timbow le deng tmakas hmowon du, omin le bud mlus yóm nes hesek le du, bud hesek le du yóm sana kun nes. Kewót le bè yó ne tódô nit le ebè yóm gónó le tmutuk du bè kros.

*Ktutuk le ke Jisas bè kros*  
(Mark 15:21-32; Luk 23:26-43; Jan 19:17-27)

<sup>32</sup> Yóm tolo knô le bè lan, geslong le yóm sotu tau boluyen Simun, lemwót bè Sayrin.\* Tódô gnaga htihang le du yóm kros Jisas.

<sup>33</sup> Ngangen ne gefet le bè Gol-gata. Yó lanen yóm boluy yó, “Bangag Kulu.”

<sup>34</sup> Wen tó hinum le ke Jisas yóm ninum lóbô, wen bolen yóm sotu kay bulung héét. Bè yóm ktilów Jisas du, là dog henlós ninumen du.

\* 27:32 Yóm Sayrin ni, sotu syudad là sekna bè benwu Libya bè Afrika. \* 27:46 Lingón 22:1.

<sup>35</sup> Omin le tmutuk du bè kros. Yó nmò yó kem sendalù, sensatù le yó kem nes Jisas.

<sup>36</sup> Tikóng deng yó, tódô le myón bè yó, bnentey le kmò Jisas.

<sup>37</sup> Wen snulat dket le senta kuluhen yóm udél duón le du, yó monen, “Ni se Jisas, tau hol geta bè yó kem Ju.”

<sup>38</sup> Ne wen lewu tau gel mò sidek homong tnutuk le, sotu hteg le fi bè kwananen, ne sotu se fi bè iwóngen.

<sup>39</sup> Yó kem tau gel mius bè yó, sónmò le kmotuk, ne sendekà le Jisas, tey dê udél le sidek ebéléen,

<sup>40</sup> mon le, “Uu kun tó gembà du yóm Gónô Dwata, ne tek tlu kdawem bud hdà du. Yó ne, lenwaem knóem kun ke tahu uu se yóm Ngà Dwata. Kmóhi elaan dé.”

<sup>41</sup> Senged se kul kehlowon du yó kem geta bè yó kem gel demsù ebè Dwata, ne yó kem gel tmolok hlau, ne yó kem tuha gónó le galak.

<sup>42</sup> Yó mon le, “Deng gel hlowilen kem dumu tau, là kô dog gbeken hlowil kun knô. Du kô kun tau hol geta bè yó kem tau Israél? Hentahu tekuy ke gbeken bud kmó elaan.

<sup>43</sup> Gel smalig bè Dwata kun, ne du kun yóm Ngà Dwata. Nénég ke móyô Dwata lemwà du.”

<sup>44</sup> Balù yó kem lewu tau gel mò sidek gomong tnutuk le bè Jisas, gbót le semdekà se kul.

*Katay Jisas*  
(Mark 15:33-41; Luk 23:44-49; Jan 19:28-30)

<sup>45</sup> Tikóng deng gtungu kdaw, tódô kmifu talak tonok efet sóól mosol kdaw.

<sup>46</sup> Timbow deng sóól mosol kdaw, omin Jisas hgel udélen, monen bè hol kun udél, “Eli, Eli, lema sabachthani?” Yó lanen yóm udélen yó, monen, “Ó Dwata, Ó Dwata, moen de ke tódô bayaem ou?”\*

<sup>47</sup> Wen kem tau mdà bè yó mungol du yóm udél Jisas yó, mon le, “Éhé, tnabahen Ilaydya.”

**48** Ne wen sotu bélê le bè yó kendel ma yóm lómón tō gófós, ne duen lem yóm ninum lóbô là mebtesen, ominen hemsù du bè tukô yóm ngà koyu mò gónón tō hsef du ke Jisas.

**49** Okóm mom mon kem dumu tau, “Tagad dé. Nénégn tekuy ke sut Ilaydya mò lemwà du.”

**50** Omin Jisas bud hgel du udélen, ne tódô milot se nawahen.

**51** Uma kóm bè yóm Gónô Dwata, wen tey nes mfól mò seng yóm dfél hetfing le ebè Dwata. Bè yóm kilot nawa Jisas, tódô sen-gengen lómón ke hninggel dnólóhem bè gónón sóól yóm nes yó, lemwót fi ta kól elaan. Ne tódô sen-gengen se mbel tey linol bong, tódô gotu meskang se yó kem botu lembang.

**52** Ne gotu setngag yó kem kilib gónó le lembeng, ne tey dê bè yó kem kun tau Dwata deng tehe matay, gotu bud hlowil Dwata lu.

**53** Tódô le gotu hewà bè yó kem lebeng le. Ne kogol yóm deng klowil Jisas, mógró le ebè Jirusalim se kul, ne tey dê tau mton kul.

**54** Bè yóm kehto Jisas, tolo mentey yóm kfitan, mung du yó kem sendaluen. Ya tey sidek klikò le bè yóm tey linol ne yó kem dê dumu ton le. Botong mon le, “Tahu duhen ni se yóm Ngà Dwata.”

**55** Wen se kem libun nô bè yó, olo le tódô temngel mayuk. Tehe le mung ke Jisas lemwót gu bè Galili mò gel tmóbóng du.

**56** Mung kul se yóm Midi lemwót gu bè Megdala, ne yóm sotu Midi, Yê Jim ne Jusif, ne mung kul snéen yehen Sibidi.

### *Kebeng le ke Jisas (Mark 15:42-47; Luk 23:50-56; Jan 19:38-42)*

**57** Tikóng móyón kimel, wen sotu tau kwasa lemwót bè Arimatiya sut bè yó, boluyen Jusif. Du se sotu tau gel lemolò ke Jisas.

**58** Tódô mógró ebè Paylét nan e bal du yóm kwahen yóm lówó Jisas. Tahu se, hlus Paylét du.

**59** Kewót Jusif bè yó, mógró ebè tum gónô Jisas nô, ne nwahen elaan yóm lówóhen, ne bnausen yóm nes bukay hanà lomi.

**60** Uma kóm deng wen kilib lomi hokol Jusif bè but léhék mò tō kun angat gónô lebeng, ne tódô bè yó gónón lebeng ke Jisas. Ne wen botu bong hluyen ebè yóm bak lebeng mò sengen, ne ominen yó lemwót mulék.

**61** Mung le lembeng se kul le Midi lemwót bè Megdala ne yóm sotu Midi. Myón le bè yó, smolu le ebè yóm bak lebeng.

### *Kbentey yó kem sendalù yóm lebeng Jisas*

**62** Timbow deng hayahen bè yó, uma kóm kul Kdaw Kehegnô yó kem Ju, gotu le mógró ebè Paylét yó kem geta bè yó kem gel demsù ebè Dwata ne yó kem Farisi.

**63** Mon le mò du, “Ó Sér, gtulón bè nawa me yóm tehe monen tum tau mò kéng tu yóm kegenen tolo mowil, ‘Bè getluhen kdaw, bud hlowil Dwata ou.’

**64** Yó gónóm mon, holi mdók kut sendalù etu bè lebengen mò mentey du efet tlu kdaw anì laen dù lan le mnagaw lówóhen yó kem tehe gel lemolò du, ne omin le yó bud tmulón du kem tau yóm deng klowilen. Ke yó tō nmò le, milud he kegsukat kem tau senta yóm gnán.”

**65** Mon Paylét se mò kul, “Yó ne, mit ye sendalù anì hol bnentey le tum lebengen.”

**66** Tahu se, lemwót le. Ya tey bud kehget le du yóm seng bè bak lebeng Jisas. Wen deket nmò le bè baken anì dilò le ke wen tau tō mkó du. Ne wen kem sendalù tebel le mò mentey bè yó.

## 28

### *Klowil Jisas (Mark 16:1-10; Luk 24:1-12; Jan 20:1-10)*

**1** Timbow kogol yóm Kdaw Kehegnô, yóm hanà tolo minal mwas bè Akad, lemwót Midi, yóm Midi lemwót

bè Megdala, ne yóm sotu Midi, tódô le temkifu na le e nauy lebeng Jisas.

<sup>2</sup> Timbow le kól ditu, tódô mbel tey linol bong. Ne wen hógów Dwata htuntun gu bè longit sut bè yó, tódô hluyen yóm botu seng bè bak lebeng, ne tódô bud myón taken.

<sup>3</sup> Tey mnóng lem uyóhen yóm hógów Dwata yó, hol lómón ke mkal silà, ne tey sminang bukay yóm nesen.

<sup>4</sup> Ya tey sidek klikò le yó kem sendalù mentey bè yó, tódô setbol kkel le, ne tódô le gotu masà bè tonok, lómón ke deng le gotu matay.

<sup>5</sup> Ne mudél yóm hógów Dwata ebè yó kem libun, monen, “Bê ye abay hlikò. Tngónu hnebel ye Jisas, yóm lomi tnutuk le bè kros.

<sup>6</sup> Là buden nô bè ni ne. Deng hlowil Dwata lómón yóm tehe mon Jisas mò kuy. Ngem ni hnénég ye yóm tehe gónón masà.

<sup>7</sup> Géhél ye mulék ne, ne tulón ye yó kem gel lemolò du, mon ye mò kul, ‘Deng hlowil Dwata Jisas. Deng gna bélè ye ne ebè Galili, ditu he gónó ye ston du.’ Hol bê ye na a klifót yóm deng tulónu kuy ni.”

<sup>8</sup> Tahu se, kendel le lemwót yó kem libun. Ya tey kligal le, mung du yóm klikò le. Tódô le mlóy na le e tō tulón yó kem gel lemolò ke Jisas.

<sup>9</sup> Bè yóm igò le mlóy, tódô senlong Jisas lu, ne monen mò kul, “Dwata he henek nawa ye.” Tódô le hloni ebéléen yó kem libun, mtud le bukol bè soluhen, ne nogot le tihen.

<sup>10</sup> Mon Jisas mò kul, “Bê ye abay hlikò. Na ye e tulón dou tu kem du muhu setwoli anì mágów le ebè Galili. Ditu he gónó le mton do.”

### *Kul tulón yó kem sendalù mentey bè lebeng Jisas*

<sup>11</sup> Tikóng le deng lemwót yó kem libun yó koni, wen bè yó kem sendalù tehe mentey bè lebeng Jisas mulék

ebè Jirusalim, mógo le ebè yó kem geta bè yó kem gel demsù ebè Dwata, tódô gotu tulón le kul yóm kdéen.

<sup>12</sup> Omin le gotu bud stifun se kul yó kem geta bè yó kem gel demsù ebè Dwata ne yó kem tuha gónó le gel galak, sensatul le yóm mò kmò le du. Yó nmò le, wen tey filak blay le bè yó kem sendalù,

<sup>13</sup> ne mon le mò kul, “Yó hol tulón ye bè yó kem tau, deng hennagaw yó kem tehe gellemolò du yóm lówó Jisas igò ye tolo lemnga tungô.

<sup>14</sup> Ke gungol yóm gubérnor nim ni, mi he hemyu stulón béléen anì laen dù gfà ye.”

<sup>15</sup> Tahu se, nwa yó kem sendalù yóm filak, tódô lolò le se yóm deng hlau le kul. Yó se hlós tulón tendo hból yó kem efet nim kmoen ni.

### *Kehegfan Jisas bè yó kem gel lemolò du*

(Mark 16:14-18; Luk 24:36-49; Jan 20:19-23; Kul Nmò 1:6-8)

<sup>16</sup> Lemwót yó kem sfolò sotu dù lemolò ke Jisas, mógo le etu bè yóm sotu bulul bè Galili, yóm bulul tehe eles tulón Jisas kul mò gónó le angat ston du.

<sup>17</sup> Timbow ton le Jisas bè yó, ya tey kdóyón le du. Okóm wen se bélè le tolo megewu nawa le du yóm deng bud klowilen.

<sup>18</sup> Hloni bélè le Jisas, ne monen mò kul, “Deng gotu blay Dwata do yóm kwalis mogot longit ne tonok.

<sup>19</sup> Yó gónóm mon, mógo ye do ebè kdéen but tau bè klamangen benwu anì baling le tau lemolò do. Bnabtays ye lu hlan ye bè boluy Dwata, yóm Ma tekuy, ne bè boluy yóm Ngaen ne bè boluy yóm Tulusen.

<sup>20</sup> Ne yóm kdé deng hlauhu kuy, hol tolok ye kul anì hol nimón le se kul. Ne laen kô mtukul sónen yóm knóu bélè ye efet kól bè yóm hol són kdaw.”